

Sarmur'aer Sul Vaexr Maele Ber

Daxlweixl Sarloxr Si A Saexl A

1 ¹ Sarloxr si ho a, Daxlweixl Yalmarlixl su ca mel leil ddaexr leixl gger ho a dder jjixr lei a. Yar mel Xirgexrla zzi gga nr ni hher a. ² So ni cir ni, ca ar ddei a pia xiux si bbaer dae, oldde leil nilme xiu deix dae a, Sarloxr daxr dae zaxlpoxr gga ddux lei a, Daxlweixl dax lei ci a, middur ddei leil puxr gex dae a, olddetexl. ³ Daxlweixl yar leil biex a bbeix: “Ni arddolmaex gga lei?” Yar bbeix: “Ngo Yirsaexllixl su ca mel zaxlpoxr daxr ggie pa teixl lei.” ⁴ Daxlweixl yoxl yar leil biex a bbeix: “Halbbaer arsaesael nga, ngo leil bbeix gger la.” Yar ddarkoxl a bbeix: “Cassor-worssor mel zaxlddaexr ggie pa du si a; ca lei cirke ddaexr zil a. Sarloxr nei yar ssor Yuenaxrda lei si a.” ⁵ Yel Daxlweixl ddar bbeix gger su caleixlssor ddei leil biex a bbeix: “Sarloxr nei yar ssor Yuenaxrda si a, ni arsae saexl a leir?” ⁶ Ddar bbeix gger su caleixlssor ddei bbeix: “Ngo jiajia Zilixlbo worga leil ssi ggur a, Sarloxr yar ddei zzi deil a sser ddu baex leil koxl gex dae ggie mia; halae zaxlddaexrddu marcae nei mur zzaer su meixr mel yar dax naelnaer a ggaxrmae dae ggie mia a. ⁷ Yar oldde taex za xixl lei a, ngo leil mia a dder ngo leil ae. Ngo bbeix: ‘Ngo eilmaex hher dae!’ ⁸ Yar ngo leil biex a bbeix: ‘Ni arddol su ca a?’ Ngo bbeix: ‘Ngo Yalmarlixl su ca a.’ ⁹ Yar bbeix: ‘Ni leil qie, ngo dax ngier mal lei a ngo leil seixl zil gger la! Ngo solzeixl zildu a; nael ngo olga ddei zzael halae zza dae seir,’ eine bbeix a. ¹⁰ Ngo, yar altor baex leil puxr gex dae a, gol nr var a saexl, yel ngo yar dax ngier dae a, yar leil seixl zil gger a. Ngo yar oldde leil ddexr labox nei leixrhher leil ddexr dae leixrzzu bbor, seirpor ni dax eilmaex vei mal lei a.”

¹¹ Daxlweixl dder pia xiux si bbaer gger a; yar dax mae dae ca maelmaerjjia lei yar sael a eine bei a. ¹² Sarloxr nei yar ssor Yuenaxrda, halae Yihexrhuaxr ddei cassor-worssor Yirsaexllixl goxrjia ca mel zaxlddaexr ggie si a, yel yaa cix a aenge, zzo lei nr zzor neixmar zzezze ci a. ¹³ Daxlweixl ddar bbeix gger su caleixlssor ddei leil biex a bbeix: “Ni arddol su ca a?” Yar bbeix: “Ngo mel nia dax ngolhher dae Yalmarlixl su ca a.” ¹⁴ Daxlweixl yar leil biex a bbeix: “Ni Yihexrhuaxr tiur teixl lei saercor ssuvi dox deix gger ddei leil seixl zil gger a lei, arsaenga a nr gexr leir?”

¹⁵ Giedae Daxlweixl caleixlssor ar ddei ae si lei a bbeix: “Yar leil seixl zil gger ssi” bbeix a. Caleixlssor ddei dder yar leil seixl a, yar dder si a. ¹⁶ Daxlweixl yar leil bbeix: “Ni mel ni ddei ni ‘Ngo Yihexrhuaxr tiur teixl lei saercor ssuvi dox deix gger ddei leil seixl zil gger a’ cexrssexl a; yel ni ca seixl zuixl ddei ni oldde leil ddeix a,” eine bbeix a.

Sarloxr Nei Yuenaxrda Leil Aenge Gger Labox Caxlgo

¹⁷ Daxlweixl Sarloxr nei yar ssor Yuenaxrda leil aenge gger labox caxlgo ar ser vaexr gger. ¹⁸ Halae ca leil miardal a, caxlgo eil ser Yoxrdaxl su ca mel leil mul gger lol. Caxlgo eil ser leil mel “Jir ddaexr labox caxlgo” mi, caxlgo eil ser Yarsaxl'aer sul leil vaexr deix dae. ¹⁹ Caxlgo gga vaexr dae a bbeix:

“Yirsaexllixl,

ni ddei yarzi middux ca mel leil worga leil seixl zil gger dae a;
zzi deil sexrsexr ca mel si a bbe!

²⁰ Jiatexl mermi gga bbeix teixl lei nr ddo,
Yalsixrziluixr zzijiul gga biar nr ddo,
nrnga a Feilixlsixl su ssormaer mel ggese leilei,
nrnga a gelir bei nr goxr su ca mel ddei ssormaer mel ggese zildu leilei.

²¹ Zzi deil sexrsexr ca mel ddei duixlpaexr ddei maelvi zzor a;
Sarloxr ddei duixlpaexr ddei ssuvi mei nr goxr a;
yel Zilixlbo worga, ni dax halmaex almer nei zil nr zza lol nia;
ni ddei mi gga Arbosobo leil ziddu loxlmoxr ner teixl lei nr xie lol nia.

²² Yuenaxrda ddei jirddaexrddu ddei mel, yar leil dirsu ca mel leil ddaexr zil nr gger hozze pox nr xixl lei;
Sarloxr ddei altor baex mel, zzi deil sexrsexr ca mel ddei cae mel giexl nr teixl lei hozze se nr xixl lei.

²³ Sarloxr nei Yuenaxrda gol dae seir car lei zzi leil ggese, zzi leil perniar, si car lei zzi dax bbe nr kae.
Yaa bir bbiu dae zzemar mel leil lei beix jiax,
bir hhemar mel leil lei sexr.

²⁴ Yirsaexllixl su ssormaer mel, nia Sarloxr leil aenge gger nia!
Yar nia leil nineix pia naxrcixlcixlmo zaelzaemo halmel veixr lol,
nia ddei pia mel leil sae naexr deix a zae lol.

²⁵ Zzi deil sexrsexr ca mel zaxlddaexr ggie si a bbe!

Yuenaxrda leil ni ddei worga leil seixl zil gger a bbe!

²⁶ Ngo ddei nimar Yuenaxrda, ngo ni leil weix a cix!

Ngo ni leil yarzi ggese.

Ni ngo leil perniar dae mel bir ssormaer perniar dae mel leil seir leixl.

²⁷ Zzi deil sexrsexr ca mel si a bbe!

Zzideilddu mel mier a bbe!”

Daxlweixl Leil Yoxrdaxl Su Ca Mel Ddei Zzirmar Bei Lol

2¹ Eine goxr ho a, Daxlweixl Yihexrhuaxr leil qiuxr a yar leil biex a bbeix: “Ngo Yoxrdaxl mermi zzi ar ddei gga ddeix ddo ddo?” Yihexrhuaxr bbeix: “Ddeix ddo.” Daxlweixl bbeix: “Zzi arddol ddei gga ddeix?” Yihexrhuaxr bbeix: “Xiboxrluixr zzi gga ddeix.”² Yel Daxlweixl nei yar maerssor nnel lei halmaex ddeix a. Cir ddei a nael, Yisilixl su ca Yalxinuar; cir ddei a nael, Jiamixl su ca Naxrba maerssor bei goxr Yalbirgie.³ Daxlweixl halae yar dax cirgo a hher dae capor mel leil nei yaa cirddei-hanga ddei ake ca mel leil cirgo a hier deix a, Xiboxrluixr mermi zzi mel gga hher dae a.⁴ Yoxrdaxl su ca mel lei a, halmaex gga Daxlweixl leil ssuvi dox deix gger a, Yoxrdaxl su ca mel ddei zzirmar bei lol.

Ca armel a Daxlweixl leil bbeix gger a bbeix: “Sarloxr leil giexlhex su ca mel mel Zilixl-Yarbir su ca a.”⁵ Daxlweixl dder ddar bbeix gger su ca miardal a, Zilixl-Yarbir su ca mel dax ssi lol a, yaa dax bbeix lol a bbeix: “Nia mel nia ddei Seirpor Sarloxr leil yarzisael perniar a, yar leil giexlhex a. Yel Yihexrhuaxr leil nia leil seir lol nia.⁶ Nia eine bei a, Yihexrhuaxr leil, yar ca leil yarzisael perniar nei yar leil yarzi ddarzziddo mel dax zox dae a, nia leil seir lol nia. Nia seirseir bei a, ngo lei nia leil seir lol nia.⁷ Eilcar, nia ddei seirpor Sarloxr si ho a, Yoxrdaxl su ca mel ngo leil tiur a ngo leil ssuvi dox deix gger a, yaa ddei zzirmar bei lol a. Yel nia hhel du lei nia, sexr nia.”

Yisibosaexl Yirsaexllixl Su Ddei Zzirmar Bei

⁸ Halleix, Sarloxr ddei meixr guaxrsu vaervaerpor Nixr'aer ddei ssor Yanixr'aer mel, Sarloxr ddei ssor Yisibosaexl leil lazzarmo leil hier gel a, Marhanixl zzi gga ssi ci a.⁹ Yar leil zzirmar bei lol a, Zilixl mermi, Yalsulixl mermi, Yisilixl mermi, Yirfaxrluixr mermi nei Bixlyarmir mermi, hherdder Yirsaexllixl goxrjia maelmaerjia leil guaxr lol.¹⁰ Sarloxr ddei ssor Yisibosaexl zzirmar bei halcar licei koxl loxr a; yar Yirsaexllixl su ca mel ddei zzirmar nr koxl bei a. Nael Yoxrdaxl su ca mel zzael Daxlweixl dax mae.¹¹ Daxlweixl Xiboxrluixr zzi gga Yoxrdaxl su ca mel ddei zzirmar bei nixixl mel, maelmaer a sir koxl nei qiuxl xiubbo a.

Sarloxr Hhexr Nei Daxlweixl Hhexr Zaxlddaexr

¹² Nixr'aer ddei ssor Yanixr'aer nei Sarloxr ddei ssor Yisibosaexl ddei meixr mel, Marhanixl mermi ddux lei a Zibixl mermi ssi. ¹³ Xirluryar ddei ssor Yueya nei Daxlweixl ddei meixr mel lei ddux lei a, Zibixl mermi ajjix qir leil yaa dax zzi a; cir cir a nael ajjix eilpiar a gga cux dae, cir cir a nael ajjix halpiar a gga cux dae.

¹⁴ Yanixr'aer Yueya leil bbeix: "Caleixlssor mel leil ha du lei lol a, niul meixsaer qir leil zzi deil lol ddo a." Yueya bbeix: "Ngaddo." ¹⁵ Yel dder dixl har dae ddei dax zox dae a ha du lei a; Sarloxr ddei ssor Yisibosaexl ddei piar a gga, Bixlyarmir su ca ceinirmo gger a; Daxlweixl dax mae dae su ca mel lei ceinirmo gger a.

¹⁶ Yaa zzicarzzi oldde leil zox gex dae a, altor baex zzicarzzi ddei xilgiexgiex dax halmaex zzir dil a, cirter a si a. Yel halmaex leil "Altor Mi" ae, hherdder Zibixl mermi gga nga a. ¹⁷ Hal cir ni mel yarzisael deil larhor. Daxlweixl dax mae dae su ca mel, Yanixr'aer nei Yirsaexllixl su ca mel leil deil leixl gger a. ¹⁸ Xirluryar ddei ssor Yueya, Yalbirsae nei Yalsarhei yaa so hieni lei halmaex gga hher dae. Yalsarhei mel, mipaerbbae gga ddei ci mel sael a beix jiax. ¹⁹ Yalsarhei Yanixr'aer leil ggaxrmae a, zzalzzar a ggaxrmae doxr dae a, vaelpiar a yopiar a lei beix nr pixl. ²⁰ Yanixr'aer oldde taex za xixl lei a, yar leil bbeix: "Ni Yalsarhei nga nga?" Yar ddarkoxl a bbeix: "Nga a mar!" ²¹ Yanixr'aer yar leil bbeix: "Ni vaelpiar a gga bbeixsael yopiar a gga beix mal a, caleixlssor ar ddei ssu gex dae a, yar zaxlddaexr a sser labox mel vei si." Nael Yalsarhei zzael, beix pixl a yar leil ggaxr-nr-mae bei nr yuex. ²² Yanixr'aer yoxl Yalsarhei leil bbeix: "Ni ar piar za mal a, ngo leil tor ggaxr-nr-mae lei! Ngo ni leil seixl a azo bei bbeixleir? Ngo ni leil seixl arddeirnga a, arsaе niago Yueya leil mia lol yixrsixr zza bbeixleir?" ²³ Nael Yalsarhei mel halae za nr pixl, yel Yanixr'aer dder yar zzi deil a sser ddu teixvilvil baex giedae piar a gga cex xixl a, yar xilbe gga cex dil gger a, nolggerbbaer lei cex bei a. Yalsarhei dder de zei si a halmaex gga si zil dae a. Ca mel Yalsarhei de zei a si ggie ggaxrmae ci a dder, nor a ngier dae a.

²⁴ Nael Yueya nei Yalbirsae Yanixr'aer leil ggaxrmae ssi. Mercixl car, yaa Zibixl mipaerbbae gga ssi mal dae jjiimo eil zex yarqir dax, Ziyal deixrgoxr Yalmar worga leil ssi ci a. ²⁵ Bixlyarmir su ca mel Yanixr'aer giedae hher pex du lei a, yar dax cir cir a loxr a, worga oldde leil ngier dae. ²⁶ Giedae Yanixr'aer Yueya leil ae a bbeix: "Niul yilzi a seixl zei si nia a ngo? Holbbaexl eine bei zei si a mel

goxrsol-goxrnaxr zza ni nr saexl a ngo? Niul mel arzzi-nimar a; ni halae ngua leil arddolcar sael ggaxrmae ci niazzir dae neil?”²⁷ Yueya bbeix: “Ngo, arddolcar ci a lei gol dae Arbosobo leil dor dae a bbeix: Ni eine nr bbeix arddeirnga a, ngo ddei meixr mel yilzi a nia leil ggaxrmae dae a, argge-nehe zzezze ggaxrmae ci var.”²⁸ Yel Yueya dder cuxgexdaex mex a, cassor-worssor mel dder nor dae a, Yirsaexllixl su ca mel leil ggaxr-nr-mae a; zaxl lei nr ddaexr a.

²⁹ Yanixr'aer nei yar dax mae dae su ca mel cir xixl ssi doxr a, Yallaba mermi ssi gel nei Yuedaxl lazzarmo leil gger a; giedae cir ni yoxl cir nehe ssi doxr a, Marhanixl zzi gga ssi ci a.

³⁰ Yueya Yanixr'aer leil ggaxrmae xixl lei a, ca maelmaerjjia leil ae pex du lei a; Yalsarhei leil cuxrteixl a, Daxlweixl ddei meixr mel ceigeler (19) nganiul dae.

³¹ Nael Daxlweixl ddei meixr mel, Yanixr'aer Bixlyarmir cuxr gga hier si lei ca mel leil, maelmaer a soxiu qiuxlceimo (360) seixl zil gger a. ³² Yaa Yalsarhei leil Boxrlxlhexr kax gga ho xixl a, yarbbor ddei lixrbaex gga giexlhex gger a. Giedae, Yueya nei yar dax mae dae su ca mel cir xixl ssi doxr a, merteir a Xiboxrluixr zzi gga jjixr ci a.

3 ¹ Sarloxr hhexr nei Daxlweixl hhexr^a zaxl hormo nixixl ddaexr doxr a.
Daxlweixl hhexr ho bei ho sexr du lei a; Sarloxr hhexr ho bei ho nr cexr a.

Daxlweixl Ddei Ssor Mel

² Daxlweixl Xiboxrluixr zzi gga hher dae a ssor armel hier wo a. Ssor vaervaer ddei nael, Axlnexl; yar leil mel Yisilixl su ca Yalxinuar xiu a. ³ Nrnal ddei nael, Zilixlya; eil ddei leil mel Jiamixl su ca Naxrba maerssor bei goxr Yalbirgie xiu a. Soler ddei nael, Yasaloxr, eil ddei leil mel Zisuxl zzirmar Daxrmaer ddei ssormaer Marjia xiu a. ⁴ Liller ddei nael, Yaldonixryar; eil ddei leil mel Hazixr xiu a. Ngorler ddei nael, Sixlfaxrtixryar; eil ddei leil mel Yalbirta xiu a. ⁵ Qiuxller ddei nael, Yirtexlnixl; eil ddei leil mel Daxlweixl ddei maerssor Yirgexrla xiu a. Daxlweixl ddei ssor eil qiuxller jjia leil Xiboxrluixr zzi gga xiu a.

Yanixr'aer Daxlweixl Dax Cir Piar A Bei Lei

⁶ Sarloxr hhexr nei Daxlweixl hhexr zaxl ddaexr car, Yanixr'aer Sarloxr hhexr ake gga ho bei ho quexrlixl zza a. ⁷ Sarloxr mel maeryemo ar ddei zza, yar leil Lixlsiba mi, yar mel Aexlyal ddei ssormaer a. Cir ni a, Yisibosaexl Yanixr'aer leil bbeix: “Ni arsaenga a, ngabbor ddei maeryemo dax pil neil?” ⁸ Yanixr'aer mel Yisibosaexl ddar eilmel bbeix a seifu faex zildu a; yar bbeix: “Holbbaexl ngo mel Yoxrdaxl su ca mel ddei anol oldde a ngo? Eilni ngo niabbor Sarloxr hhexr leil nei yar ddei arzzi-nimar mel leil, halae yar ddei gaxggor-carbeix mel leil seir lol, ni leil Daxlweixl leixrga gga jia ji nr gger. Eilni ni zzael ssormaer eil ddei leil weix a ngo leil bota a ngo? ⁹⁻¹⁰ Ngo Yihexrhuaxr Daxlweixl dax bbeixharzaxr goxr mel dax zox dae a, niabbor Sarloxr leil zzirmar nr bei lol, Daxlweixl leil zzirmar bei lol a, yar leil Yirsaexllixl su nei Yoxrdaxl su, hherdder Daxl mermi cirdae a Bixrsixlba mermi zzezze guaxr lol, eine nr bei arddeirnga a, Arbosobo leil ngo leil larhorhormo faxr lol ddo,” eine bbeix a. ¹¹ Yisibosaexl mel Yanixr'aer leil gexr a, cir qir lei ddarkoxl nr bel a.

¹² Yanixr'aer ddar bbeix gger su ca leil miardal a, Daxlweixl dax ssi lol a bbeix: “Goxrjia eil ddei ni ddei nr nga a ngo? Ni ngo dax bbeixharzaxr a, ngo dder ni leil beijjiu a, Yirsaexllixl su ca maelmaerjjia leil ni ddei ddar no lol.” ¹³ Daxlweixl

^a3:1 Sarloxr hhexr nei Daxlweixl hhexr Sarloxr hhexr mel dder Bixlyarmir cuxr nga a; Daxlweixl hhexr nael Yoxrdaxl cuxr nga a.

bbeix: “Ngaddo! Ngo ni dax bbeixharzaxr. Nael ni ngo leil miar ar jji ddarkoxl nia. Ni lei car, Sarloxr ddei ssormaer Mirjiaxr leil hier dax nr si lei arddeirnga a dder, arsae bei lei ngo leil mia nr ddo,” eine bbeix a. ¹⁴ Daxlweixl dder ddar bbeix gger su leil miardal a, Sarloxr ddei ssor Yisibosaexl dax ssi lol a, bbeix: “Ni ngo maerssor Mirjiaxr leil ngo leil koxl gger la! Yar leil mel halleix ngo Feilixlsixl su capor cirxiu seixl zil gger a^b, bbeix si lei arddeir a.” ¹⁵ Yisibosaexl dder ca leil miardal a, Mirjiaxr leil Layixl ddei ssor Paxltixr dax, hherdder yar capor dax, hier xixl lei lol. ¹⁶ Yar capor Paxltixr mel ho ssi ho yar dax nge mae dae a, Bahuxllixr mermi zzeze ssi ci a. Giedae Yanixr'aer Paxltixr leil bbeix: “Ni jjixr ddo a” bbeix a, yar dder jjixr a.

¹⁷ Yanixr'aer Yirsaexllixl su ca leil guaxrsu camar mel leil bbeix: “Halleix nia Daxlweixl leil zzirmar bei lol a, nia leil guaxr lol niazzir. ¹⁸ Yihexrhuaxr Daxlweixl leil bbeix goxr a bbeix: ‘Ngo, ngo leil vissersu Daxlweixl ddei leixrhher leil sser dae a, ngo ddei cassor-worssor Yirsaexllixl su mel leil, Feilixlsixl su ca nei yaa leil dirsu ca maelmaerjjia ddei leixrga gga jiuxl teixl lei nia,’ eine bbeix goxr a; yel eilcar nia bei niazzir dae mel sael a bei ddo a.” ¹⁹ Yanixr'aer lei ddar eilmel Bixlyarmir su ca mel leil biar gger a. Yoxl Xiboxrluixr zzi gga ssi a, Yirsaexllixl su nei Bixlyarmir su ca maelmaerjjia i dae a seir mel Daxlweixl leil biar gger a. ²⁰ Yanixr'aer ca nrzeimo hier dae a, Xiboxrluixr zzi gga Daxlweixl dax lei. Daxlweixl dder Yanixr'aer nei yar hier si lei ca mel leil zzorci-ddami baer gger. ²¹ Yanixr'aer Daxlweixl leil bbeix: “Ngo ha du lei a, ssi a, Yirsaexllixl su ca mel leil ae pex a, ngo ddei seirpor ngo ddei zzirmar dax, hherdder ni dax eilmaex lei lol a, ni dax bbeixharzaxr lol a, ni dder ni xiar dae mel dax zox dae a zzirmar bei cexr a,” eine bbeix a. Yel Daxlweixl Yanixr'aer leil ssi lol a, Yanixr'aer dder zzazza-soso a ssi a.

Yueya Yanixr'aer Leil Seixl Zil Gger

²² I lar! Daxlweixl dax mae dae su ca mel nei Yueya, yaa leil dirsu ca mel leil ddaexr xixl lei a, su si lei zzaegu cirke vei xixl lei a. Nael Daxlweixl mel Yanixr'aer leil ssi lol ho a; yar lei zzasoso a ssi jixr a. Yel Yanixr'aer Daxlweixl dax cirgo a, Xiboxrluixr zzi gga nr hher dae a. ²³ Yueya nei yar ddei meixr maelmaerjjia jjixr ci a, ca mel Yueya leil bbeix gger a bbeix: “Nixr'aer ddei ssor Yanixr'aer zzirmar ddei

^b3:14 seixl zil gger a Ddar eil qir Xiboxrlaexr ddar gga mel “yaa ddei sirbeixl ddu zzi olniuxniux mel sser a bbeix si lei arddeir a” eine bbeix.

leil i lei a, zzirmar ddei yar leil ssi lol a, yar lei zzazza-soso a ssi jixr a.”²⁴ Giedae Yueya zzirmar ddei dax ssi a bbeix: “Ni azo bei suax leir? I lar! Yanixr'aer ni dax eilmaex lei ci a, ni arsaenga a yar leil ssi lol a, yar dder yarzi ssi a leir?”²⁵ Ni saexl, Nixr'aer ddei ssor Yanixr'aer lei a mel, ni leil fur a, ni ddirddir-dduxddux mel leil nei ni bei dae hazza leil saexl niazzir,” eine bbeix a.

²⁶ Yueya Daxlweixl dax halmaex ddux lei ho a dder, ca leil ddar bbeix gger su mel leil miardal a, Yanixr'aer leil ggaxrmae ssi lol. Yaa Xila lurddur dax halmaex ggaxrmae wo a, yar leil hier xixl lei a. Nael Daxlweixl zzael eilmel leil nr saexl.
²⁷ Yanixr'aer Xiboxrluixr zzi gga jjixr ci a, Yueya yar leil zzi gielmi doxli dax hier mal a, yar dax arjjiuljjiu a ddar biar laexl a, halmaex gga altor baex yar xilbe gga zzir dil gger a, yar dder si a. Eine bei a mel yar Yueya ddei nimar Yalsarhei leil seixl zil gger a nga arddeir a.²⁸ Daxlweixl bbejjiur a dder bbeix: “Nixr'aer ddei ssor Yanixr'aer leil seixl zuixl eil ddei, Yihexrhuaxr meixsaer qir leil arddolcar ci a lei ngo leil nei ngo ddei goxr leil ddeix lol nr var.²⁹ Yanixr'aer leil seixl zuixl eil ddei Yueya nei yarbbor hhexr maelmaerjjia leil ddeix lol nia; yoxl Yueya hhexr leil arddolcar lei sirnilni ddux doxr su, nopae su, pirdael su, altor giedae si su nei zzor bbox nr ddo su zza lol nia,” eine bbeix a.³⁰ Yueya nei yar nimar Yalbirsae Yanixr'aer leil seixl a mel, Zibixl mermi zaxlddaexr car, Yanixr'aer yaa ddei nimar Yalsarhei leil seixl a nga arddeir a.

Yanixr'aer Leil Giexlhex

³¹ Giedae Daxlweixl Yueya nei yar dax mae dae su ca maelmaerjjia leil miardal a bbeix: “Nia, nia veixr dae pia xiux si bbaer gger a, zzir pia veixr dae a, Yanixr'aer sixpir ddei xilmeirbbaer aenge nia,” eine bbeix a. Zzirmar Daxlweixl lei sixpir ddei giedae mae dae.³² Yaa Yanixr'aer leil Xiboxrluixr zzi gga giexlhex gger a. Zzirmar ddei Yanixr'aer ddei lixrbaex dax worcixl-worni nge a, cassor-worssor maelmaerjjia lei nge dae a.³³ Zzirmar ddei Yanixr'aer leil aenge gger a bbeix: “Yanixr'aer arsaenga a ca medeil mel sael a si leir?”³⁴ Ni leixrhher zze leil neixl nr gex dae, qihher zze leil hexsox sser a zzux nr gex dae, ni si car yarzi gexrddo bei su ca mel leixrga gga si sael a nga,” eine bbeix a. Yel cassor-worssor maelmaerjjia lei yoxl Yanixr'aer leil aenge gger.³⁵ Eilnirggu, cassor-worssor maelmaerjjia lei a Daxlweixl leil zzo zzor nia quex. Nael Daxlweixl Arbosobo meixsaer qir leil bbeix: “Ngo merni nr lal seir zzo zzor arddeirnga a, Arbosobo ngo leil faxr lol ddo,” eine

bbeix a. ³⁶Ca maelmaerjjia saexl a dder ggese a. Zzirmar ddei bei dae hazza, ca maelmaerjjia gge-nr-se lei ar jji nr zza. ³⁷Hal cir ni saelnei, Daxlweixl dax mae dae su ca maelmaerjjia nei Yirsaexllixl su ca maelmaerjjia, Nixr'aer ddei ssor Yanixr'aer leil seixl a mel zzirmar ddei xiar teixl lei nr nga saexl. ³⁸Zzirmar ddei yar woxrke vaervaerpor mel leil bbeix: “Holbbaexl eilni Yirsaexllixl su ca mel gga meixr guaxrsu yarzi sexr ar ddei si a, nia nr saexl a ngo? ³⁹Ngo mel Arbosobo tiur teixl lei saercor ssuvi dox deix gger zzirmar ddei a bbeixarnar, eilni halae nr sexr; Xirluryar ddei ssor eil nnel bir ngo leil sexr. Yihexrhuaxr leil nixmox neix su ca mel bei dae mel dax zox dae a, yaa leil gexrddoddomo bei koxl xixl lol nia,” eine bbeix a.

Yisibosaexl Leil Seixl Zil Gger

4 ¹ Sarloxr ddei ssor Yisibosaexl, Yanixr'aer Xiboxrluixr zzi gga si zil a bbejjiur a dder nixmox bbiex a; Yirsaexllixl su ca maelmaerjjia lei ssilssil-ssurssur gexr zildu a. ² Sarloxr ddei ssor Yisibosaexl meixr guaxrsu vaervaerpor nnel zza. Cir ddei a nael, Banaxr mi; cir ddei a nael, Lixljiaxr mi. Yaa nnel jjia Bixlyarmir ddei cuxr gga Birluxl su ca Lixrmexr ddei ssor a. (Birluxl su ca mel lei Bixlyarmir su ca suax. ³ Birluxl su ca mel halleix dder Zitayi mermi pa mal a, eilleix zzezze ci a lei halmaex ngolhher dae.)

⁴ Sarloxr ddei ssor Yuenaxrda mel, ssor ar ddei zza; yar leil Mirfeibosaexl mi; yar mel pirdael dae. Sarloxr nei Yuenaxrda si a bbaexl Yisilixl mermi gga biar teixl lei car, yar ngor koxl loxr a. Yar leil baxrda vaer su ssormaer ddei yar leil deix dae a, pa a, jiuurjiur-maemae beix a, yar leil middur leil de zei a dder pirdael a.

⁵ Cir ni a, Birluxl su ca Lixrmexr ddei ssor Lixljiaxr nei Banaxr yaa nnel ddux a, eilnirrgu gielco zildu halcar, Yisibosaexl hhexr ake lei ci a. Yisibosaexl mel, yixr dae. ⁶ Yaa xi gga ddir a, so vei ssi mel sael a bei laexl dae a Yisibosaexl xilbe ddei leil zzir bei gger a dder pa du si a. ⁷ Yaa xi gga ddir halcar a mel, Yisibosaexl mel yixrggie yixrgguci leil yixr dae. Yaa yar leil seixl zil gger a, yel yar ddei oldde taex caer zei lei a, oldde taex vei dae a, Yallaba mermi jjiuno zex gga cir xixl ssi doxr a, ⁸ yar ddei oldde taex Xiboxrluixr zzi gga vei mal a zzirmar Daxlweixl leil i ssi a bbeix: “Zzirmar, ni leil dirsu Sarloxr mel, halleix ni leil bei zil gger niazzir. Ni i ddo a; eil ddei mel yar ssor Yisibosaexl ddei oldde taex nga a. Eilni Yihexrhuaxr ngo ddei seirpor ngo ddei zzirmar leil weix a, Sarloxr nei yar giedae ca mel leil bei koxl xixl a.” ⁹ Daxlweixl Birluxl su ca Lixrmexr ddei ssor Lixljiaxr nei yar nimar Banaxr leil bbeix: “Ngo, ngo ddei olga ddei leil cirza-hanga goxrsol-goxrnaxr mel gga jiuxl teixl lei su, arddolcar ci a lei gol dae Yihexrhuaxr meixsaer qir leil bbeix: ¹⁰ halleix ca ar ddei a ngo leil Sarloxr si a bbeix gger a, yar zzirdae a ddar seirseir bbeix gger. Ngo zzael yar leil ssu gex dae a, yar leil Xirgexrla zzi gga seixl zil gger a; eil ddei dder yar ddar bbeix gger a, li wo mibbe ddei bei a. ¹¹ Nixmox neix su ca mel nixmox seir su ca ddei leil, yar armael ddei ake gga yixrgguci bul leil seixl zil gger a gielgiel, ngo, nia yar leil seixl zuixl ddei leil nr faxr, nia leil middurbbor nr mier lol arddollei bbeixleir?” ¹² Yel Daxlweixl dder leixl su mel leil miardal a yaa leil seixl zil gger a; yaa ddei qihher leixrhher taexl te gger a, Xiboxrluixr zzi gga

ajjix bbeddur qir leil gaxl gex gger a. Yisibosaexl ddei oldde taex nael, Xiboxrluixr zzi gga Yanixr'aer ddei lixrbaex gga giexlhex gger a.

Daxlweixl Yoxrdaxl Su Nei Yirsaexllixl Su Ddei Zzirmar Bei

5 ¹Yirsaexllixl su ca circuxr-hanga Xiboxrluixr zzi gga Daxlweixl leil i lei a bbeix: “Ni ar dae i! Ngua mel ni ddei arzzi-nimar ga a. ²Halleix Sarloxr ngua ddei zzirmar bei car, Yirsaexllixl su ca mel leil hier dae a zaxlddaexr su ddei mel ni a. Yihexrhuaxr lei ni dax bbeix goxr a bbeix: ‘Ni yaloxlmo sael a ngo ddei cassor-worssor Yirsaexllixl su mel leil guaxr nia, Yirsaexllixl su ddei zzirmar bei nia,’ eine bbeix goxr a.” ³Yel Yirsaexllixl su ca leil guaxrsu camar maelmaerjgia Xiboxrluixr zzi gga Daxlweixl leil i lei. Daxlweixl Xiboxrluixr zzi gga Yihexrhuaxr meixsaer qir leil yaa dax bbeixharzaxr a, yaa dder Daxlweixl leil ssuvi dox deix gger a, Yirsaexllixl su ddei zzirmar bei lol. ⁴Daxlweixl zzirmar bei car, socei koxl loxr a; yar zzirmar licei koxl bei a. ⁵Yar Xiboxrluixr zzi gga Yoxrdaxl su ddei zzirmar sir koxl nei qiuxl xiubbo bei. Yar Yiluxlsaler zzi gga Yirsaexllixl su nei Yoxrdaxl su ddei zzirmar socei so koxl bei.

⁶Daxlweixl nei yar dax mae dae su ca mel Yiluxlsaler zzi gga ssi ci a, halmaex hher dae Yibuxlsi su ca mel leil ddaexr. Yibuxlsi su ca mel Daxlweixl zzi ddei gga ddaexr dil lei nr xie zzirdae a dder yar leil bbeix: “Ni zzi eil ddei gga ddir lei nr xie, meixdae su nei pirdael su mel lei ni leil ggaxr teixl gger xie,” eine bbeix a. ⁷Nael Daxlweixl zzael, Xi'a zaxlddaexr a pahher ggie ddei ddaexr wo a; hherdder Daxlweixl zzi ddei nga a.

⁸Hal cir ni Daxlweixl bbeix: “Arseir Yibuxlsi su ca mel leil ddaexr a mel dder doxli zzi gga laxiur zex gga ddeix a, ngo vuxryixr dae pirdael su nei meixdae su mel leil ddaexr ssi nia,” eine bbeix a. Yel hane cirdae a ddarbel-ddarqiar bbeix: “Meixdae su nei pirdael su mel Arbosobo ddei xi gga ddir nr cexr,” eine bbeix a.

⁹Daxlweixl zaxlddaexr a pahher ggie ddei gga hher dae, hal ddei leil Daxlweixl zzi eine mi gger. Daxlweixl mel zaxlddaexr a pahher ggie ddei zaza-lili zzi zi du lei a. ¹⁰Meixr hazza leil guaxrsu Arbosobo Yihexrhuaxr mel Daxlweixl dax hher dax dae, yel yar ho bei ho sexr du lei a.

¹¹Tuiloxxr ddei zzirmar Xilaxr xiabaexr zzei sixlox mel Daxlweixl dax halmaex gga mal gger, yoxl ddar bbeix gger su ca mel leil, mojiuxr mel leil nei loxjiuxr mel leil miardal a, Daxlweixl leil zzirmar hher ggie xi zi gger lol. ¹²Daxlweixl dder Yihexrhuaxr yar leil Yirsaexllixl su ddei zzirmar bei lol ho a saexl; halae armael ddei cassor-worssor mel leil weix a, yar ddei goxr ddei leil sexr du lei lol saexl a.

¹³ Daxlweixl Xiboxrluixr zzi gga nr hher Yiluxlsaler zzi gga ssi ci ho a, yoxl maeryemo armel bbeix dax, ssormine armel hier dax. ¹⁴ Yiluxlsaler zzi gga hher dae a ssor hier wo mel mel, Samuryal, Soxlbaxl, Naxrda, Sorloxmexr, ¹⁵ Yixlxiaxr, Yirlixlsuyal, Nixrfeir, Yarfeiyal, ¹⁶ Yirlixlsamar, Yirlixlyardaxl, Yirlixlfarlixl nga a.

Feilixlsixl Su Ca Mel Leil Ddaexr Leixl Gger

¹⁷ Ca mel Daxlweixl leil ssuvi dox deix gger a, Yirsaexllixl su ca ddei zzirmar bei lol a, Feilixlsixl su ca mel bbejjiur a; yel yaa dder ddeix lei a Daxlweixl leil zo lei. Daxlweixl bbejjiur a dder zaxlddaexr a pahher ggie zei jjixr a. ¹⁸ Feilixlsixl su ca mel lei a, Lixlfaxryi lagiex gga cirmaex-hanga hher dae. ¹⁹ Daxlweixl Yihexrhuaxr leil biex a bbeix: “Ngo ddeix a Feilixlsixl su ca mel leil ddaexr ssi ddo ddo? Ni yaa leil ngo leixrga gga jia ji gger gger?” Yihexrhuaxr bbeix: “Ni ddeix ddo! Ngo arsae bei lei Feilixlsixl su ca mel leil ni leixrga gga jia ji gger nia.”

²⁰ Yel Daxlweixl dder Balixl-Pirlaxi mermi lei ci a, halmaex gga Feilixlsixl su ca mel leil ddaexr, yar bbeix: “Vi mil a ajjix do gex dae mel co pixl gger sael a, Yihexrhuaxr ngo leil dirsu mel leil co bbeir jjia gger a.” Yel halmaex leil dder “Balixl-Pirlaxi^c” eine bbeix. ²¹ Feilixlsixl su ca mel, yaa ddei bbex mel halmaex piar dol dae a, Daxlweixl nei yar dax mae dae su ca mel vei si a.

²² Feilixlsixl su ca mel yoxl ddeix lei a, Lixlfaxryi lagiex gga cirmaex-hanga hher dae. ²³ Yel Daxlweixl Yihexrhuaxr leil qiuxr a yar leil biex. Yihexrhuaxr bbeix: “Yilzi a zzalzzar a ddeix nr ddo. Yaa giedae piar a gga za mal a, saersulsul cili deixrgoxr yaa leil ddaexr nia. ²⁴ Ni saersulsul zzei yar'olnix ddei leil cibbi ssi ggie bbejjiur a dder nialngasael ddaexr ssi nia. Eil ddei mel, ngo hherdder Yihexrhuaxr, ni xilmeir leil Feilixlsixl su meixr mel leil ddaexr ssi ho a nga arddeir a.” ²⁵ Daxlweixl dder Yihexrhuaxr miardal dae mel sael a bei ssi a, Feilixlsixl su ca mel leil ddaexr, Jiaba mermi cirdae a, Zisexl mermi zzezze ddaexr ci a.

^c5:20 Balixl-Pirlaxi Balixl-Pirlaxi ddei Yilsi mel dder “Co xiaxr gger su seirpor”.

Yueguixl Ddei Yiluxlsaler Zzi Gga Ba Mal

6¹ Daxlweixl Yoxl Yirsaexllixl su ca mel gga tiur teixl lei capor someir leil ae pex. ² Daxlweixl yar dax mae dae ca maelmaerjia leil hier dae a, Yoxrdaxl mermi Bala zzi gga ssi a, Arbosobo ddei yueguixl ddei ba xixl lei niazzir. Yueguixl eil ddei mel, Jiluxlboxr nnel ggaxrne cux deix dae meixr hazza leil guaxrsu Yihexrhuaxr ddei mi sser a mi. ³ Yaa Arbosobo ddei yueguixl ddei marcae sixl ar jiaxl leil dol deix gger a, wordabbor Yalbirnaxrdaxr hhexr ake gga gga teixl lei a. Yalbirnaxrdaxr ddei ssor Vusar nei Yalxiyue yaa nnel marcae eil jiaxl ggaxr. ⁴ Yaa Arbosobo ddei yueguixl ddei wordabbor Yalbirnaxrdaxr hhexr ake bil teixl lei car, Yalxiyue yueguixl ddei xilmeir ssi dae. ⁵ Daxlweixl nei Yirsaexllixl su ca maelmaerjia nael, Yihexrhuaxr meixsaer qir leil, tarzzej sser a bei teixl lei cirza-hanga yoxrcixl mel sser, halae caxlgo bbaex labox nei yoxrcixl peix labox mel bbaex dae, go labox mel go dae, biulbiulcar nei surgu deil dae a huade tiuxl. ⁶ Yaa Naxrger ddei ggieddei dax ssi ci a, niur ddei mel leixrhher bbor toxlsar a, Vusar dder leixrhher bbor cei teixl a Arbosobo ddei yueguixl ddei leil zar gex dae a. ⁷ Yihexrhuaxr dder Vusar leil seifu faex. Vusar mel bei cox a, Arbosobo dder yar leil halmaex seixl zil gger a. Yar dder Arbosobo ddei yueguixl ddei dax halmaex si zil dae a. ⁸ Yihexrhuaxr Vusar leil seixl zil gger a, Daxlweixl dder sirzzi a. Yar halmaex leil Pirlixlsi-Vusar^d mi gger a; eilni zzezze lei eine ae. ⁹ Hal cir ni, Daxlweixl Yihexrhuaxr leil gexr a bbeix: “Yihexrhuaxr ddei yueguixl ddei arsae ngo dax eilmaex ba mal lei ddo bbeixleir?” eine bbeix a. ¹⁰ Yel Daxlweixl Yihexrhuaxr ddei yueguixl ddei Daxlweixl zzi gga ba mal nr yuex. Doxgoxleixr, Jiatexl su ca Exrbixryirdo hhexr ake ba mal a. ¹¹ Yihexrhuaxr ddei yueguixl ddei Jiatexl su ca Exrbixryirdo hhexr ake so xiubbo dol a; Yel Yihexrhuaxr Exrbixryirdo leil nei yaa cirhhexr-lorbba leil seir lol. ¹² Ca mel Daxlweixl leil bbeix gger a bbeix: “Arbosobo ddei yueguixl ddei Exrbixryirdo hhexr ake dol dae a, Yihexrhuaxr yaa hhexr leil nei yaa ddei cirza-hanga leil seir lol a.” Yel Daxlweixl dder ssi a, ggegge-sese a Arbosobo ddei yueguixl ddei Exrbixryirdo hhexr ake cirdae a Daxlweixl zzi gga bil deix xixl lei a. ¹³ Yueguixl bil su mel qiuxl bbi ssi a dder, Daxlweixl mel niur ar ddei nei acixl bbeixsaer ya paxldeildeil ar ddei seixl zi. ¹⁴ Daxlweixl mel zzirmae sser a naexr teixl

^d6:8 Pirlixlsi-Vusar Pirlixlsi-Vusar ddei yilsi mel dder “Vusar leil faxr”

lei yirfuxrdaexr xiux^e veixr dae a, Yihexrhuaxr meixsaer qir leil huade daxlgaxl tiuxl dae. ¹⁵ Yel Daxlweixl nei Yirsaexllixl su ca maelmaerjjia worcixl-worni ae dae nei cuxgexdaex mex dae a Yihexrhuaxr ddei yueguixl ddei bil deix xixl lei a.

¹⁶ Yihexrhuaxr ddei yueguixl ddei Daxlweixl ddei zzi gga bil dil xixl lei car, Sarloxr ddei ssormaer Mirjiaxr cuaho gga igax dae, yar Daxlweixl Yihexrhuaxr meixsaer qir leil tiuxl du lei tiuxl du lei huade tiuxl ggje mia a, nixmox zzar Daxlweixl leil i zeil.

¹⁷ Giedae yaa Yihexrhuaxr ddei yueguixl ddei leil bil dil a, bei har zaxr ggje halmaex dol, hherdder Daxlweixl daxr zaxlpoxr gga nga a. Daxlweixl Yihexrhuaxr meixsaer qir leil adoxl gga cu a ziddu mel nei zzaso lol qiuxr a ziddu mel zi. ¹⁸ Daxlweixl adoxl gga cu a ziddu mel nei zzaso lol qiuxr a ziddu mel zi teixl ho a dder, meixr hazza leil guaxrsu Yihexrhuaxr ddei mi ddei bbeix dae a cassor-worssor mel leil seir lol.

¹⁹ Halae cassor-worssor maelmaerjjia leil zzor ddu bbe gger; Yirsaexllixl gga hher dae ca hazza, capor bbeixsaer ssormaer nga zzorbbeixlei, cir ddei leil aba ar pir, kal goxr hor ar pir, puxrtohie bei teixl lei aba ar pir gger a. Cassor-worssor mel dder armael ddei ake jjixr a. ²⁰ Daxlweixl ake jjixr ci a, ake ca hhexr leil seir lol ddar bbeix gger niazzir; Sarloxr ddei ssormaer Mirjiaxr ddux lei a yar leil zi lei a bbeix:

“Yirsaexllixl su ddei zzirmar ddei, eilni yarzi middarzza bbe mar! Yar eilni yar woxrke vaervaerpor mel leil vissersu ssormaer mel meixsaer qir leil xilbbeir-vunaexmo, aelgaxr su ca ar te a xilbbeir-vunaexmo halmel sael a nga.”

²¹ Yel Daxlweixl Mirjiaxr leil bbeix: “Ngo mel Yihexrhuaxr meixsaer qir leil huade tiuxl. Yihexrhuaxr mel ngo leil tiur ho a; niabbor nei niabbor hhexr leil zzirmar nr bei lol a, ngo leil Yihexrhuaxr ddei cassor-worssor Yirsaexllixl su ca ddei zzirmar bei lol, yel ngo Yihexrhuaxr meixsaer qir leil huade tiuxl nia. ²² Ngo gielgiel armael leil mi-nr-ddux lol nia, armael leil i mu nr gger nia. Nael ni bbeix dae ca leil vissersu ssormaer mel zzael, ngo leil i du var,” eine bbeix a. ²³ Yel Sarloxr ddei ssormaer Mirjiaxr mel, si lozzetze lei ssormine nr hier.

^e6:14 yirfuxrdaexr xiux Yirfuxrdaexr xiux mel guaxlguaxl sael a ar xiux a. Eil xiux leil mel balsixr ceinir taex hha gex dae. Eil ceinir taex mel Yirsaexllixl su ceinir cuxr leil bbeix.

Arbosobo Naxrda Leil Sser Dae A Daxlweixl Dax Bbeix Har Zaxr

7¹ Zzirmar Daxlweixl mel, zzirmar hher ggie xi gga hher dae. Yihexrhuaxr yar leil zzasoso a nga lol a, zaza-lili yar leil dirsu ca mel leil yar leil nr ddaexr lei lol. ² Zzirmar ddei xiezi Naxrda leil bbeix: “Eilcar ni ardae i, ngo mel xiabaexr zzei sser a zi teixl lei zzirmar xi gga hher dae. Arbosobo ddei yueguixl ddei zzael, zaxlpoxr gga dol dae.” ³ Naxrda zzirmar ddei leil bbeix: “Yihexrhuaxr mel ni dax hher dax dae, yel ni, ni nixmox zzar xiar dae maelmaerjjia dax zox dae a bei ssi ddo.” ⁴ Nael hal cir xixlmei, Yihexrhuaxr Naxrda dax ddar biar a bbeix: ⁵ “Ni ssi a, ngo leil vissersu Daxlweixl leil bbeix, Yihexrhuaxr bbeix: ‘Ni arsaе ngo leil xi zi gger a, ngo leil hher lol cexr bbeixleir?’ ⁶ Ngo Yirsaexllixl su ca mel leil Aezixr goxrjia gga hier teixl lei cirdae a eilni zzeze ci a lei, ngo zeixleixr lei xi gga hher nr goxr, zoxlzoxl a zaxlpoxr gga hherdder Sexlmuxl gga hher dae a, cirmaex-hanga ba mal. ⁷ Ngo Yirsaexllixl su ca mel dax cirgo a cirmaex-hanga ssi za car, ngo zeixleixr lei ngo ddei cassor-worssor mel leil guaxrsu ngo tiur teixl lei vaervaerpor mel leil, arsaenga a xiabaexr zzei sser a ngo leil xi zi nr gger biex nr goxr.’

⁸ Eilcar ni ngo leil vissersu Daxlweixl leil bbeix, meixr hazza leil guaxrsu Yihexrhuaxr bbeix: ‘Ngo ni leil acixl ya loxlbbae gga ae teixl lei a, ni leil acixl ya cir dax nr mae lol, ngo ddei cassor-worssor Yirsaexllixl su ddei zzirmar bei lol. ⁹ Ni arddol ssi zzorbbeixlei, ngo ni dax cirgo a hher dae, ni leil dirsu maelmaerjjia leil bei zil gger; halae ngo ni leil yarzi middux lol, hherdder middurbbor yarzi middux ca mel sael a nga. ¹⁰⁻¹¹ Ngo lei ngo ddei cassor-worssor Yirsaexllixl su ca mel leil middei ar ddei tiur gger a, yaa leil halmaex hher dae lol nia; yaa leil yaa armael ddei middei gga hher dae lol a, zeixleixr cor lei su nr zza lol nia. Ngo halleix vaervaerpor mel leil miardal a ngo ddei cassor-worssor mel leil guaxr lol car sael a, nixmox neix su mel leil yaa leil ci lol nr var a. Ngo ni leil zzasoso a hher dae lol a, ni leil dirsu maelmaerjjia lei ni leil cor lei nr var a. Halae ngo ni leil bbeix gger, ngo ni leil jiaddex-hhexrddex gger nia. ¹² Ni ddei nixixl ddei ci a, ni, ni ddei porpor mel dax cirgo a hher dae car, ngo ni giedae ca ddei leil ni dirtu bei lol nia, ngo yar ddei goxr ddei leil zza doxr dae lol nia. ¹³ Yar ngo ddei mi ddei leil weix a, ngo leil xi zi gger nia. Ngo yar ddei goxr ddei leil arddolcar ci a lei zza doxr dae lol nia. ¹⁴ Ngo yar ddei arbbor bei nia; yar ngo ddei ssor bei nia. Yar zuixl bei arddeirnga a, ngo

ca ddei zzargger sser a yar leil deil nia, ca mel ddei lorddu sser a yar leil deil nia.^f

¹⁵Nael ngo yar leil perniar dae mel yar dax bbe kae nixixl nr zza, ni xilmeir leil zzirmar nr bei lol Sarloxr ddei sael a, yar leil zzirmar nr bei lol eine nr var. ¹⁶Ni ddei ake hhexr nei ni ddei goxr ddei, ngo meixsaer qir leil arddolcar ci a lei zza doxr dae nia. Ni giedae ca mel arddolcar ci a lei zzirmar bei nia.”

¹⁷Naxrda dder ddar maelmaerjia dax zox dae nei Yihexrhuaxr yar leil saexl lol hazza dax zox dae a, Daxlweixl leil biar gger.

Daxlweixl Arbosobo Dax Ddar Biar Nei Yar Leil Nawo

¹⁸Yel zzirmar Daxlweixl ddir a, Yihexrhuaxr meixsaer qir leil cux dae a bbeix: “Seirpor Yihexrhuaxr, ngo arseir a leir? Ngua hhexr azo suax bbeixleir, ni halae ngo leil einezeixl goxr ci lol? ¹⁹Seirpor Yihexrhuaxr, eil ddei ni meixddur gga i dae a mel, miar yelye a cir ddei a. Ni lei ngua⁹ ake hhexr arddolcar a arsae nga var biar ci a. Seirpor Yihexrhuaxr, holbbaexl eil ddei mel ca mel zoxlzoxl a pex dae var a ngo? ²⁰Seirpor Yihexrhuaxr, ngo halae ni dax azo ddar bbeix ddu zza bbeixleir? Ni mel ngo^h leil saexl. ²¹Ni miar vaervaer eil ddei bei a ngoⁱ leil saexl lol a mel, ni ddar bbeixharzaxr goxr nei ni nixmox zzar xiar dae mel dax zox dae a nga arddeir a. ²²Seirpor Yihexrhuaxr, ni mel vaervaer ddei nga a. Ngua nolba gga bbejjiur wo mel, ni sael a ar ddei nr zza. Ni nrnga a mel, zeixleixr lei Arbosobo ar ddei nr zza a. ²³Middurbbor arddol cuxr ni ddei cassor-worssor Yirsaexllixl su ca mel sael a nga bbeixleir? Ni yaa leil vae xixl lei a, yaa leil ni ddei cassor-worssor bei lol a, ni ddei mi ddei leil middux lol. Ni Aezixr goxrjia gga vae xixl lei ni ddei cassor-worssor mel meixsaer qir leil, ni ddei middei mel leil weix a yarzi vaer yarzi iduddo bei a,

^f7:14 Yar zuixl bei arddeirnga a, ngo ca ddei zzargger sser a yar leil deil nia, ca mel ddei lorddu sser a yar leil deil nia. Ddar eil qir TCV ber gga eine bbeix: “Yar bei cox arddeirnga a, ngo yar leil faxr var; arbbor armael ddei ssor ddei leil faxr sael a nga.”

⁹7:19 ngua Xiboxrlaexr ddar gga eilmaex gga mel “ngua” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngua” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^h7:20 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

ⁱ7:21 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

kebal cuxr ca mel leil nei yaa zi dae mel leil ggaxr pixl gger. ²⁴ Ni Yirsaexllixl su mel leil, arddolcar ci a lei ni ddei cassor-worssor bei lol. Yihexrhuaxr, ni lei yaa ddei Arbosobo bei a.

²⁵ Arbosobo Yihexrhuaxr, ni ngo dax nei ngua ake hhexr dax^j bbeix goxr ddar mel, arddolcar ci a lei vever a zza dae lol a, ni bbeix dae ddar mel sael a bei.

²⁶ Eine nga a, ca mel dder arddolcar ci a lei ni ddei mi ddei leil vaer zzir ddei a i mal gger var. Ca mel leil ‘Meixr hazza leil guaxrsu Yihexrhuaxr mel Yirsaexllixl su ca mel leil guaxrsu Arbosobo ddei a,’ eine bbeix lol nia, halae ngua ake hhexr^k ni meixsaer qir leil vever a zza dae lol nia. ²⁷ Meixr hazza leil guaxrsu Yirsaexllixl su ddei Arbosobo Yihexrhuaxr, ni mel ngo^l leil saexl lol a bbeix: ‘Ngo ni leil jiaddex-hhexrddex gger nia’ bbeix goxr a. Yel ngo dder nixmox vaervaermo ni dax eine ddar biar.

²⁸ Seirpor Yihexrhuaxr, ni mel Arbosobo a. Ni ddei ddar mel yarzi a. Ni lei seirseir eilmel ngo^m leil gger nia bbeixharzaxr goxr a. ²⁹ Eilcar ni leil qiuxr, ngua ake hhexr leil seir lol a, arddolcar ci a lei ni meixsaer qir leil zza doxr dae lol la. Seirpor Yihexrhuaxr, eil ddei mel ni bbeix har goxr a; ni arddolcar ci a lei ngua ake hhexr leil seir lol la!” eine bbeix a.

^j7:25 ngo dax nei ngua ake hhexr dax Xiboxrlaexr ddar gga eilmaex gga mel “ngo” bbeix nr nga; “ngua” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^k7:26 ngua ake hhexr Xiboxrlaexr ddar gga eilmaex gga mel “ngua ake hhexr” bbeix nr nga, “ni leil vissersu Daxlweixl hhexr” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^l7:27 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^m7:28 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

Yihexrhuaxr Daxlweixl Leil Bei Leixl Lol

8¹ Eine goxr ho a, Daxlweixl Feilixlsixl su ca mel leil ddaexr a, yaa leil ddaexr leixl gger a, yaa leixrga gga goxrjia leil guaxr quexrlixl ddeiⁿ su si lei a. ² Yar yoxl Moxrya su ca mel leil ddaexr a, yaa leil ddaexr leixl gger a, yaa leil middur ddei leil yixr dae lol a, baezo sser a arleixr liaxr. Nr zex ddei gga ca mel leil nael seixl zil gger; cir zex ddei gga ca mel leil nael gol dae lol.^o Yel Moxrya su ca mel dder Daxlweixl leil vissersu bei a, yar leil zzirmar mel leil gger labox zzaegu mel gger.

³ Sorba zzirmar Lixlhexr ddei ssor Hadaxldirxixl mel Yofaladir lazzarmo dax halpiar a gga ddaexr mal a, yar ddei goxrjia leil guaxr quexrlixl ddei su xixl lei niazzir. Daxlweixl dder yar leil ddaexr a, ⁴ yar ddei mur zzaer su meixr cirdu sirxiu nei jjiimo ssi su meixr nrmeir (20,000) ssu si a; zaxlddaexrddu marcae gga dae mur mel leil, zzur taexl te gger, nael marcae cirxiu jiaxl gga meirne mur dol dae.

⁵ Daxlmarsixlgexr mermi gga Yallaxr su ca mel Sorba zzirmar Hadaxldirxixl leil beijjiu lei a, Daxlweixl dder Yallaxr su ca nrmeir nrdu (22,000) seixl zil gger a.

⁶ Yel Daxlweixl dder Daxlmarsixlgexr mermi Yallaxr zzi gga meixr hher ggie bei. Yallaxr su ca mel dder Daxlweixl leil vissersu bei a, yar leil zzaegu gger. Daxlweixl arddolmaex ssi lei, Yihexrhuaxr yar leil bei leixl lol. ⁷ Daxlweixl Hadaxldirxixl woxrke vaervaerpor mel ddei, sae bei teixl lei duixlpaexr mel su si a, Yiluxlsaler zzi gga vei mal. ⁸ Zzirmar Daxlweixl yoxl Hadaxldirxixl guaxr dae Birta nei Birloxrta zzi gga zzir cirke su si lei a.

⁹ Hamar mermi ddei zzirmar Toxryir mel, Daxlweixl Hadaxldirxixl ddei meixr circir-lorbba leil ddaexr leixl gger a bbejjiur a dder, ¹⁰ yar ssor Yuelaxr leil miardal a, zzirmar Daxlweixl leil i ssi lol a, yar leil zzasoso dae biex, yar leil seir lol; eil ddei mel Daxlweixl Hadaxldirxixl leil ddaexr leixl gger a nga arddeir a. Halleix Toxryir nei Hadaxldirxixl yaa nrmel mel zoxlzoxl a zaxlddaexr. Yuelaxr piu, sae, zzir sser a bei teixl lei zzaegu armel vei si lei a. ¹¹ Zzirmar Daxlweixl dder zzaegu eilmel nei yar ddaexr leixl gger goxrjia mel gga vei si lei piu sae mel, kebal halmel dax bbe teixl lei a, Yihexrhuaxr leil gger. ¹² Hherdder Yallaxr su ca, Moxrya su ca, Yalmae

ⁿ8:1 goxrjia leil guaxr quexrlixl ddei Xiboxrlaexr ddar sser a vaexr beil ber leil “goxrjia leil guaxr quexrlixl” bbeixsael “zzi zoxlyoxl zzir ddei leil guaxr quexrlixl” a vaexr qi-nr-cur.

^o8:2 Nr zex ddei gga ca mel leil nael seixl zil gger; cir zex ddei gga ca mel leil nael gol dae lol. Yilsi mel dder ca so fel ddei gga nr fel leil mel seixl zil gger a.

su ca, Feilixlsixl su ca nei Yalmarlixl su ca mel dax vei si lei, halae Sorba zzirmar Lixlhexr ddei ssor Hadaxldirxixl dax su si lei mel nga a.

¹³ Daxlweixl Cor Lagiex gga Yirdo su ca cirmeir heixldu (18,000) seixl zil gger a, yar jjixr lei a dder middux zildu a. ¹⁴ Yar yoxl Yirdo mermi cirmaex-hanga meixr hher ggie bei, Yirdo su ca mel dder maelmaerjjia Daxlweixl leil vissersu bei a. Daxlweixl arddol ssi lei, Yihexrhuaxr yar leil bei leixl lol.

¹⁵ Yel Daxlweixl Yirsaexllixl su ca maelmaerjjia ddei zzirmar bei, Daxlweixl bbaehhexhhexmo hoxrhoxrmo ca maelmaerjjia leil guaxr. ¹⁶ Xirluryar ddei ssor Yueya meixrguaxrsu vaervaerpor bei; Yalxilixl ddei ssor Yuesafaxr goxrjia gga arsae-lerler nga vaexr zei lei dae mel leil guaxrsu bei. ¹⁷ Yalxitu dei ssor Sardu nei Yalbiryalta ddei ssor Yalximirlexl Arbosobo leil zi su bei; Xilaexryar suzixl bei; ¹⁸ Yihexryidaxl ddei ssor Birnaxryar Zilixltixr su ca nei Birlixltixr su ca mel leil guaxr. Daxlweixl ddei ssor mel Arbosobo leil zi su bei.

Daxlweixl Mifeibosaexl Leil Yarzi Seir

9¹ Cir ni a, Daxlweixl biex a bbeix: “Sarloxr hhexr halae gol dae ca zzazza seir? Ngo Yuenaxrda leil i dae a, yar leil seir lol nia,” eine bbeix a. ² Sarloxr hhexr leil miar bei gger su ca ar ddei zza, yar leil Xirba mi. Ca mel yar leil zzirmar Daxlweixl dax ae si lei a, zzirmar ddei yar leil biex a bbeix: “Ni Xirba nga nga?” Yar ddarkoxl a bbeix: “Nga a mar.” ³ Zzirmar ddei biex a bbeix: “Sarloxr hhexr halae gol dae ca zza zza seir? Ngo Arbosobo ca leil perniar mel dax zox dae a yar leil seir lol nia.” Xirba zzirmar ddei leil bbeix: “Halae Yuenaxrda ddei ssor ar ddei zza seir, yar qihher nr bbor jjia lei pirdael dae.” ⁴ Yel zzirmar ddei yar leil bbeix: “Yar arddolmaex hher dae?” Xirba ddarkoxl a bbeix: “Yar Loxrdirba mermi Yalmirlixl ddei ssor Marjixr hhexr ake hher dae.” ⁵ Yel zzirmar Daxlweixl ca leil miardal a, Loxrdirba mermi Yalmirlixl ddei ssor Marjixr hhexr ake gga, yar leil ae si lei lol. ⁶ Sarloxr ddei lilbol Yuenaxrda ddei ssor Mirfeibosaexl Daxlweixl dax lei a, qiaxrmeix ddei middur leil puxr gex dae a cizixl gger. Daxlweixl bbeix: “Mirfeibosaexl!” Yar bbeix: “Ni leil vissersu ddei eilmaex hher dae.” ⁷ Daxlweixl bbeix: “Ni gexr nr ssa, ngo niabbor Yuenaxrda leil i dae a, ni leil seir lol nia. Niabo Sarloxr ddei mi hazza ni leil koxl gger nia, ni lei zoxlzoxl a ngo dax cirgo a zzo zzor cexr.” ⁸ Mirfeibosaexl yoxl cizixl gger a bbeix: “Ngo azo suax bbeixleir? Anol sima sael a nga, zzirmar, ni halae ngo leil einezeixl zoxlnixr!”

⁹ Giedae zzirmar ddei Sarloxr leil miar bei gger su Xirba leil ae si lei a bbeix: “Ngo mel Sarloxr ddei hazza nei yar ake hhexr ddei hazza lei ni seirpor ddei lilbol leil koxl gger ho a. ¹⁰ Ni nei ni ddei ssor mel, halae ni leil miar bei gger su mel, ni seirpor ddei lilbol Mirfeibosaexl leil mi paxr gger nia. Paxr teixl lei mel vei si lei a, yar leil zzor lol nia. Ni seirpor ddei lilbol ddei lei zoxlzoxl a ngo dax cirgo a zzo zzor nia,” eine bbeix a. Xirba mel ssor ceingormo zza, miar bei gger su nrzeimo zza. ¹¹ Xirba mel zzirmar ddei leil bbeix: “Ha ngo ddei seirpor ngo ddei zzirmar ngo leil miardal dae mel, ngo bei mae nia^P” eine bbeix a. Mirfeibosaexl mel zzirmar ddei ssor sael a, zzirmar Daxlweixl dax cirgo a zzo zzor. ¹² Mirfeibosaexl mel ssor yelye ar ddei zza, yar leil Mirjia mi. Ha Xirba hhexr ake hher dae ca mel dder Mifeibosaexl leil miar bei gger su bei a. ¹³ Yel Mirfeibosaexl Yiluxlsaler zzi

^P9:11 ngo leil miardal dae mel, ngo bei mae nia Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

gga hher dae a, zoxlzoxl a zzirmar dax cirgo a zzo zzor. Yar qihher nr bbor jjia lei pirdael dae.

Yalmae Su Ca Nei Yallaxr Su Ca Mel Leil Ddaexr Leixl Gger

10¹ Eine goxr ho a, Yalmae su ca ddei zzirmar si a, yar ssor Hanexl yar dirtu zzirmar bei. ² Daxlweixl bbeix: “Ngo Hanexl yarbbor Naxrxiaxr ngo leil perniar a seirseir meixl gger dae mel dax zox dae a, Hanexl leil perniar a seirseir meixl gger nia,” eine bbeix a. Yel Daxlweixl dder yar woxrke vaervaerpor mel leil miardal a, Hanexl yarbbor si a Hanexl leil quex ssi lol. Daxlweixl woxrke vaervaerpor mel Yalmae su ca mel hher ggie ssi ci a; ³ Yalmae su ca mel ddei vaervaerpor mel zzael, yaa ddei seirpor Hanexl leil bbeix: “Daxlweixl ca leil miardal si lei a, ni leil quex lei a, ni zzirdae a, yar niabbor leil i du arddeir a ngo? Yar, yar woxrke vaervaerpor mel leil miardal si lei a mel, nrnga seirseir a ker i lei a, zzi eil ddei leil bei xiaxr gger lei arddeir a zzarmar?” eine bbeix a.

⁴ Hanexl dder Daxlweixl woxrke vaervaerpor mel leil ssu gex du lei a, yaa ddei bborvu mel ar peix cox pixl gger, yoxl yaa veixr dae pia xiux jiasibbor zixl caer pixl gger a, sirddurbex do ddux dae lol a, yaa leil jjixr lol. ⁵ Ca mel Daxlweixl leil bbeix gger a. Ca eilmel mel yarzisael seixlda a, yar dder ca leil miardal a yaa leil zi ssi lol. Zzirmar Daxlweixl bbeix: “Nia Yilixlge zzi gga hher dae ddo, bborvu ner du lei a saelnei jjixr lei,” eine bbeix a.

⁶ Yalmae su ca mel yaa Daxlweixl leil de dae a saexl a, yel dder ca leil miardal a, Boxr-Lixlher zzi gga Yallaxr su ca mel gga nei Sorba zzi gga Yallaxr su ca mel gga, jjiumo ssi su meixr nrmeir (20,000) zo si lei lol, halae Marjia zzirmar ddei ca cirdu (1,000) nei Toxrboxr su ca cirmeir nrdu (12,000) zo si lei lol. ⁷ Daxlweixl bbejjiur a dder Yueya leil miardal a, meixr yarzi sexr maelmaerjjia leil hier dae a, ddux lol. ⁸ Yalmae su ca mel ddux lei a, zzi gielmi dax zaxlddaexr a arsae ddaexr nia ngier har dae. Sorba zzi gga nei Lixlhexr zzi gga Yallaxr su ca, Toxrboxr su ca nei Marjia su ca mel nael, armael ddei armael zzi maelleil mipaerbbae gga zaxlddaexr a arsae ddaexr nia ngier har dae.

⁹ Yueya yaa leil dirsu mel yar xilmeir giedae lei zaxlddaexr a arsae ddaexr nia ngier har dae ggie mia a, yar dder Yirsaexllixl su meixr mel gga yarzi sexr mel leil tiur teixl lei a, yaa leil Yallaxr su ca mel dax mal dae a, zaxlddaexr a arsae ddaexr nia ngier har dae lol. ¹⁰ Kebal meixr mel nael yar nimar Yalbirsae leil jia gger a, Yalmae su ca mel dax mal dae a, zaxlddaexr a arsae ddaexr nia ngier har dae lol. ¹¹ Yueya Yalbirsae leil bbeix: “Yallaxr su ca mel ngo leil sexr leixl arddeirnga a

nael, ni dder ngo leil beijjiu lei; Yalmae su ca mel ni leil sexr leixl arddeirnga a nael, ngo dder ni leil beijjiu ssi. ¹² Niul hhel du lei nia, niul ddei cassor-worssor mel leil nei niul ddei Arbosobo ddei zzi mel leil weix a capormar bei nia. Yihexrhuaxr leil yar i dae a seir mel dax zox dae a bei lol nia,” eine bbeix a.

¹³ Yel Yueya nei yar dax mae dae su ca mel ssi a, Yallaxr su ca mel leil ddaexr ssi, Yallaxr su ca mel dder Yueya meixsaer qir leil pa du si a. ¹⁴ Yalmae su ca mel Yallaxr su ca mel pa du si a mia a, yaa lei Yalbirsae meixsaer qir leil pa a zzi gga ddir a. Yueya dder Yalmae su ca mel dax nr hher, Yiluxlsaler zzi gga jjixr a.

¹⁵ Yallaxr su ca mel Yirsaexllixl su ca mel yaa leil ddaexr leixl gger a mia a, yoxl cirgo a hher pex. ¹⁶ Hadaxldirxixl ca leil miardal a, Yofaladir lazzarmo hal bbu leil hher dae Yallaxr su ca mel leil ae si lei lol. Yaa Xilaxr mermi ssi ci a, Hadaxldirxixl ddei meixr guaxrsu vaervaerpor Soxlfaxr yaa leil hier dae. ¹⁷ Ca mel Daxlweixl leil bbeix gger a, yar Yirsaexllixl su ca maelmaerjjia leil ae pex du lei a, Yuedaxl lazzarmo leil gger a, Xilaxr mermi lei ci a. Yallaxr su ca mel zaxlddaexr a arsae ddaexr nia ngier har dae a Daxlweixl dax zaxlddaexr. ¹⁸ Yallaxr su ca mel Yirsaexllixl su ca mel meixsaer qir leil pa du si a. Daxlweixl Yallaxr su ddei zaxlddaexrddu marcae ggaxr su meixr sirxiu (700) seixl zil gger, mur zzaer su meixr limeir (40,000) seixl zil gger, yoxl Yallaxr su ddei meixr guaxrsu vaervaerpor Soxlfaxr leil seixl zil gger a. ¹⁹ Hadaxldirxixl woxrke zzirmar maelmaerjjia, yaa Yirsaexllixl su ca mel dax ddaexr wor nr xie a mia a dder, Yirsaexllixl su ca mel dax tor xixl a, yaa leil vissersu bei a. Yel Yallaxr su ca mel dder zeixleixr Yalmae su ca mel leil beijjiu nr bel a.

Daxlweixl Nei Baxrsixlba

11 ¹ Cir koxl goxr jjia ho a, zzirmar mel zaxlddaexr ssi zi ci a, Daxlweixl Yueya leil miardal a, yar woxrke vaervaerpor mel leil nei Yirsaexllixl su meixr mel leil hier dae lol a ddaexr ssi lol. Yaa Yalmae su ca mel leil ddaexr leixl gger, halae Laba zzi ddei leil weixr gex du lei a. Daxlweixl zzael Yiluxlsaler zzi gga hher dae.

² Cir ni a, merni lal car, Daxlweixl yixrgguci leil ha du lei a, zzirmar hher ggie xi zzir ddei xipaebbor^q ssi za dae. Yar xipaebbor dax halmaex i teixl a ssormaer ar ddei a ggecir cir dae ggie mia a; ssormaer eil ddei mel yarzi zae ar ddei a.

³ Yel Daxlweixl dder ca leil miardal a ssormaer hal ddei arseir a biex ssi lol. Ca ar ddei a bbeix: “Yar mel Yirlixr ddei ssormaer, Hexl su ca Vulixlyal ddei maerssor Baxrsixlba a.” ⁴ Yel Daxlweixl dder ca leil miardal a, ssormaer hal ddei leil zi si lei lol. Yar lei ci a Daxlweixl yar dax naer a; Giedae yar dder ake jjixr a. Halcar yar jiajia ggecirzza nor a leiddur dax zox dae a seibeix lol ho a ngaseir. ⁵ Yel yar aniuxniar a, ca leil miardal a Daxlweixl leil bbeix gger ssi lol a bbeix: “Ngo aniuxniar a.”

⁶ Yel Daxlweixl ca leil miardal a, Yueya dax ssi lol a bbeix: “Ni Hexl su ca Vulixlyal leil miardal a, ngo dax eilmaex lei lol.” Yueya dder Vulixlyal leil miardal a, Daxlweixl dax ssi lol a. ⁷ Vulixlyal Daxlweixl dax ssi ci a, Daxlweixl yar leil Yueya nei meixr mel seirseir dae biex, yoxl zaxlddaexr ggie arsaesael nga biex.

⁸ Daxlweixl Vulixlyal leil bbeix: “Ni ake ze i jjixr a qihher cir^s jjixr ddo a” bbeix a, Vulixlyal dder zzirmar ddei hher ggie ddux a; giedae zzirmar ddei ca leil miardal a yar leil zzor ddu ar fel ho mal gger lol. ⁹ Nael Vulixlyal zzael yar seirpor^t leil alddur su gger su mel dax cirgo a zzirmar hher ggie ggucirmi xixl dae lalnga, ake ze i nr jjixr. ¹⁰ Ca mel Daxlweixl leil bbeix gger a bbeix: “Vulixlyal yar ake ze i nr jjixr.” Daxlweixl Vulixlyal leil biex a bbeix: “Ni vimirmirmo jjixr lei mel, arsaenga a nia ake ze i nr jjixr neil?” ¹¹ Vulixlyal Daxlweixl leil bbeix: “Yueguixl nei Yirsaexllixl su ca, halae Yoxrdaxl su ddei meixr mel lei zaxlpoxr daxr ggie hher dae. Ngo seirpor Yueya nei ngo seirpor dax mae dae su mel lei mipaerbbae gga meixr hher ggie hher dae. Ngo arsae ake jjixr a, zzor jjixr dda jjixr nei ngo maerssor dax naer jjixr

^q11:2 xipaebbor Yaa ddei xipaebbor mel mel bbaelerlermo armel a.

^s11:8 qihher cir Eilmaex gga ddei yilsi mel dder wornol.

^t11:9 seirpor Eilmaex gga “seirpor” ddei mel, zzirmar Daxlweixl leil bbeix.

cexr bbeixleir? Ngo ni meixsaer qir leil bbeixharzaxr bel, ngo arsae bei lei eine nr bei!” ¹² Giedae Daxlweixl Vulixlyal leil miardal a bbeix: “Eilni ni jianiexr eilmaex gga hher dae; arggeni ngo ni leil ssi lol.” Yel hal cir ni nei giedae cir ni lei Vulixlyal Yiluxlsaler zzi gga hher dae a. ¹³ Daxlweixl Vulixlyal leil ae si lei a, yar meixsaer qir leil zzor lol, dda lol a, yar leil ddayixr lol. Eilmerxixl ci a, Vulixlyal ddux a, yar seirpor Yueya dax mae dae su ca mel dax cirgo a xixl dae a; halae yar ake zei nr jjixr.

¹⁴ Giedae cir nehe Daxlweixl Yueya leil xil vaexr gger a, Vulixlyal leil jia gger a, vei si lol. ¹⁵ Xil gga vaexr dae a bbeix: “Ni Vulixlyal leil miardal a zaxlddaexr larhor zzir ggje halmaex ddaexr ssi lol, nia nael tuixl xixl lei a yar leil ddaexr zil lol,” eine vaexr dae. ¹⁶ Yueya zzi mel leil i za dae a, yaa leil dirsu ca mel gga zaxlddaexr sexrsexr ca mel arddolmaex hher dae saexl a dder, Vulixlyal leil halmaex miardal mal. ¹⁷ Zzi gga ca mel ddux lei a Yueya dax zaxlddaexr a, Daxlweixl dax mae dae su ca nnelael ddaexr zil gger a; Hexl su ca Vulixlyal lei si a.

¹⁸ Giedae Yueya dder ca leil miardal a, zaxlddaexr ggje arsae-lerler nga hazza Daxlweixl leil bbeix gger ssi lol. ¹⁹ Yoxl ddar bbeix gger su ddei leil miardal a bbeix: “Ni zaxlddaexr ggje arsae-lerler nga hazza zzirmar ddei leil bbeix gger ho a, ²⁰ zzirmar ddei seifu faex a ni leil biex a bbeix: ‘Nia zaxlddaexr a arsaenga a zzi ddei dax naelnaer a ssi neil? Holbbaexl nia leil dirsu ca mel zzi weixrqiexr leil jir ddaexr zei lei var nia nr saexl a ngo?’ ²¹ Halleix Yiluxlbirsaexl ddei ssor Yalbirmirlexl leil deil zil gger su ddei arseir a neil? Nrnga ssormaer ar ddei a zzi weixrqiexr leil ngerpe ar ddei piar zei lei a, yar ggecir leil deil gex dae a, yar dder Tixrbeixlsi mermi si zil dae a zzarmar? Nia arsaenga a zzi weixrqiexr dax naelnaer a ssi neil?’ eine bbeix arddeirnga a, ni dder ‘Zzirmar, ni leil visser su Hexl su ca Vulixlyal lei si a,’ eine bbeix nia.”

²² Yel ddar bbeix gger su ddei ddux a, Daxlweixl leil i ssi a, Yueya yar leil miardal dae maelmaerjjia Daxlweixl leil bbeix gger a. ²³ Ddar bbeix gger su ddei Daxlweixl leil bbeix: “Ngualeil dirsu mel ngua leil sexr leixl, yaa mipaerbbae gga ddux lei a, ngua leil ddaexr lei. Nael ngua yaa leil ggaxrmae a, zzi gielmi dax ggaxr xixl gger ci a. ²⁴ Giedae jir ddaexr su mel zzi weixrqiexr leil jir ddaexr zei lei a, ni leil vissersu mel leil ddaexr a, nnelael ddaexr zil gger a; ni leil vissersu Hexl su ca Vulixlyal lei si a.” ²⁵ Daxlweixl ddar bbeix gger su ddei leil bbeix: “Ni Yueya leil bbeix gger a bbeix: ‘Eil ddei leil zzasol nr ssa, altor baex ca eil ddei leil bbeixsael

ca hal ddei leil lei seixl zil gger var. Ni zabbar-seilseir a zzi ddei leil ddaexr a zzi ddei ddaexr zei gger a dder ddo a.' Ni ddar eilmel bbeix a, Yueya leil nixmox dder vaer," eine bbeix a.

²⁶ Vulixlyal ddei maerssor, yar capor Vulixlyal si a bbejjiur a dder yar leil aenge gger. ²⁷ Aenge nixixl ddei goxr ho a, Daxlweixl ca leil miardal a yar leil zzirmar hher ggie xi gga zi si lei lol a, yar dder Daxlweixl ddei maerssor bei a, Daxlweixl leil ssor ar ddox xiu gger a. Nael Daxlweixl bei dae eil ddei, Yihexrhuaxr meixddur gga i dae a mel nr seir.

Naxrda Daxlweixl Leil Bota Nei Daxlweixl Huixrsoxr

12¹ Yihexrhuaxr Naxrda leil miardal a Daxlweixl leil i ssi lol. Naxrda Daxlweixl dax ssi ci a yar leil bbeix: “Zzi ar ddei gga a, ca nnel zza, cir ddei a nael, cabessor; cir ddei a nael, casolssor.”² Cabessor ddei mel niur nei acixl ya daxlgaxl-daxlixl cirke zza.³ Casolssor ddei nael, vae si lei a zeil dae yamodossor hal ddei leil cuxrteixl a, azo lei nr zza. Ya eil ddei mel yar ake gga, yar ddei aniux mel dax cirgo a vaer du lei, yar zzor dae mel zzor, yar dda dae mel dda, yar xilbebbor dax yixr. Yar i dae a, yar ddei ssormaer sael a nga.⁴ Seivi ar ddei a cabessor hhexr ake lei ci a; cabessor ddei armael ddei niur cir nei acixl ya cir gga zzael, ar ddei gga si lei a, seivi ddei leil bei zol nr vixr; casolssor ddei ya ddei zzael, gga si lei a seivi leil bei zol.”⁵ Daxlweixl dder ca hal ddei leil yarzisael seifu faex a Naxrda dax bbeix: “Ngo, arddolcar ci a lei gol dae Yihexrhuaxr meixsaer qir leil bbeix, eine bei su ca ddei si mibbe!”⁶ Yar eine bei a mel, nixmox zzar ca leil zoxlnixr nr saexl. Yel yar arsae bei lei ya li peix meirne koxl gger nia.”

⁷ Naxrda Daxlweixl leil bbeix: “Ni hherdder ca hal ddei nga a. Yirsaexllixl su ddei Arbosobo Yihexrhuaxr bbeix: ‘Ngo ni leil ssuvi dox deix gger a, Yirsaexllixl su ddei zzirmar bei lol, ni leil Sarloxr ddei leixrga gga jiuxl teixl lei;’⁸ ngo ni seirpor ddei goxr ddei ni leil gger, ni seirpor ddei maerssor mel ni leixrga gga jia ji gger, yoxl Yirsaexllixl nei Yoxrdaxl hhexr ni leil gger; ni zzirdae a halae nr loxr arddeirnga a, ngo zeixleixr ni leil hormo peix nei meirne gger var.”⁹ Ni arsaenga a Yihexrhuaxr ddei ddar mel leil i zeil a, yar i dae a, yarzi nr seir halmel bei neil? Ni Yalmae su ddei altor sser dae a hexl su ca Vulixlyal leil seixl zil gger, yoxl yar maerssor leil bbeix si lei a ni maerssor bei lol.¹⁰ Ni mel ngo leil i zeil a, Hexl su ca Vulixlyal ddei maerssor leil ni maerssor bei lol, yel ni ake hhexr arddolcar ci a lei altor mel leil pato nr xie.’¹¹ Yihexrhuaxr bbeix: ‘I ddo a! Ngo ni ake gga larhorhormo nr seir ddux lei lol a, ni leil dir; ngo ni meixsaer qir leil ni ddei maerssor mel si leil gger, yar daxmeix yaa dax naer.’¹² Ni arjjiuljjiu a eilmel bei, nael ngo Yirsaexllixl su ca maelmaerjgia meixsaer qir leil daxmeix eine bei nia.’ ”¹³ Daxlweixl Naxrda dax bbeix: “Ngo Yihexrhuaxr leil de dae a!” Naxrda bbeix: “Yihexrhuaxr ni ddei zuixl mel bei pixl gger ho a; ni si loci nr ssa.”¹⁴ Nael ni eilmel bei a, Yihexrhuaxr leil dirsu mel yar leil daxlgaxl-daxllixl bbeix vuxryixr ggie zza lol, yel ni aniux hier wo ddox arsae bei lei si nia,” eine bbeix a.¹⁵ Giedae Naxrda dder yar ake gga jjixr a.

Daxlweixl Ddei Ssor Si

Yihexrhuaxr mel Vulixlyal ddei maerssor Daxlweixl leil xiu gger anix ddox leil yarzi larhor no lol. ¹⁶ Yel Daxlweixl anix ddox leil weix a Arbosobo leil qiuxr, halae zzor lei nr zzor, yar yixrggie ddir a, cirxixl-lorbba middur ddei leil guir dae. ¹⁷ Yar ake gga yar woxrke vaervaerpor camar mel yar dax lei ci a, yar leil middur ddei leil gga du lei. Nael yar ha du lei nr yuex, yar lei yaa dax cirgo a zzo nr zzor. ¹⁸ Sir ni cir ni ci a, anix ddox si a. Daxlweixl woxrke vaervaerpor mel anix ddox si a yar leil bbeix gger nr bel. Yaa bbeix: “Anix ddox gol dae seir car, niul yar leil quex a lei, yar niul ddei ddir mel leil no-nr-ni mel, anix ddox si a gielgiel niul yar leil bbeix gger nr ddo, nrnga a yar nr seir bei leilei.” ¹⁹ Nael Daxlweixl yar woxrke vaervaerpor mel zzi dax arjiuljjiu a biar ggie mia a dder, anix ddox si a saexl a, yar woxrke vaervaerpor mel leil biex a bbeix: “Anix ddox si ho a ngo?” Yaa bbeix: “Si ho a.” ²⁰ Daxlweixl dder middur leil ha du lei a, ggecir cir, nerxiuxiu mei, pia lael a, Yihexrhuaxr ddei xi gga ddir a yar leil bbeixzae gger. Giedae yar hher ggie jjixr a, ca leil miardal a zzo ho lol a, yar dder zzor a. ²¹ Yar woxrke vaervaerpor mel yar leil biex a bbeix: “Ni eine bei a mel azo yilsi a leir? Anix ddox gol dae seir car zzael, ni zzo lei nr zzor nge doxr; anix ddox si ho a zzael, ni ha du lei a zzo zzor.” ²² Daxlweixl bbeix: “Ngo zzirdae a, Yihexrhuaxr ngo leil zoxlnixr a, nrbbba anix ddox leil nr si lol lei saexl nr ddo, yel anix ddox gol dae seir car, ngo dder zzo lei nr zzor, nge doxr. ²³ Nael eilcar anix ddox si ho a mel, ngo halae nr zzor a azo bei bbeixleir? Holbbaexl ngo yar leil zeixleixr jjixr lei lol cexr a ngo? Ngo yar dax halmaex ssi nia; yar nael, ngo dax eilmaex jjixr lei nr var a.”

Sorloxrmexr Leil Xiu Teixl Lei

²⁴ Daxlweixl yar maerssor Baxrsixlba leil quex, halae yar dax naer a, yar dder ssor ar ddox xiu a, Sorloxrmexr mi gger a. Yihexrhuaxr yar leil perniar a dder, ²⁵ xiezi Naxrda leil sser dae a yar leil “Yidirdiryal^u” mi gger a. Eil ddei mel Yihexrhuaxr leil weix a eine mi arddeir a.

^u12:25 Yidirdiryal Yidirdiryal ddei yilsi mel dder “Yihexrhuaxr yar leil perniar.”

Daxlweixl Laba Zzi Ddei Leil Ddaexr

²⁶ Yueya Yalmae su ca ddei zzi zoxlyoxl zzir Laba zzi ddei leil ddaexr a, zzi ddei leil li si lei a. ²⁷ Yueya ddar bbeix gger su ca mel leil miardal a Daxlweixl leil i ssi lol a bbeix: “Ngo Laba zzi ddei leil ddaexr a, yaa ajjix ddux ggie ddei leil ngo li si lei a. ²⁸ Eilcar, ni ngo hier nr si lei meixr mel leil ae pex a, zzi ddei leil weixr du lei a ddaexr a, li si lei nia. Nrnga a, ngo zzi eil ddei leil li si lei arddeirnga a, ca mel dder ngo ddei mi ddei sser a zzi ddei leil mi gger leilei.” ²⁹ Yel Daxlweixl dder meixr maelmaerjgia leil ae pex a, Laba zzi gga ssi a, zzi ddei leil ddaexr a, zzi ddei leil li si lei a. ³⁰ Yar lei zzirmar oldde leil ddexr labox sae kardu taex su si lei a. Eil taex mel soceingor (35) zi zza, halae balsixr dexl gex dae. Zzirmar oldde leil ddexr labox eil taex dder Daxlweixl oldde leil ddexr gex dae a. Daxlweixl lei zzi gga zzaegu cirke su wo a. ³¹ Yar zzi gga hher dae ca mel leil, yirzi, he lojiax nei goxlcors sser a miar bei lol, halae ngier yoddur gga miar lirlir bei lol; Daxlweixl Yalmae su ddei zzi cirddei-hanga gga ca mel leil lei eilmel sael a bei. Giedae Daxlweixl nei meixr maelmaerjgia dder Yiluxlsaler zzi gga jjixr a.

Axlnextl Nei Tamar

13¹ Eine goxr ho a, sirzzir ar jji ddux lei a:^v Daxlweixl ddei ssor Yasaloxr nimo yarzi zae ar ddei zza, yar leil Tamar mi; Daxlweixl ddei ssor Axlnextl mel Tamar leil lizoxr. ² Tamar mel capor dax naer nr goxr seir ssormaerleixl ar ddei a; Axlnextl i dae a, yar dax azo bei niazzir a lei bei nr cexr, yel Axlnextl yar nimo^w Tamar leil lizoxr a cix no a. ³ Axlnextl mel xiahor-carbeix ar ddei zza, yar leil Yuenaxrdaxr mi; yar mel Daxlweixl yargo Sixlmiryal ddei ssor a. Yar mel yarzi jiuxr ar ddei a. ⁴ Yar Axlnextl leil bbeix: “Zzirmar ddei ssor, ni arsaenga a cir ni bir cir ni leil i sol leir? Ni ngo leil bbeix gger la!” Axlnextl bbeix: “Ngo, ngo nimar Yasaloxr ddei nimo Tamar leil lizoxr a nga arddeir a.” ⁵ Yuenaxrdaxr bbeix: “Ni yixrgguci leil yixr dae a no laexl, niabbor ni leil i lei a, ni dder bbeix: ‘Arbbor, ni leil qiuxr, ngo nimo Tamar leil lei lol a, ngo meixsaer qir leil ngo leil zzor ddu bei gger lol, ngo leil vei zol, ngo leil mia lol a, ngo dder yar leixrga gga zzorddu mel zzi gel lei a zzor cexr,’ eine bbeix nia.” ⁶ Yel Axlnextl dder yixr dae a no laexl a. Zzirmar ddei yar leil i lei a, yar zzirmar ddei leil bbeix: “Arbbor, ni leil qiuxr, ngo nimo Tamar leil lei lol a, ngo meixsaer qir leil ngo leil aba nr pir sael bei gger lol a, ngo dder yar leixrga gga zzi gel lei a zzor cexr,” eine bbeix a.

⁷ Daxlweixl dder ca leil miardal a Tamar hher ggie xi giex gga ssi lol a, Tamar leil bbeix: “Ni niago Axlnextl ake ssi a yar leil zzor ddu bei gger ssi.” ⁸ Yel Tamar dder yargo Axlnextl ake ssi a. Axlnextl mel yixr dae. Tamar nael aba niux a, yar meixsaer qir leil aba bei a, aba kal mi a, ⁹ acae peixl caer dae a yar meixsaer qir leil aba mel dox teixl lei a. Nael yar zzael zzor nr yuex dder a bbeix: “Nia ca maelmaerjjia ngo dax hher nr ssa a! Ddux ddo a!” eine bbeix a, yel ca maelmaerjjia dder yar dax nr hher, ddux a. ¹⁰ Axlnextl Tamar leil bbeix: “Ni zzor ddu mel ngo yixrggie vei dil lei a, ngo ni leixrhher gga zzi gel lei a zzor nia.” Yel Tamar dder yar bei teixl lei aba mel yargo Axlnextl yixrggie vei dil a, ¹¹ aba mel yar dax vei mal a, yar leil zol. Yar dder Tamar leil gga gex dae a bbeix: “Ngo ddei nimo, ni ngo dax naer lei.” ¹² Nael Tamar yar leil bbeix: “Ago, ni ngo leil tor bei yojjar nr gger, Yirsaexllixl su ca mel gga eine bei nr ddo, ni yarzi nr seir eilmel bei nr ddo. ¹³ Ni ngo leil bei yojjar gger a, ngo azo vei a ngo ddei seixldaddu ddei leil bbe gex bbeixleir? Ni lei Yirsaexllixl

^v13:1 sirzzir ar jji ddux lei aYilsi mel dder? sixlqixr ar jji ddux lei a

^w13:2 nimo Axlnextl nei Tamar yaa nr hieni mel, arbbor cir ddei a nga; ama nael nnel a.

su ca mel gga ca medeil loxr a. Ni zzirmar ddei leil qiuxr cexr. Yar ngo leil ni leil nr gger bei nr var,” eine bbeix a. ¹⁴ Nael Axlnexl Tarmar ddei ddar nr no, yar mel bir Tarmar leil worni a, yel yar leil bei yojiar gger a yar dax naer a.

¹⁵ Giedae Axlnexl yar leil yarzisael vuxryixr, yar leil vuxryixr dae mel bir xilmeir yar leil lizoxr dae mel leil lei miur leixl. Yel bbeix: “Ni ha du lei a, guir teixl ddo a!” ¹⁶ Nael Tamar bbeix: “Nr ssa! Ni ngo leil ggaxr teixl gger zuixl ddei bir ni arsaxl bei dae ddei leil lei larhor leixl.” Nael Axlnexl mel yar ddei ddar nr no. ¹⁷ Yel Axlnexl dder yar leil vissersu caleixlssor ddei leil ae si lei a bbeix: “Ssormaer eil te leil ggaxr teixl gger ssi, alddur ggabil a, la gex du lei nia!” eine bbeix a. ¹⁸ Axlnexl leil vissersu ddei dder yar leil ggaxr teixl gger a, alddur ggabil a, la gex du lei a. Halcar Tamar mel pia darsisi ar xiux veixr dae. Capor dax naer nr goxr seir zzirmar ddei ssormaer mel dder eine veixr. ¹⁹ Tamar dder nilme mel oldde leil xiu deix, yar veixr dae pia yarzi naxrcixl yarzi igax zae xiux si bbaer gger a, leixrhher bbor oldde ddei leil deix gex dae a, ho ssi ho waerwaelwaer nge dae.

²⁰ Yargo Yasaloxr yar leil biex a bbeix: “Holbbaexl niago Axlnexl ni dax naer a ngo? Ngo nimo, eilcar ni hoba azo lei bbeix nr ssa, yar mel niago a; ni nixmox zzar eilmel xiar doxr dae nr ssa,” eine bbeix a. Tamar dder kaexllaexrlaexrmo yargo Yasaloxr hhexr ake hher dae a.

²¹ Zzirmar Daxlweixl eilmel leil bbejjiur a seifu zzerzzelzzer faex. ²² Nael Yasaloxr zzael Axlnexl dax ddar seir ddar nr seir lei nr bbeix. Axlnexl yar nimo Tamar leil bei yojiar gger a, yel yar nixmox zzar Axlnexl leil yarzisael vuxryixr.

Yasaloxr Yar Nimo Leil Weix A Bei Koxl Xixl

²³ Nr koxl goxr ho a, ca mel Yirfaxrlixr mermi dax naer dae Balixl-xiaxlsor zzi gga, Yasaloxr leil ya me ddaex gger dae. Yasaloxr zzirmar ddei ssor maelmaerjgia leil qie a, yar dax cirgo a almeixr zzor lol. ²⁴ Yasaloxr zzirmar dax lei a bbeix: “I lar! Ngo leil miar bei gger su mel eilcar ngo leil ya me ddaex gger dae. Ngo ni leil nei ni woxrke vaervaerpor mel leil qie a, ngo dax cirgo a ssi.” ²⁵ Zzirmar ddei Yasaloxr leil bbeix: “Albor, ngua maelmaerjgia ssi nr ssa, ni leil zzirbae zoxl lalnga.” Yasaloxr qie bbeixnaer qie doxr a lei, zzirmar ddei nr ssi, nael yar leil seir lol ddar armel bbeix gger a. ²⁶ Giedae Yasaloxr bbeix: “Ni nr ssi arddeirnga a, ni leil qiuxr, ngago Axlnexl leil ngo dax cirgo a ssi lol la.” Zzirmar ddei bbeix: “Yar leil ssi lol a azo bei bbeixleir?” ²⁷ Nael Yasaloxr zzirmar ddei leil qiuxr bbeixnaer qiuxr

doxr a, zzirmar ddei dder Axlnextl leil nei yar ddei ssor maelmaerjjia leil Yasaloxr dax cirgo a ssi lol a.

²⁸ Yasaloxr yar leil miar bei gger su mel leil miardal a bbeix: “Nia seilseir a i dae! Axlnextl zzibbaer ddayixr a, ngo nia leil Axlnextl leil seixl bbeix a, nia dder yar leil seixl. Gexr nr ssa! Holbbaexl eil ddei mel ngo nia leil miardal nr nga a ngo? Nia nixmox vaervaermo bei a dder ddo a.” ²⁹ Yel Yasaloxr leil miar bei gger su mel dder, Yasaloxr miardal dae mel sael a Axlnextl leil seixl zil gger a. Zzirmar ddei ssor maelmaerjjia dder ha du lei a, armael ddei lozi ddei leil zzaer dae a, pa a.

³⁰ Yaa halae jjiumo car a gga ssi dae seir car dder Daxlweixl dax biar ci a bbeix: “Yasaloxr zzirmar ddei ssor maelmaerjjia leil seixl zil gger a; cir ddei lei nr zza a,” eine bbeix a. ³¹ Zzirmar ddei dder ngier du lei a, cix a, armael ddei pia xiux si bbaer gger a, middur ddei leil guir dae a. Yar woxrke vaervaerpor maelmaerjjia lei pia xiux si bbaer gger a, yar dax ngier dae. ³² Nael Daxlweixl yargo Sixlmiryal ddei ssor Yuenaxrdaxr bbeix: “Ngo ddei seirpor, caleixlssor maelmaerjjia leil hherdder ni ddei ssor mel leil seixl zil jjia gger a zzir nr ssa, Axlnextl cirmuzil a si. Axlnextl Yasaloxr ddei nimo Tamar leil bei yojjar gger hal cir ni cirdae, Yasaloxr dder Axlnextl leil seixl nia xiar har ho a. ³³ Ngo ddei seirpor ngo ddei zzirmar, eilcar ni nga-nr-zi eilmel leil ni nixmox zzar xiar doxr dae nr ssa. Ni zzirdae a ssor maelmaerjjia si a; nael nga zzael, Axlnextl lar si,” eine bbeix a.

³⁴ Halcar, Yasaloxr mel pa du si ho a. Darmumu ggie ngier dae a su su caleixlssor ddei, ca cirke a Hexrloxrnixl worga leil jjiumo gga lei ggie mia a. ³⁵ Yuenaxrdaxr zzirmar ddei leil bbeix: “I lar! Zzirmar ddei ssor mel jjixr lei a; yarzi ngo bbeix dae mel sael a nga a bbe.” ³⁶ Jiajia ddar mel bbeix jjia a qie, zzirmar ddei ssor mel ddir lei a, waerwaelwaer nge dae a. Zzirmar nei yar woxrke vaervaerpor mel lei yarzisael nge larhor.

³⁷ Yasaloxr zzael, Zisuxl mermi zzirmar Yalmirhu ddei ssor Daxrmaer dax halmaex pa mal a. Daxlweixl cirni-cirni yar ssor leil cix gger doxr. ³⁸ Yasaloxr Zisuxl mermi pa mal ci ho a, halmaex so koxl hher a. ³⁹ Axlnextl si a, Daxlweixl cix nor ho a; yel nixmox zzar Yasaloxr leil yarzisael jjiur.

Yueya Baxlfaxr Xiar A, Yasaloxr Leil Jjixr Lei Lol

14¹ Xirluryar ddei ssor Yueya mel, zzirmar ddei nixmox zzar Yasaloxr leil jjiur dae saexl a, ² yel dder ca leil miardal a Tixrgeyal mermi ssi a, halmaex gga jilixrlixrmo ssormaer ar ddei ae si lei lol a, yar leil bbeix: “Ni leil qie, ni ca si a cix su ddei bei laexl a, xiux pia veixr deix, ggecir leil nerxiuxiu nr mei, si su ca leil hormo nixixl cix gger ho ssormaer ar ddei bei laexl a, ³ zzirmar ddei dax ssi a, ngo ni leil bbeix gger dae ddar mel zzirmar leil bbeix gger,” eine bbeix a. Yel Yueya dder ddar bbeix labox mel ssormaer ddei leil mul gger a.

⁴ Tixrgeyal mermi su ssormaer ddei zzirmar dax lei ci a, middur leil puxr gex dae a, olddetexl a bbeix: “Zzirmar, ni leil qiuxr, ngo leil jiuxl la!” ⁵ Zzirmar ddei yar leil biex a bbeix: “Ni arsae nga a?” Yar ddarkoxl a bbeix: “Eil! Ngo mel maermocir ar ddei a; ngo capor si ho a. ⁶ Ngo^x ssor nnel zza. Cir ni a, yaa mi gga zzi deil a, quex su nr zza a, eil ddei hal ddei leil deil zil gger a. ⁷ I lar! Ngo cirssor maelmaerjjia ngo leil bixr a bbeix: ‘Ni yar nimar leil deil zil gger su ddei leil jia teixl lei a, ngua yar leil bei zil gger nia, yar mel yar nimar leil seixl zil gger a, yel ngua yar leil bei koxl xixl nia. ake hhexr ddei cirza-hanga li wo mibbe su ddei leil bei zil gger nia,’ eine bbeix a. Eine nga a, yaa ngo ddei cu nr gge saernir taex leil lei bei zil gger a, middurbbor ngo capor ddei mi ddei mier lol nei yar giedae ca nr zza lol.” ⁸ Zzirmar ddei ssormaer ddei leil bbeix: “Ni ake jjixr ddo a! Miar eil jji ngo ni leil bei gger var.” ⁹ Tixrgeyal mermi su ssormaer ddei yoxl zzirmar ddei leil bbeix: “Ngo ddei seirpor, ngo ddei zzirmar, zuixl eil ddei ngo leil nei ngabbor hhexr leil ddeix lol ddo; nael zzirmar, ni nei ni ddei goxr ddei zuixl nr zza.” ¹⁰ Yel zzirmar ddei bbeix: “Ha ddar bbeix a ni leil bei sol lol su mel, ni dder yar leil ngo dax eilmaex hier mal lei, yar zeixleixr ni leil cor lei nr var a.” ¹¹ Giedae yar ddarkoxl a bbeix: “Zzirmar, ni leil qie, ni ni ddei Arbosobo Yihexrhuaxr meixsaer qir leil bbeixharzaxr a, bei koxl xixl su ddei leil ca tor bei zil nr gger lol! Nrnga a, yaa ngo ddei ssor ddei leil bei zil gger leilei.” Zzirmar ddei bbeix: “Ngo, arddolcar ci a lei gol dae Yihexrhuaxr meixsaer qir leil bbeix bel, ni ddei ssor ddei middur leil olce lei bax ar ba bbae dol nr var.” ¹² Giedae ssormaer ddei bbeix: “Ngo ddei Seirpor, ngo ddei zzirmar, ni leil

^x14:6 Ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

giuxr, ngo^y leil zeixleixr ddar ar qir bbeix lol la!” Zzirmar ddei bbeix: “Ni bbeix lar!” ¹³ Ssormaer ddei bbeix: “Ni arsaenga a Arbosobo ddei cassor-worssor leil nr seir eilmel bei niazzir leir? Zzirmar, ni kebal mermi pa mal ni ddei ssor ddei leil nr jjixr lei lol a mel, ni bbeix dae ddar mel dder ni nr hoxr bbeix teixl lei a. ¹⁴ Niul mel arsae bei lei si var, hherdder ajjix mel middur leil dox dol ho a vei xixl lei nr cexr sael a nga. Nael Arbosobo mel ca ddei olga su nr si, doxgoxleixr arsae bei cexr arsae bei a, kebal pa mal ca ddei leil jjixr lei lol. ¹⁵ Eilcar ngo lei a, ddar eilmel ngo ddei seirpor ngo ddei zzirmar leil bbeix gger a mel, cassor-worssor mel ngo leil gexr lol a nga arddeir a. ‘Ngo^z zzirdae a, ngo zzirmar dax bbeix nia; nrbba zzirmar ngo qiuxr dae mel sael a bei var piar a. ¹⁶ Ngo zzirdae a, zzirmar ddei ngo leil noni var; Ngo leil, Arbosobo ngo leil nei ngo ssor leil gger dae mel leil li wo lol nia-nr-zzir su ca ddei leixrga gga jiuxl teixl lei var. ¹⁷ Ngo ddei seirpor ngo ddei zzirmar ddei ddar mel ngo^a leil nixmox zzaso lol var.’ Ngo ddei seirpor ngo ddei zzirmar, ni mel Arbosobo ddei tisir sael a, arddol mel hoxr arddol mel nr hoxr bbe teixl lei xie. Ni ddei Arbosobo Yihexrhuaxr leil ni dax cirgo a hher dae lol nia.” ¹⁸ Giedae zzirmar ddei ssormaer ddei leil bbeix: “Ngo ni leil ddar ar qir biex, ni ngo dax cirdoxr lei kerzi nr ddo.” Ssormaer ddei bbeix: “Ngo ddei seirpor, ngo ddei zzirmar, ni bbeix lar!” ¹⁹ Yel zzirmar ddei bbeix: “Nr nga ddar eilmel Yueya xiar teixl lei arddeir a ngo?” Ssormaer ddei bbeix: “Ngo ddei Seirpor, ngo ddei zzirmar, ngo ni meixsaer qir leil bbeix bel, ni bbeix hoxr, cirdoxr lei bbeix nr cox. Nga a mar! Ni leil miar bei gger su Yueya ngo leil miardal a; ddar eilmel yar ngo leil mul gger a. ²⁰ Ni leil miar bei gger su Yueya eine bei a mel, eil ddei gierbox niazzir. Nael ngo ddei seirpor, ni Arbosobo ddei tisir sael a olnolddu, Yirsaexllixl goxrjia ddei cirza-hanga lei saexl,” eine bbeix a.

^y14:12 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^z14:15 Ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^a14:17 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

²¹ Giedae zzirmar ddei Yueya leil bbeix: “I lar! Eil ddei ngo ni leil ddarkoxl a. Ni ssi a, caleixlssor Yasaloxr leil hier xixl lei ddo.” ²² Yueya dder qiaxrmeix ddei middur ddei leil puxr gex dae a, zzirmar ddei leil olddetexl, yar leil nawo. Yueya yoxl bbeix: “Zzirmar, ni ngo qiuxr dae mel ngo^b leil ddarkoxl a, ngo eilni, ngo ddei seirpor ngo ddei zzirmar ni meixsaer qir leil, ni ngo leil seir lol a saexl a.” ²³ Yel Yueya dder ha du lei a, Zisuxl mermi ssi a, Yasaloxr leil Yiluxlsaler zzi gga hier xixl lei a. ²⁴ Zzirmar ddei bbeix: “Yar leil armael ake jjixr lol ddo a; ngo leil i lei nr ssa.” Yel Yasaloxr dder armael ake jjixr a, zzirmar ddei leil nr mia.

Daxlweixl Yasaloxr Leil Ssoxrsuxl

²⁵ Yirsaexllixl su ca maelmaerjjia gga Yasaloxr sael a zae su ar ddei nr zza. Arseir lei yar leil kuar gger, oldde cirdae a cikata zzeze lei botaddu cirdoxr lei nr zza. ²⁶ Yar ddei olce gel yarzi lir, cir koxl goxr jjia a ar boxl ddaex; ddaex zei lei mel zzirmar ddei cex baxr dax zox dae a cex a mel, nrxiu sexlkexllexl zza^c. ²⁷ Yasaloxr ssor soler nei ssormaer ar ddei hier a. Ssormaer ddei leil Tamar mi, yarzi zae ar ddei a.

²⁸ Yasaloxr Yiluxlsaler zzi gga nr koxl hher a lei zzirmar ddei leil mia nr goxr. ²⁹ Giedae Yasaloxr ca leil miardal a Yueya leil ae si lei lol a, yar leil miardal a, zzirmar ddei leil i ssi lol niazzir; Nael Yueya zzael nr lei. Yasaloxr yoxl nr boxl ddei ca leil miardal a, yar leil ae ssi a lei, nael yar halae nr lei. ³⁰ Yel Yasaloxr yar leil miar bei gger su mel leil bbeix: “Nia i ddo a! Yueya ddei mi ar bbae a ngo ddei bbae dax naer dae, mi gga ssu xiu dae, nia adoxl nol a yar ddei bbae cu pixl gger,” eine bbeix a, Yasaloxr leil miar bei gger su mel dder adoxl nol a, yar ddei bbae cu pixl gger a.

³¹ Yel Yueya ha du lei a, Yasaloxr hhexr ake ssi a, yar leil biex a bbeix: “Ni leil miar bei gger su mel arsaenga a adoxl nol a, ngo ddei mi bbae cu pixl gger leir?” ³² Yasaloxr Yueya leil ddarkoxl a bbeix: “I lar! Ngo ca leil miardal a, ni leil qie si leil a, ni leil miardal a, zzirmar ddei dax ssi a, ngo leil weix a bbeix: ‘Ngo arsaenga a Zisuxl mermi jjixr lei, ngo halmaex hher dae bbaexl seir a,’ eine bbeix ssi lol

^b14:22 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

^c14:26 zzirmar ddei cex baxr dax zox dae a cex a mel, nrxiu sexlkexllexl zza Ddar eil qir ddei yilsi mel dder: nr zi zza.

niazzir. Eilcar, ngo leil zzirmar ddei leil i ssi lol nia. Ngo zuixl zza arddeirnga a, zzirmar ddei ngo leil seixl lol ddo.”³³ Yel Yueya zzirmar ddei dax ssi a, ddar eilmel zzirmar ddei leil bbeix gger a, zzirmar ddei dder Yasaloxr leil ae si lei lol. Yasaloxr zzirmar ddei leil i lei a, yar zzirmar ddei meixsaer qir leil middur ddei leil puxr gex dae; zzirmar ddei dder Yasaloxr leil jiuxl.

Yasaloxx Cassor-worssor Mel Leil Yar Dax Cir Piar A Bei Lol

15 ¹Eine goxr ho a, Yasaloxx armael leil weix a zaxlddaexrddu marcae nei mur geso, yoxl ca ngorceimo miardal a, yar xilmeir beix dae lol. ²Yasaloxx zoxlzoxl a neixrneixr-sisi ha du lei a, zzi gielmi dax jjiimo qir leil ngier dae. Ha azo-lerler zex ddu zza a, zzirmar leil qiuxr a ser gger lol su ca zza arddeirnga a, Yasaloxx dder yar leil ae gel lei a, yar leil biex a bbeix: “Ni zzi arddol ddei gga ca a?” Yar bbeix: “Ngo^d mel Yirsaexllixl su arddol cuxr arddol cuxr gga ca a.” ³Yasaloxx yar leil bbeix: “Ni ddei eil ddei mel seir lei seir, hoxr lei hoxr ar ddei a; nael zzirmar ddei zzael, ni bbeix dae mel leil noni gger su ca leibax ar ddei miardal nr si lei.” ⁴Yasaloxx yoxl bbeix: “Ngo eilmaex gga ddei ca leil ser su vaervaerpor bei nrsulsul! Eine nga a, ha azo zex ddu zza a ser gger lol su ca mel ngo dax lei arddeirnga a, ngo dder bbaehhexhhexmo ser,” eine bbeix a. ⁵Arseir naelnaer a lei a, yar leil cizixl gger su zza arddeirnga a, yar dder leixrhher ddei cei teixl lei a yar leil gga du lei a, yar leil jiuxl. ⁶Yirsaexllixl su ca mel gga, ha zzirmar ddei dax ssi a ser gger lol qiuxr su ca mel leil Yasaloxx dder eine bei. Yel Yasaloxx Yirsaexllixl su ca mel leil nixmox zzar yar leil nolnger lol a.

⁷Li koxl bbi ho a, Yasaloxx zzirmar ddei leil bbeix: “Ni leil qiuxr, ngo leil Xiboxrluixr mermi ssi lol a, ngo Yihexrhuaxr dax bbeixharzaxr goxr mel bei ssi lol la. ⁸Halleix ngo Yallaxr goxrjia gga Zisuxl mermi hher dae car, bbeixharzaxr goxr a bbeix: ‘Yihexrhuaxr yarzi ngo leil Yiluxlsaler zzi gga jjixr lei lol arddeirnga a, ngo dder yar leil visser,’ eine bbeix a.” ⁹Zzirmar ddei yar leil bbeix: “Ni zzasoso a ssi ddo a!” Yel Yasaloxx dder ha du lei a, Xiboxrluixr mermi ssi a. ¹⁰Nael Yasaloxx ker i ssi su ca mel leil miardal a, Yirsaexllixl circuxr-hanga gga ssi jiax lol a, bbeix: “Nia cuxgexdaex mex ggie bbejjiur a qie: ‘Yasaloxx Xiboxrluixr mermi zzirmar bei dae a’ bbeix nia!” ¹¹Yar Yiluxlsaler zzi gga ca nrxiuler qie a yar dax cirgo a ssi, maelmaerjia lei nixmox seibeixbeix a ssi lalnga, Yasaloxx bei niazzir dae mel leil cirza lei nr saexl. ¹²Yasaloxx Yihexrhuaxr leil zi car, ca leil miardal a Daxlweixl dax cirza-hanga zhibbe su Ziloxr zzi gga ca Yalxidofuxr leil, yar ddei zzi gga qie si lei lol. Yasaloxx dax mae lei su cassor-worssor mel cir ni bir cir ni leil miur du lei a; zzirmar leil dir eil ddei ho bei ho larhor a.

^d15:2 Ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

Daxlweixl Yiluxlsaler Zzi Gga Pa Teixl

¹³ Ddar bbeix gger su ar ddei a Daxlweixl leil bbeix gger a bbeix: “Yirsaexllixl su ca mel nixmox zzar Yasaloxr dax cir piar a bei ho a.” ¹⁴ Daxlweixl dder Yiluxlsaler zzi gga yar dax mae dae yar woxrke vaervaerpor maelmaerjjia leil bbeix: “Niul ha du lei a pa nia a; nrnga a niul maelmaerjjia lei Yasaloxr leil pato nr ddo a. Nialngasael ssi nia, nrnga a yar cirleixr dder niul leil ggaxrmae ci a, niul leil ke a, altor darsisi sser a zzi gga ca mel leil seixl zil gger leilei.” ¹⁵ Zzirmar woxrke vaervaerpor mel zzirmar leil bbeix: “Ngua ddei seirpor ngua ddei zzirmar azo bei niazzir mel, ngua dder azo bei.” ¹⁶ Yel zzirmar ddei yar ake ca cirhexr-lorbba leil hier dae a ddux a; nael yar ddei maeryemo ceimo leil zzirmar hher ggie su dae lol.

¹⁷ Zzirmar ddei ddux a, cassor-worssor maelmaerjjia lei yar dax mae dae a, xi maelele zzir dax nor dae a. ¹⁸ Zzirmar woxrke vaervaerpor maelmaerjjia yar meixsaer qir leil ssi gel a. Zilixltixr su ca maelmaerjjia, Birlixltixr su ca maelmaerjjia, Jiatexl mermi cirdae zzirmar dax mae dae su ca qiuxlxiuler jjia yar meixsaer qir leil ssi gel a. ¹⁹ Zzirmar ddei Jiatexl su ca Yirtaexl leil bbeix: “Ni arsaenga a ngua dax cirgo a ssi neil? Ni mel kebal mermi su ca a; ni lei ni armael ddei mermi cirdae a eilmaex pa mal lei. Yel ni zzirmar sixl ddei dax hher jjixr ddo a. ²⁰ Ni eilmaex lei hormo ardae nr ngaseir. Ngo arsae ni leil ngua dax cirgo a ssi za lol cexr bbeixleir? Eilcar ngo halae arddolmaex ssi nia lei nr saexl seir. Ni jjixr ddo a! Ni dax cir cuxr su ca mel leil hier dae a jjixr ddo a! Yihexrhuaxr leil yar ca leil perniar nei yar leil ddarzziddo mel dax zox dae a ni leil seir lol nia.”

²¹ Nael Yirtaexl mel zzirmar ddei leil bbeix: “Ngo, arddolcar ci a lei gol dae Yihexrhuaxr meixsaer qir leil nei ngo ddei seirpor ngo ddei zzirmar meixsaer qir leil bbeix bel, si bbeixsael gol zzorbbeixlei, zzirmar arddolmaex hher dae mel, ngo arsae bei lei halmaex hher dae.” ²² Daxlweixl Yirtaexl leil bbeix: “Nga ddo. Ni hoba ssi gel ddo a,” eine bbeix a. Yel Jiatexl su ca Yirtaexl dder yar dax mae dae su ca maelmaerjjia leil nei anix maelmaerjjia leil hier dae a ssi gel a. ²³ Cassor-worssor maelmaerjjia gger car, halmaex gga su ca maelmaerjjia bbialil-bbialor nge dae a. Zzirmar Daxlweixl Jixrluixr vixiur leil gger ho a, cassor-worssor maelmaerjjia dder mipaerbbae gga ssi mal a.

²⁴ Arbosobo leil zi su Sardu nei Arbosobo ddei yueguixl bil su Lixlweixl su ca maelmaerjjia lei lei a, Arbosobo ddei yueguixl ddei dol zei. Yalbiryalta ddeix lei a,

cassor-worssor maelmaerjgia zzi gga ddux lei a ssi gel ho zzeze ci.²⁵ Zzirmar ddei Sardu leil bbeix: “Ni Arbosobo ddei yueguixl ddei zzi gga bil xixl. Yihexrhuaxr ngo leil ggese arddeirnga a, yar ngo leil jjixr lei lol a, zeixleixr yueguixl ddei leil nei yar hher ggie ddei leil mia lol var.²⁶ Nael yar bbeix: ‘Ngo ni leil gge-nr-se’ bbeix arddeirnga a, i lar! Ngo eilmaex hher dae. Yar leil yar xiar dae mel dax zox dae a, ngo leil arsae bei niazzir bei lol ddo!”²⁷ Zzirmar ddei yoxl Arbosobo leil zi su Sardu leil bbeix: “Ni xiejixl nrnga a ngo? Ni zzasoso a zzi gga jjixr ddo a. Ni ssor Yalximarsi nei Yalbiryalta ddei ssor Yuenaxrda lei ni dax cirgo a jjixr ddo.²⁸ Ngo mipaerbbae dax lazzarmo zex leil gger ggie halmaex, nia ngo leil ddar bbeix gger lei xia dae.”²⁹ Yel Sardu nei Yalbiryalta Arbosobo ddei yueguixl ddei Yiluxlsaler zzi gga bil xixl a, yaa dder halmaex gga hher dae a.

³⁰ Giedae Daxlweixl oldde leil bbe gex dae a, ciddur-leixrte saercor worga leil ddeix, ho ddeix ho nge. Yar dax mae dae su maelmaerjgia lei, oldde leil bbe gex dae a nge dae a ddeix.³¹ Ca mel Daxlweixl leil bbeix gger a bbeix: “Yalxidofuxr lei zzirmar leil dirsu ca mel dax ca dae a, Yasaloxr dax cir piar a bei a.” Daxlweixl Arbosobo dax ddar biar a bbeix: “Yihexrhuaxr, ni leil qiuxr, Yalxidofuxr zuxryix ddux teixl lei mel leil bei nr cexr yarzi medeil loxr lol^e.”³² Daxlweixl worga oldde leil Arbosobo leil bbeixzae gger ggie ddeix ci a, Yalzi su ca Fuxlsae pia lei si bbaer jjia, oldde leil nilme xiu deix dae a, yar leil zi lei a.³³ Daxlweixl yar leil bbeix: “Ni ngo dax cirgo a ssi arddeirnga a ngo leil moxr dax lalnga.³⁴ Nael ni zzi gga jjixr a, Yasaloxr leil bbeix: ‘Zzirmar, ngo ni leil miar bei gger su ca bei yuex. Ngo halleix niabbor leil miar bei gger su ca bei, ciryoxr a nga, eilcar ngo lei ni leil miar bei gger su bei,’ eine bbeix arddeirnga a, ni dder ngo leil weix a Yalxidofuxr zuxryix ddux teixl lei mel leil bei nr cexr lol a.³⁵ Arbosobo leil zi su Sardu nei Yalbiryalta mel halmaex gga hher dae. Ni zzirmar hher ggie xi gga azo bbejjiur dder, Arbosobo leil zi su Sardu nei Yalbiryalta leil bbeix gger nia.³⁶ Sardu ddei ssor Yalximarsi nei Yalbiryalta ddei ssor Yuenaxrda lei halmaex gga hher dae. Ha nia bbejjiur wo mel dder ca eil nnel leil ddar bo a, ngo leil bbeix gger lei lol ddo.”

³⁷ Yel Daxlweixl ddei xiahor-carbeix Fuxlsae dder Yiluxlsaler zzi gga ddir a; Yasaloxr lei zzi gga ddir a.

^e15:31 yarzi medeil loxr lol Ddar eil qir ddei yilsi mel dder: bei nr cexr lol.

Xirba Daxlweixl Leil Zzorddu Gger

16¹ Daxlweixl jiajia worga oldde leil ssi gel ho a, Mirfeibosaexl leil miar bei gger su Xirba ho dext har ho tarlodaex nnel leil gga dae, tarlodaex leil aba nrxiu pir, puxrtohie bei teixl lei aba cirxiu pir, gielcozi ddei saerhiezzu bei teixl lei aba cirxiu pir, puxrto zziibaer ar daexl jix dae a yar leil zi lei a.² Zzirmar ddei Xirba leil biex a bbeix: “Ni zzaegu eilmel vei si lei a, azo yilsa a leir?” Xirba ddarkoxl a bbeix: “Tarlodaex mel zzirmar ddei ake ca mel leil zzaer lol labox; aba nei saer mel leixl su mel leil zzor lol labox; puxrto zziibaer mel mipaerbbae gga bei le su ca mel leil dda lol labox.”³ Zzirmar ddei biex a bbeix: “Ni seirpor Sarloxr ddei lilbol Mirfeibosaexl arddolmaex hher dae leir?” Xirba zzirmar ddei leil ddarkoxl a bbeix: “Yar halae Yiluxlsaler zzi gga hher dae seir. Yar zzirdae a, Yirsaexllixl su ca mel eilni yarbo Sarloxr ddei goxr ddei yar leil koxl gger var.”⁴ Zzirmar ddei Xirba leil bbeix: “Mirfeibosaexl ddei hazza lei ni leil gger a.” Xirba bbeix: “Ngo ddei seirpor, ngo ddei zzirmar, ngo ni leil cizixl gger, ngo ni meixsaer qir leil ni leil ggese lol nia,” eine bbeix a.

Sixlmeir Daxlweixl Leil Hie No

⁵ Daxlweixl Bahuxllixr mermi ssi ci a, ca ar ddei ddux lei a; yar mel Sarloxr hhexr ca Zila ddei ssor a; yar leil Sixlmeir mi. Yar ho ssi ho hieno dae.⁶ Yoxl legelbbe vei a zzirmar Daxlweixl leil nei zzirmar woxrke vaervaerpor mel leil zax; cassor-worsor mel nei zzi deil sexrsexr ca mel lei zzirmar ddei vaelpiar a gga yopiar a gga hher dae.⁷ Sixlmeir hieno a bbeix: “Ca seixl su ca aelgaxr eil te ni, guir ddo a! Guir ddo a!”⁸ Ni Sarloxr hhexr ca mel leil seixl zil gger a, yar dirtu zzirmar bei. Yihexrhuaxr zuixl eil ddei ni leil ddeix lol a, goxr eil ddei ni ssor Yasaloxr leil gger a. Ni mel ca seixl su ar ddei a; yel ni armael bei dae mel armael leil ddeix a.”

⁹ Xirluryar ddei ssor Yalbirsae zzirmar ddei leil bbeix: “Anol sima eil ddei arsaenga a ngo seirpor ngo zzirmar leil eine hieno leir? Ni leil qiuxr, ngo leil gger lol a, yar ddei oldde taex taexl zei lei lol la.”¹⁰ Nael zzirmar ddei bbeix: “Xirluryar ddei ssor, nia eilmel leil guaxr nr ssa a. Yihexrhuaxr yar leil miardal a, ‘Ni Daxlweixl leil hieno nia’ bbeix a, yar hieno arddeirnga a mel, arseir ‘Ni arsaenga a eine bei’ bbeix bel bbeixleir?”¹¹ Daxlweixl yoxl Yalbirsae leil nei yar woxrke vaervaerpor maelmaerjia leil bbeix: “Ngo ssor ga ddei lei ngo leil olga li

niazzir mel, Bixlyarmir su ca eil ddei ngo leil bei dae mel azo murgur ddu zza bbeixleir? Eil ddei mel Yihexrhuaxr yar leil miardal arddeir a; yel yar leil hieno dae lol ddo a. ¹² Nrbba Yihexrhuaxr eilni ngo nr seir pex dae ggie mia; ca eil ddei ngo leil hieno a, doxgoxleixr ngo leil seir lol piar a,” eine bbeix a. ¹³ Yel Daxlweixl nei yar dax mae dae su ca mel dder xilmeirbbaer ssi a. Sixlmeir nael, yaa deixrgoxr worga leil ho ssi ho hieno dae, yoxl legelbbe vei a yar leil zax, nilme mel yar leil xiu deix gger. ¹⁴ Zzirmar ddei nei cassor-worssor maelmaerjgia middei ar maex gga ssi ci a, bei le wor nr ddo a dder halmaex gga wornol dae a.

Yasaloxr Yiluxlsaler Zzi Gga Hher Dae

¹⁵ Yasaloxr nei Yirsaexllixl su cassor-worssor maelmaerjgia Yiluxlsaler zzi gga lei ci a. Yalxidofuxr lei yar dax ca dax dae. ¹⁶ Daxlweixl ddei xiahor-carbeix Yalzi su ca Fuxlsae Yasaloxr leil i lei a, yar leil bbeix: “Zzirmar, ni leil olga si lol nia, zzirmar, ni leil olga si lol nia!” ¹⁷ Yasaloxr Fuxlsae leil biex a bbeix: “Ni, ni ddei xiahor-carbeix leil eine seir lol a ngo? Arsaenga a ni ddei xiahor-carbeix dax cirgo a nr ssi neil?” ¹⁸ Fuxlsae Yasaloxr leil ddarkoxl a bbeix: “Nr ssi. Yihexrhuaxr nei cassor-worssor mel, halae Yirsaexllixl su ca maelmaerjgia tiur teixl lei hal ddei, ngo yar dax cir piar a bei a, yar dax cirgo a hher nia. ¹⁹ Nrnga a, ngo arseir leil visser nia neil? Nrnga xilmeir zzirmar hal ddei ddei ssor leil vi-nr-sser a, arseir leil visser bbeixleir? Ngo niabbor leil arsae visser mel, ciryoxr a nga, ni leil lei arsae visser nia.”

²⁰ Yasaloxr Yalxidofuxr leil bbeix: “Nia zuxryix ar ddei ddux, niul arsae bei nia?” ²¹ Yalxidofuxr Yasaloxr leil bbeix: “Niabbor zzirmar hher ggie su dae lol maeryemo mel, ni yaa dax naer ddo. Yirsaexllixl su ca maelmaerjgia lei ni niabbor leil dirsulox a saexl a, ni dax cir piar a bei su mel dder velver a ni dax mae var,” eine bbeix a. ²² Yel ca mel dder zzirmar hher ggie xipaebbor ^fYasaloxr leil zaxlpoxr daxr gger. Yasaloxr Yirsaexllixl su ca maelmaerjgia meixsaer qir leil yarbbor ddei maeryemo mel dax naer. ²³ Nixixl halmel gga, ca mel zzirdae a, Yalxidofuxr zuxryix ddux dae mel, Arbosobo ddei ddar mel sael a nga. Daxlweixl nei Yasaloxr yaa nnel jjia lei yar ddei zuxryix mel leil i du.

^f16:22 xipaebbor Yaa ddei xipaebbor mel mel bbaelerlermo armel a.

Fuxlsae Yalxidofuxr Zuxryix Ddux Teixl Lei Ddei Bei Nr Cexr Lol

17 ¹Yalxidofuxr Yasaloxr leil bbeix: “Ni leil qiuxr, ngo leil ca cirmeir nrdu (12,000) tiur lol a, ngo eilmei dder Daxlweixl leil ggaxrmae ssi. ²Yar bei le, wor-nr-ni car leil jiux dae a, yar dax ggaxrmae ci a, yar leil gexr lol a, yel yar dax mae dae su ca maelmaerjjia lei pa var. Nael ngo zzirmar ddei leil lar seixl; ³cassor-worssor maelmaerjjia leil nael, ni dax hier xixl lei. Ni zo dae ca ddei si ho a mel, cassor-worssor maelmaerjjia dder zzasoso a nga a,” eine bbeix a. ⁴Yel zuxryix eil ddei Yasaloxr nei Yirsaexllixl su ca mel leil guaxrsu camar maelmaerjjia lei i dae a seir.

⁵Yasaloxr bbeix: “Yalzi su ca Fuxlsae leil lei ae si lei nia, niul yar arsae bbeix bbe noni nia.” ⁶Fuxlsae Yasaloxr meixsaer qir leil lei ci a, Yasaloxr yar leil bbeix: “Yalxidofuxr bbeix dae mel mel eine eine a; niul yar bbeix dae ddar mel dax zox dae a bei ddo ddo? Bei nr ddo arddeirnga a, ni, ni xiar dae ddei bbeix ddo a.” ⁷Fuxlsae Yasaloxr leil bbeix: “Eilboxl Yalxidofuxr zuxryix ddux dae ddei nr seir.” ⁸Fuxlsae yoxl bbeix: “Ni lei saexl, niabbor nei yar dax mae dae su ca mel lei zzi deil sexrsexr ca armel a; eilcar yaa nixmox zzar seifu faex a, mi gga hnessor pixl hhemodo mel sael a nga. Halae niabbor mel zaxlddaexr su ar ddei a; yar cassor-worssor mel dax cirgo a xixl dae nr var. ⁹Yar eilcar doxlzi gga bbeixsael kebal mermi pahher dae a, yar ni dax mae dae ca armel leil hoba seixl zil gger arddeirnga a, ha bbejjiur su ca mel dder ‘Yasaloxr dax mae dae cassor-worssor mel leil seixl zil gger a’ bbeix var. ¹⁰Yel ca mel gga hhemar sael a nixmox vaer su ca zza zzorbbeixlei, nixmox taex derdelder gexr mal var. Yirsaexllixl su ca maelmaerjjia lei saexl, niabbor mel yarzi zaxlddaexr sexr ca ar ddei a; yar dax mae dae su ca mel lei nixmox vaer su ca armel a. ¹¹Ngo zzirdae a, ni Daxl mermi cirdae a Bixrsixlba mermi zzezze, neixvi qir leil sa mel sael a miur Yirsaexllixl su ca mel leil ni dax eilmaex ae pex si lei a, ni armael yaa leil hier dae a, zaxlddaexr ssi nia. ¹²Yel, niul arddolmaex yar leil zo wo zzorbbeixlei, yar dax halmaex zei, hherdder zil mel middurbbor ddar zei sael a nga. Eine nga a, yar nei yar dax mae dae ca mel leil lei ar ddei pixl lol nr var. ¹³Yar zzi arddol ddei gga ddir arddeirnga a, Yirsaexllixl su ca maelmaerjjia dder baezo vei dae a ssi a, zzi hal ddei leil lagiex gga gga ji gger, legelbbessor lei bax ar taex nr zza dae lol.” ¹⁴Yasaloxr nei Yirsaexllixl su ca maelmaerjjia bbeix: “Yalzi su ca Fuxlsae zuxryix ddux dae ddei bir Yalxidofuxr zuxryix ddux dae ddei leil seir leixl,”

eine bbeix a. Eil ddei mel Yihexrhuaxr Yalxidofuxr zuxryix ddux dae seirseir ddei leil bei xiaxr gger a, Yasaloxr leil nr seir ddeix lol niazzir a nga arddeir a.

Daxlweixl Pa

¹⁵Fuxlsae Arbosobo leil zi su Sardu nei Yalbiryalta leil bbeix: “Yalxidofuxr Yasaloxr leil nei Yirsaexllixl su ca leil guaxrsu camar mel leil zuxryix ddux gger mel mel eine eine a; ngo zuxryix ddux mel mel eine eine a. ¹⁶Eilcar nia nialngasael ca leil miardal a, Daxlweixl leil bbeix gger ssi lol a bbeix: ‘Eilmei mipaerbbae dax lazzarmo zex leil gger ggie halmaex xixl dae nr ddo, arsae bei lei lazzarmo zex leil gger nia. Nrnga a, zzirmar nei yar dax mae dae su ca maelmaerjjia leil bei zil gger var,’” eine bbeix a.

¹⁷Halcar, Yuenaxrda nei Yalximarsi mel ca mel yaa leil mia leilei a gexr a, zzi gga ddir nr bel a, Yirloxrjixr mermi xia dae. Ssormaer zebol ar ddei a, zoxlzoxl a ddux lei a yaa leil ddar bbeix gger lei a, yaa leil zzirmar Daxlweixl leil bbeix gger cexr lol. ¹⁸Nael caleixlssor ar ddox a yaa leil mia a dder ssi a Yasaloxr leil bbeix gger. Yaa dder jiuurjiur-maemae Bahuxllixr mermi ca ar ddei ddei ake beix mal a. Ca hal ddei zzaexggu gga lurddur ar bbe zza a, yaa dder lurddur gga zeil a. ¹⁹Ca hal ddei ddei maerssor ddei lurddur ggabilddu ddei ggabil du lei a, ggaxrsibbor ssu armel dox deix gger a, ca mel arseir lei i nr teixl lei. ²⁰Yasaloxr leil miar bei gger su mel ca hal hhexr dax ssi ci a, ssormaer hal ddei leil biex a bbeix: “Yalximarsi nei Yuenaxrda arddolmaex hher dae?” Ssormaer ddei bbeix: “Yaa lazzarmo leil gger jixr ho a.”

Miar bei gger su mel yaa leil zo a, zo nr wo a dder Yiluxlsaler zzi gga jjixr a. ²¹Miar bei gger su mel ssi ho a, yaa nnel lurddur gga ddeix lei a, zzirmar Daxlweixl leil bbeix gger ssi a bbeix: “Yalxidofuxr zuxryix eine eine ddux a ni leil ke, nia ha du lei a, nialngasael lazzarmo zex leil gger nia.” ²²Yel Daxlweixl nei yar dax mae dae ca maelmaerjjia lei ha du lei a, Yuedaxl lazzarmo leil gger a. Merteir a, Yuedaxl lazzarmo leil nr gger su ca cir ddei lei nr zza a. ²³Yalxidofuxr mel, yar zuxryix ddux dae ddei sael a nr bei mia a dder tarlodaex ddei leil ho dexl a, yar armael ddei zzi gga jjixr a. Yar ake jjixr ci a, ake gga ddei miar mel bei har a dder diux zil a; yar leil yarbbor ddei lixrbbae gga giexlhex dae a.

²⁴Daxlweixl Marhanixl mermi ssi ci a; Yasaloxr nei yar dax mae dae Yirsaexllixl su ca maelmaerjjia lei Yuedaxl lazzarmo leil gger jixr ho a. ²⁵Yasaloxr Yalmarsar

leil Yueya dirtu meixr guaxrsu vaervaerpor bei lol. Yalmarsar mel Yirsirmarlxl su ca Yirtexlla ddei ssor a; Yirtexlla halleix Naxrxiaxr ddei ssormaer Yalbirgie dax naer goxr a; Yalbirgie eil ddei mel Yueya yarma Xirluryar ddei arzzi-nimo a.
²⁶ Yasaloxr nei Yirsaexllixl su ca mel Zilixl mermi zaxlpoxr daxr a hher dae.

²⁷ Daxlweixl Marhanixl mermi ssi ci a, Yalmae ddei cuxr gga Laba mermi su ca Naxrxiaxr ddei ssor Soxlbir, Loxrdirba mermi su ca Yalmirlixl ddei ssor Marjixr nei Zilixl mermi Loxrzilixr su ca Baxilaexr yaa ²⁸ lorbbor, karddu, larggu, ddorbax, zzaegu ji ddu, so, ssu, some, kal goxr sone, nox, noxnilni, kal goxr nox, ²⁹ bbiurvi, ssursaxl, ya nei niurbaxr bei teixl lei zzorddu vei si lei a, Daxlweixl nei yar dax mae dae su ca mel leil zol. Yaa bbeix: “Cassor-worssor mel mipaerbbae gga hher dae a, meixr zzae meixr, sixl zzae sixl, bei zzae bei le,” eine bbeix a.

Yasaloxr Zaxlddaexr A Ddaexr Zil A

18¹ Daxlweixl yar dax mae dae ca mel leil hhe a, meixr cirdu guaxrsu nei cirxiu guaxrsu tiur teixl lei a yaa leil hier dae lol. ² Daxlweixl ca mel leil miardal a zaxlddaexr ssi lol a, so cir bbe mal: cir cir a nael, Yueya leil hier dae lol; cir cir a nael, Xirluryar ddei ssor Yueya nimar Yalbirsae leil hier dae lol; cir cir a nael, Jiatexl su ca Yirtaexl leil hier dae lol. Daxlweixl meixr mel leil bbeix: “Ngo arsaе bei lei nia dax cirgo a zaxlddaexr ssi.” ³ Nael ca mel zzael bbeix: “Ni ngua dax cirgo a ddaexr ssi nr ddo. Ngua pa du si arddeirnga a, niul leil dirsu mel arsaе zzir nr var; ngua leil cir peix ddaexr zil gger arddeirnga a lei, yaa arsaе zzir nr var; ngua ca cirmeir (10,000) a lei ni cirmuzil zzi nr zza. Ni zzi gga hher dae a, ngua leil bejjiu a hanol seir.” ⁴ Zzirmar ddei yaa dax bbeix: “Nia i dae a arsaе seir mel, ngo dder arsaе bei.” Yel zzirmar ddei dder zzi gielmi dax ngier dae a, ca maelmaerjgia cirdu cirdu cirxiu cirxiu zzicarzzi giedae mae dae a ddux a. ⁵ Zzirmar ddei Yueya, Yalbirsae nei Yirtaexl leil miardal a bbeix: “Nia ngo leil i dae a caleixlssor Yasaloxr leil bei no gger nr ddo,” eine bbeix a. Zzirmar ddei meixrguaxrsu mel leil miardal car, ca maelmaerjgia lei bbejjiur a.

⁶ Giedae, meixr mel zzi maelleil ddux ci a, Yirsaexllixl su ca mel dax mal dae a, Yirfaxrlixr mermi sixzzei cili gga yaa dax zaxlddaexr. ⁷ Yirsaexllixl su ca mel Daxlweixl ddei meixr mel dax ddaexr wor nr xie a. Hal cir ni, ca hormo ddaexr no, hormo ddaexr zil a; ca nrmeir (20,000) ddaexr zil a. ⁸ Halmaex gga zaza-lili lei zaxlddaexr, sixzzei cili mel yarzi fasol a, sixzzei cili gga si ji dae ca mel bir altor seixl zil gger ca mel leil lei miur leixl.

⁹ Yasaloxr neixleixrsael Daxlweixl dax mae dae su ca armel dax zzi a. Yasaloxr mel lozi ddei leil zzaer dae a, saexlzzei vaervaer yarbaxlleixr mel woxrke ssi gel a, yar ddei olce gel yarbaxlleixr leil ssox gex dae a, yar leil darlala diux dae a; yar zzaer dae lozi ddei lei ssi du si a. ¹⁰ Ca ar ddei a mia a dder Yueya leil bbeix gger a bbeix: “Ngo Yasaloxr saexlzzei ar zzei leil diux gex dae ggie mia a.” ¹¹ Yueya ddar bbeix gger su ddei leil bbeix: “Arddolyox a? Ni yar leil mia a bbaex? Arsaenga a yar leil halmaex gga seixl zil gger a, middur ddei leil de nr zeil lei lol neil? Ni yar leil seixl zil gger arddeirnga a, ngo ni leil piu cei taex nei luldasaе ar zex gger var.” ¹² Nael ca hal ddei Yueya leil ddarkoxl a bbeix: “Ni ngo leil piu cirdu (1,000) taex gger zzorbbexlei, ngo leixrhher bbor zzirmar ddei ssor dax cei mal a, yar

leil seixl nr bel; zzirmar ddei ni leil nei Yalbirsae leil, halae Yirtaexl leil miardal a bbeix: ‘Nia ngo leil i dae a, caleixlssor Yasaloxr leil seixl nr ddo’ bbeix a, ngua bbejjiur a. ¹³ Ngo zzirmar ddei ddar nr no a, Yasaloxr leil seixl zil gger arddeirnga a, zzirmar ddei neixr lae lei saexl var. Hane ci a, ni lei ngo leil guaxr nr var a!”

¹⁴ Yel Yueya bbeix: “Ngo ni dax hher nr mael a” bbeix a, yel dder leixrhher gga zzi deil a sser ddu niulddurddur so baex vei dae a, Yasaloxr halae gol dae a, saexlzei leil diux gex dae seir car leil jiux dae a, yar nixmoxzo dax cex dil gger a. ¹⁵ Yueya leil zzideilddu vei gger su, leixl su ceimo Yasaloxr leil weixr gex dae a, yar leil seixl zil gger a.

¹⁶ Yueya cuxgexdaex mex a, ca mel leil bbiur gex dae a, yaa dder Yirsaexllixl su ca mel leil ggaxr-nr-mae ssi, jjixr lei a. ¹⁷ Yaa Yasaloxr leil sixzzei cili gga bbeddur vaervaer ar bbe gga piar ji gger a, ggaxrsibbor legelbbe darmumumo ar be mar deix gger a. Yirsaexllixl su ca maelmaerjjia lei pa a, armael ddei ake jjixr a.

¹⁸ Yasaloxr gol dae seir car, armael leil weix a, “Zzirmar Lagiex” ae hal giex gga legelbbe sseigu ar taex dae. Yar bbeix: “Ngo ssor mel ngo dax mi mae su nr zza.” Yel dder yar ddei mi ddei sser a, legelbbe hal taex leil “Yasaloxr Ddei Sseigu” ae a, eilni zzeze ci a.

Daxlweixl Yasaloxr Si A Bbejjiur

¹⁹ Sardu ddei ssor Yalximarsi Yueya leil bbeix: “Ngo leil beix mal lol a, zzirmar ddei leil bbeix gger ssi lol, yar leil Yihexrhuaxr yar leil dirsu leixrga gga jiuxl teixl lei ho a saexl lol.” ²⁰ Nael Yueya yar leil bbeix: “Eilni ni ddar bbeix gger ssi nr ddo, arddol cir ni sael bbeix gger ssi. Zzirmar ddei ssor ddei si a; yel eilni, ni ddar bbeix gger ssi nr ddo.” ²¹ Giedae Yueya Gursir su ca ddei leil bbeix: “Ni ssi a, ni mia mel zzirmar ddei leil bbeix gger” bbeix a, Gursir su ca ddei Yueya xilmeir cizixl gger ho a dder beix mal a. ²² Sardu ddei ssor Yalximarsi yoxl Yueya leil bbeix: “Arsaenga zzorbbeixlei, ngo leil Gursir su ca ddei dax cirgo a ssi lol.” Yueya bbeix: “Ngo ddei ssor, ni mia eilmel bbeix gger ssi a lei, ni leil azo gger nr var, ni arsaenga a beix mal neil?” ²³ Nael Yalximarsi bbeix: “Arsaenga zzorbbeixlei ngo beix mal nia.” Yel Yueya bbeix: “Ni beix mal lar” bbeix a. Giedae Yalximarsi dder bbaelerler ggie jjiumo zex leil beix mal a, Gursir su ca ddei leil beix leixl gger a.

²⁴ Halcar malmal, Daxlweixl mel zzi gielmi alddur lavulbbaer peixl nei lamaebbaer peixl aga gga cux dae. Darmumu ggie ngier dae a i su meixr ddei, gielmi lebbor

ollele ddeix a, zzarvul-zzarmae i a, ca ar ddei a cirmuzil a beix mal lei ggie mia a. ²⁵ Darmumu ggie ngier dae a i su meixr ddei ae dae a, zzirmar ddei leil bbeix gger. Zzirmar ddei bbeix: “Yar cirmuzil a lei arddeirnga a mel, ddar bbeix gger lei arddeir a.” Ca hal ddei ho bei ho lei naer ci a. ²⁶ Giedae darmumu ggie ngier dae a i su meixr ddei yoxl ca ar ddei beix mal lei ggie mia a, yar alddur su su ddei leil ae a bbeix: “I ddo a! Yoxl ca ar ddei a cirmuzil a beix mal lei a.” Yel zzirmar ddei bbeix: “Yar lei ddar bbeix gger lei arddeir a.” ²⁷ Darmumu ggie ngier dae a i su meixr ddei bbeix: “Ngo i dae a, xilmeirbbaer beix dae ddei mel, Sardu ddei ssor Yalximarsi beix lesel dae.” Zzirmar ddei bbeix: “Yar mel ca seir ar ddei a; yar ddar seirseir bbeix gger lei,” eine bbeix a.

²⁸ Giedae Yalximarsi zzirmar ddei leil ae dae a bbeix: “Ni leil zzaso lol nia” bbeix a, yar dder zzirmar ddei xilmeir qiaxrmeix ddei middur leil puxr gex dae a bbeix: “Ni ddei Arbosobo Yihexrhuaxr leil mel bbeixzae gger nia, Yar mel ngo ddei seirpor ngo ddei zzirmar ni leil dir lei su mel leil, ni leixrga gga jia ji gger ho a.” ²⁹ Zzirmar ddei biex a bbeix: “Caleixlssor Yasaloxr seilseir a nga nga dae?” Yalximarsi ddarkoxl a bbeix: “Yueya ngo⁹ leil miardal car, ngo cassor-worssor mel bbixbbix-bbaxbbax ae ggie bbejjiur a; nael arsae nga a nr saexl.” ³⁰ Zzirmar ddei “Ni za gel a halbbaer ngier dae” bbeix a, yar dder za gel a halbbaer ngier dae a.

³¹ Gursir su ca ddei lei beix mal ci a bbeix: “Ngo, ngo ddei seirpor ngo ddei zzirmar leil ddar bbeix gger ddu zza. Eilni Yihexrhuaxr ni azo lei bei nr cox ca leil saexl lol a, ni leil, ni leil dirsu maelmaerjgia ddei leixrga gga jiuxl teixl lei ho a.”

³² Zzirmar ddei Gursir su ca ddei leil biex a bbeix: “Caleixlssor Yasaloxr seilseir a nga nga dae?” Gursir su ca ddei bbeix: “Ngo ddei seirpor, ngo ddei zzirmar, ni leil dirsu nei ni leil ke niazzir su ca maelmaerjgia leil, caleixlssor hal ddei sael a nga lol nia,” eine bbeix a. ³³ Zzirmar ddei nixmox zzar cix wor nr ddo a, gielmi lebbor ddeix a aenge ssi, yar ho ssi ho bbeix: “Ngo ssor Yasaloxr! Ngo ddei ssor! Ngo ssor Yasaloxr! Ngo ni leil si gger ssi nrsulsul sor! Yasaloxr! Ngo ddei ssor! Ngo ddei ssor!”

⁹18:29 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil visser su” eine bbeix a mel, yaa dax ddar biar su ca ddei leil i du a nga arddeir a.

Yueya Daxlweixl Leil Quex

19¹Ca mel Yueya leil, Daxlweixl zzirmar Yasaloxr leil weix a cix a nge dae bbeix gger a. ²Ca maelmaerjjia zzirmar ddei yar ssor leil weix a cix zildu a bbejjiur a dder, yaa zaxlddaexr leixl a ggeseddu mel lei cixddu loxr a. ³Yaa hal cir ni arjjiuljjiu a zzi gga ddir jjixr lei a; hherdder zaxlddaexr wor nr xie a, pa du si a, qiaxrmeix zzi nr zza ca mel sael a nga. ⁴Zzirmar ddei qiaxrmeix leil dex gex dae a, bbialil-bbialor aenge dae a bbeix: “Ngo ssor Yasaloxr! Yasaloxr, ngo ddei ssor! Ngo ddei ssor!” ⁵Yueya zzirmar ddei xi giex gga ddir a, zzirmar ddei dax ssi a bbeix: “Eilni ni, ni leil miar bei gger su hazza leil qiaxrmeix zzi nr zza lol a! Eilni yaa, ni leil, ni ddei ssor mel leil, ni ddei ssormaer mel leil, halae ni ddei maerssor mel leil nei maeryemo mel leil olga jiuxl a. ⁶Nael ni zzael, ni leil vuxryixrsu mel leil perniar, ni leil perniar su mel leil vuxryixr. Eilni ni daxmeix ni ddei meixr guaxrsu vaervaerpor mel leil nei ni leil miar bei gger su ca mel leil xiar nr gger. Ngo eilni i teixl lei a; Yasaloxr gol dae a, ngua eilni maelmaerjjia si arddeirnga a, ni dder ggese a. ⁷Yel eilcar ni ddux a, ni leil miar bei gger su mel leil nixmox dder vaer ssi nia. Ngo Yihexrhuaxr leil dor dae a bbeixharzaxr: Ni nr ddux arddeirnga a, eilmei ni dax hher dax su ca cir ddeir lei zza nr var a. Nr seir eil ddei dder ni ye tor cirdae a eilni zzezze pex dae goxr mel leil lei larhor leixl.” ⁸Yel zzirmar ddei ha du lei a, zzi gielmi dax cux dae a. Ca maelmaerjjia zzirmar ddei zzi gielmi dax cux dae a bbejjiur a dder maelmaerjjia zzirmar meixsaer qir leil lei a.

Daxlweixl Yiluxlsaler Jjixr

Halcar, Yirsaexllixl su ca mel pa du si a, armael ddei ake gga jjixr ho a. ⁹Yirsaexllixl su ca circuxr-hanga zzibbe a bbeix: “Halleix zzirmar ddei niul leil vuxryixrsu mel leixrga gga niul leil jiuxl teixl lei, yoxl Feilixlsixl su ca mel leixrga gga niul leil jiuxl teixl lei. Nael eilcar yar Yasaloxr leil pahher a armael ddei goxrjia gga nr hher. ¹⁰Niul tiur teixl lei a ssuvi dox deix gger a niul leil guaxr su bei lol Yasaloxr ddei mel, zaxlddaexr ggie si ho a. Eilcar nia arsaenga a arjjiuljjiu a hher dae, zzirmar ddei leil qie nr xixl lei leir?” eine bbeix a.

¹¹Yel Zzirmar Daxlweixl dder ca leil miardal a, Arbosobo leil zi su Sardu nei Yalbiryalta leil i ssi lol a bbeix: “Nia Yoxrdaxl su ca leil guaxrsu camar mel meixsaer qir leil bbeix: ‘Yirsaexllixl su ca maelmaerjjia biar dae ddar mel zzirmar

ddei dax biar ci ho a; nia arsaenga a, yaa giedae leil saelnei zzirmar ddei leil gie a, zzirmar hher ggie jjixr lei lol neil? ¹² Nia mel ngo ddei arzzi-nimar, ngo ddei cirssor a zzarmar? Arsaenga a, maelele ci a saelnei zzirmar ddei leil gie xixl lei neil?’

¹³ Yoxl Yalmarsar leil bbeix: ‘Nrnga ni doxl ngo ddei cirssor a zzarmar? Ngo ni leil Yueya dirtu meixr guaxrsu vaervaerpor nr bei lol arddeirnga a, Arbosobo ngo leil larhorhormo faxr lol ddo!’ eine bbeix nia.” ¹⁴ Zzirmar ddei eine bei a, Yoxrdaxl su ca maelmaerjjia nixmox zzar yar dax za xixl a, ca cir ddei sael a nga. Yaa dder ca leil miardal a, zzirmar ddei leil ddar bbeix gger ssi lol a bbeix: “Ni nei ni woxrke vaervaerpor maelmaerjjia jjixr lei.”

¹⁵ Zzirmar ddei dder jjixr lei a, Yuedaxl lazzarmo dax jjixr ci a. Yoxrdaxl su ca mel Zixrjiaxr mermi lei ci a, zzirmar ddei leil zi lei a Yuedaxl lazzarmo leil gger lol.

¹⁶ Bahuxllixr mermi Bixlyarmir su ca, Zila ddei ssor Sixlmeir lei jiuurjiur-maemae Yoxrdaxl su ca mel dax cirgo a zei lei a zzirmar Daxlweixl leil zi lei. ¹⁷ Bixlyarmir su ca cirdu (1,000) a Sixlmeir dax cirgo a ssi a, zzirmar Daxlweixl leil zi ssi. Sarloxr leil miar bei gger su Xirba lei yar ddei ssor ceingormo leil nei yar leil miar bei gger su nrzeimo leil hier dae a zi ssi. Yaa maelmaerjjia jiuurjiur-maemae Yuedaxl lazzarmo dax lei ci a. ¹⁸ Yaa lazzarmo zex leil gger ggie halmaex gger a, zzirmar ddei ake ca hhexr leil zi gel xixl lei, zzirmar ddei i dae a arsae seir mel yaa dder arsae bei a.

Daxlweixl Sixlmeir Leil Ssoxrsuxl

Zzirmar ddei Yuedaxl lazzarmo leil gger niazzir dae car, Zila ddei ssor Sixlmeir dder zzirmar xilmeir middur leil puxr gex dae a, ¹⁹ zzirmar ddei leil bbeix: “Ngo ddei seirpor, ngo ddei zzirmar, ni Yiluxlsaler zzi gga ddux car, ngo^h ni leil dir a zuixl bei a. Eilcar ni leil qiuxr, ngo leil zuixl tor dixl nr gger, ni eilmel leil tor hol-nr-cir dae, nixmox zzar tor nr ji dae. ²⁰ Ngoⁱ lei armael zuixl zza saexl a, yel eilni Yuesaexl hhexr ddei ca mel gga ngo hoba ngo ddei seirpor ngo ddei zzirmar leil zi lei.”

^h19:19 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

ⁱ19:20 Ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

²¹ Xirluryar ddei ssor Yalbirsae bbeix: “Sixlmeir Yihexrhuaxr tiur teixl lei saercor ssuvi dox deix gger ddei leil hieno mel, holbbaexl yar leil bei zil gger mi-nr-bbe a ngo?” ²² Nael Daxlweixl bbeix: “Xirluryar ddei ssor, ngo nia dax azo guaxrzoxr, nia eilni ngo dax dir a ngo? Eilni mel arsaе Yirsaexllixl su ca mel gga ca seixl cexr bbeixleir? Holbbaexl eilni ngo Yirsaexllixl su ca mel ddei zzirmar bei, nia nr saexl a ngo?” eine bbeix a. ²³ Yel zzirmar ddei Sixlmeir dax bbeixharzaxr a bbeix: “Ni si nr var.”

Daxlweixl Mirfeibosaexl Leil Seir Lol

²⁴ Sarloxr ddei lilbol Mirfeibosaexl lei zeil lei a, zzirmar ddei leil zi lei. Yar mel zzirmar ddei ddux hal cir ni cirdae a, zzirmar ddei zzasoso a jjixr lei zzeze lei, cini-saerkur ddaex nr goxr, bborvu cox nr goxr, pia cir nr goxr. ²⁵ Yar Yiluxlsaler zzi gga lei ci a zzirmar ddei leil zi lei car, zzirmar ddei yar leil biex a bbeix: “Mirfeibosaexl, ni arsaenga a ngo dax cirgo a nr ssi neil?” ²⁶ Yar ddarkoxl a bbeix: “Ngo ddei seirpor, ngo ddei zzirmar, ngo mel pirdael dae ca ar ddei a. Hal cir ni ngo tarlodaex leil ho dextl a zzaer deix a, zzirmar ni dax cirgo a ssi niazzir dae, nael ngo leil miar bei gger su ddei zzael ngo leil fur, ²⁷ yoxl ngo ddei seirpor ngo ddei zzirmar meixsaer qir leil ngo leil nrbba-nrbba bbeix. Nael ngo ddei seirpor, ngo ddei zzirmar, ni mel Arbosobo ddei tisir sael a nga, ni i dae a arsaе bei a seir mel ni dder arsaе bei ddo a! ²⁸ Ngabbor hhexr ddei ake ca maelmaerjjia lei ngo ddei seirpor ngo ddei zzirmar meixsaer qir leil si mibbe, nael zzirmar ni zzael, halae ngo leil ni dax cirgo a zzo zzor lol. Ngo halae ni leil qiuxr a, ngo leil azo bei gger lol quexrlixl zza bbeixleir?” ²⁹ Zzirmar ddei bbeix: “Ni halae eilmel leil bbeix a azo bei bbeixleir? Ngo xiar har ho a; ni Xirba dax cirgo a mi halmel bbe ddo.” ³⁰ Mirfeibosaexl zzirmar ddei leil bbeix: “Ngo ddei seirpor, ngo ddei zzirmar, ni zzasoso a ni hher ggie jjixr ci a dder ddo a; maelmaerjjia lei Xirba leil vei si lol ddo a.”

Daxlweixl Baxilaexr Leil Seir Lol

³¹ Zilixl su ca Baxilaexr lei Loxrzilixr mermi cirdae zeil lei a, zzirmar ddei dax cirgo a Yuedaxl lazzarmo leil gger niazzir, zzirmar ddei leil Yuedaxl lazzarmo leil ho gel niazzir. ³² Baxilaexr mel yarzi mar camar ar ddei nga a; yar heixlcei koxl loxr a. Yar mel yarzi be ca ar ddei a, yel zzirmar ddei Marhanixl mermi hher dae

car, yar zzirmar ddei leil gu dae. ³³ Zzirmar ddei yar leil bbeix: “Ni ngo dax cirgo a ssi a, ngo Yiluxlsaler zzi gga ni leil ba nia.” ³⁴ Nael Baxilaexr zzirmar ddei leil bbeix: “Ngo hormo arleixr gol wo nr ddo a piar a. Ngo halae zzirmar dax cirgo a, Yiluxlsaler zzi gga ddeix a azo bei bbeixleir?” ³⁵ Ngo heixlcei (80) koxl loxr a, halae seir bbeixsael nr seir bbe teixl lei xie seir a ngo? Zzor ddu mel zzorci zzor-nr-ci zzor teixl lei xie seir a ngo? Capor ssormaer mel caxlgo caxl ggie noni var seir a ngo? Ngo ddei seirpor ngo ddei zzirmar leil moxr dax a, azo bei bbeixleir? ³⁶ Zzirmar, ngo ni leil Yuedaxl lazzarmo leil lar ho gel cexr; ni arsaе ngo leil seirseir einezeixl ar zzu meixl gger leir? ³⁷ Ni leil qiuxr, ngo leil armael ddei zzi gga marle jjixr lol a, ngabbor ngama ddei lixrbbaex dax giexlhex jjixr lol. Nael ni leil miar bei gger su Jihar leil ngo ddei seirpor ngo ddei zzirmar ni dax cirgo a gger lol. Ni i dae a arsaе seir mel, ni dder yar leil arsaе bei ddo.” ³⁸ Zzirmar ddei bbeix: “Jihar ngo dax cirgo a gger ddo, ni i dae a arsaе seir mel, ngo dder yar leil arsaе bei. Halae ni ngo dax qiuxr dae mel, ngo ni leil bei gger var.” ³⁹ Yel cassor-worssor maelmaerjjia Yuedaxl lazzarmo leil gger a; zzirmar ddei lei gger a. Zzirmar ddei Baxilaexr qiaxrmeix ddei leil jiuxl a yar leil seir lol. Baxilaexr dder yar mermi jjixr a.

Yirsaexllixl Su Ca Nei Yoxrdaxl Su Ca mel Zzirmar Ddei Leil Weixr a Zex

⁴⁰ Zzirmar ddei gger a, Zixrjiaxr mermi ssi ci a. Jihar lei yar dax cirgo a gger a. Yoxrdaxl su ca maelmaerjjia nei Yirsaexllixl su ca ar peix a zzirmar ddei leil ho gel. ⁴¹ Yirsaexllixl su ca maelmaerjjia zzirmar ddei dax lei ci a, zzirmar ddei leil bbeix: “Nguа ddei arzzi-nimar Yoxrdaxl su ca mel arsaenga a arjjiuljjiu arla, zzirmar leil, zzirmar ddei ake ca mel leil nei zzirmar dax mae dae su ca mel leil Yuedaxl lazzarmo leil ho gel xixl neil?” ⁴² Yoxrdaxl su ca maelmaerjjia Yirsaexllixl su ca mel leil ddarkoxl a bbeix: “Zzirmar mel nguа ddei cirssor a. Nia arsaenga a eil ddei leil seifu faex neil? Nguа zzirmar ddei azo zzor a leir? Zzirmar nguа leil azo gger a leir?” ⁴³ Nael Yirsaexllixl su ca mel Yoxrdaxl su ca mel leil ddarkoxl a bbeix: “Cir cuxr cir cuxr bbeix zei lei a mel, nguа zzirmar Daxlweixl dax nia leil cei fel seir leixl. Nia arsaenga a nguа leil i zei neil? Zzirmar leil jjixr lei lol eil ddei mel, nguа hoba bbeix teixl lei nr nga a ngo?” Nael Yoxrdaxl su ca mel ddei ddar mel bir Yirsaexllixl su mel ddei ddar mel leil hhel leixl.

Sixlba Mel Zzirmar Ddei Leil Dir

20¹ Halmaex gga mel, jiajia aelgaxr su ca ar ddei zza, yar leil Sixlba mi, yar Bixlyarmir su ca Birzilixl ddei ssor a. Yar cuxgexdaex mex a bbeix: “Niul Daxlweixl dax guaxr-nr-zoxr, Yixi ddei ssor niul dax xia-nr-ga. Yirsaexllixl su ca mel, nia cirddei-hanga ake jjixr ddo a!” eine bbeix a.² Yel Yirsaexllixl su ca maelmaerjia Daxlweixl dax nr mae, Birzilixl ddei ssor Sixlba dax mae ssi a. Nael Yoxrdaxl su ca mel Yuedaxl lazzarmo dax cirdae a, Yiluxlsaler zzi gga zzezze lei, velver a yaa ddei zzirmar ddei dax mae dae.

³ Daxlweixl Yiluxlsaler zzi gga yar hher ggie jjixr ci a, halleix yar, yar hher ggie su dae lol maeryemo hal ceimo leil, yar nr hher xi mel gga ge ji dae a, yaa leil yaa sserzoxr mel gu dae, nael yaa dax nr naer; yaa maermocir sael a nga. Yaa leil si lozzezze lei ge ji dae.

⁴ Zzirmar ddei Yalmarsar leil bbeix: “Ni so ni gga Yoxrdaxl su ca mel leil ae pex si lei nia, ni lei eilmaex jjixr lei nia,” eine bbeix a.⁵ Yalmarsar dder Yoxrdaxl su ca mel leil ae pex ssi a. Nael yar dawo a, zzirmar bbeix har dae nixixl ddei lei goxr ho a.⁶ Yel Daxlweixl Yalbirsae leil bbeix: “Eilcar Birzilixl ddei ssor Sixlba niul leil ke a, bir Yasaloxr niul leil ke leil lei larhor leixl leilei. Ni, ni seirpor leil miar bei gger su ca mel leil hier dae a, yar leil ggaxrmae ssi nia. Nrnga a, yar zzi weixrqiaxr yarzi ssei gga ddir a, niul leil pahher dae a,” eine bbeix a.⁷ Yel Yueya dax mae dae su ca, Zilixltixr su ca nei Birlixltixr su ca, halae zzi deil sexrsexr ca maelmaerjia Yalbirsae dax mae dae a, Yiluxlsaler zzi gga ddux a, Birzilixl ddei ssor Sixlba leil ggaxrmae ssi.⁸ Yaa Zibixl mermi legelbbe vaervaer taex dax ssi ci a, Yalmarsar yaa leil zi lei a. Halcar Yueya mel zaxlddaexr labox pia tox veixr dae, zzoxrbbeix leil altor ddexr ddu luldasael zex neixl dae, altor baex altorxi gga ji dae. Yueya ssi dae a, altor baex altorxi gga pixl teixl lei a.⁹ Yueya leixrhher vaelbbor altor baex ggux du lei a, Yalmarsar leil bbeix: “Ngo ddei nimar, ni seirseir dae” bbaexl dder leixrhher yobbor yar bborvu gel leil jiu gex dae a, yar leil jiuxl sael a bei laexl.¹⁰ Yalmarsar Yueya leixrhher vaelbbor gga altor baex leil nr fa dae, Yueya altor baex sser a yar xilbe gga zzir dil gger a, yar ddei vu mel middur ddei leil yox teixl lei a; zeixleixr ar boxl nr zzir yar dder si a.

Yueya nei yar nimar Yalbirsae xilmeirbbaer ssi a Birzilixl ddei ssor Sixlba leil ggaxrmae ssi.¹¹ Yueya dax mae dae su leixl su ar ddei a Yalmarsar ggecir ddei dax

ngier dae a bbeix: “Arseir Yueya leil ggese, arseir Daxlweixl dax cir piar a bei a mel dder Yueya dax mae ssi nia.” ¹² Yalmarsar ddei ggecir ddei, jjiimo car a gga yar armael ddei sirnilni gga guir ji dae. Leixl su hal ddei ssi gel lei su ca maelmaerjjia ngier dae ggie mia a dder Yalmarsar ddei ggecir ddei jjiimo car a gga cirdae a, mi gga bbax mal gger a, pia sser a bbe gex dae a. ¹³ Ggecir ddei jjiimo car a gga bbax pixl ho a, ca maelmaerjjia dder gger a, Yueya dax mae ssi a, Birzilixl ddei ssor Sixlba leil ggaxrmae ssi a.

¹⁴ Sixlba Yirsaexllixl su ca circuxr-hanga dax ssi jiax a, Boxrmarjia mermi Yalbirla zzi gga nei Birlixl su ca mel ddei cirmaex-hanga lei ssi ci a. Halmaex gga ca mel lei cirgo a lei a, yar dax mae lei. ¹⁵ Yueya nei yar dax mae dae su ca mel, Boxrmarjia mermi Yalbirla zzi gga ssi ci a, Sixlba leil zzi gga weixr gex ji dae a. Yel yaa ca cir mel a nael, zzi ddei dax mal dae a, zzi ddei leil ddaexr labox darmumu ar ddei bei. Cir mel a nael, zzi weixrqiaxr ddei leil zuax a, zuax ze gger niazzir. ¹⁶ Jilixrlixrmo ssormaer ar ddei a, zzi weixrqiaxr leil hher dae a, ae dae a bbeix: “Noni dae, noni dae! Yueya leil qie a xilmeirbbaer lei lol, ngo yar dax ddar biar nia.” ¹⁷ Yueya xilmeirbbaer lei a, ssormaer ddei yar leil biex a bbeix: “Ni Yueya nga nga?” Yueya ddarkoxl a bbeix: “Nga a mar!” Ssormaer ddei bbeix: “Ngo mel ni leil vissersu ssormaer ar ddei a; ni leil qie, ngo ddar biar dae mel leil noni la.” Yueya bbeix: “Ngo noni dae a.” ¹⁸ Ssormaer ddei bbeix: “Halcar ca mel zoxl a bbeix: ‘Yalbirla zzi gga su ca mel leil biex ssi a, miar ddei dder bei cexr,’ eine bbeix. ¹⁹ Yirsaexllixl goxrjia gga, ngua zzi eil ddei gga ca mel mel ca dax toltor a bei, ddarzziddo. Ni zzael zzi vaervaer eil ddei leil bei xiaxr gger niazzir? Ni arsaenga a Yihexrhuaxr ddei zzi eil ddei leil bei xiaxr gger a, mier lol niazzir leir?” ²⁰ Yueya ddarkoxl a bbeix: “Nr nga! Ngo zzi eil ddei leil bei xiaxr gger a mier lol niazzir nr nga. ²¹ Yirfaxrlixr worga leil goxr su ca Birzilixl ddei ssor Sixlba, zzirmar Daxlweixl leil dir a nga arddeir a. Nia yar leil lar jia teixl lei ssa, ngo dder zzi ddei dax nr hher a.” Ssormaer hal ddei bbeix: “I dae lar! Yar ddei oldde taex zzi weixrqiaxr leil ni leil piar ze gger lei nia,” eine bbeix a. ²² Ssormaer ddei dder yar ddei olnoldduddu mel sser a, cassor-worssor maelmaerjjia leil quex. Yaa dder Birzilixl ddei ssor Sixlba ddei oldde taex taexl ze lei a, Yueya leil piar ze gger a. Yel Yueya cuxgexdaex mex a, cassor-worssor mel dder zzi ddei dax nr hher, armael ddei ake jjixr a. Yueya Yiluxlsaler zzi gga jjixr a, zzirmar ddei dax halmaex ssi a.

²³ Yueya nael, Yirsaexllixl su meixr maelmaerjjia leil guaxr; Yihexryidaxl ddei ssor Birnaxryar nael, Zilixltixr su ca nei Birlixltixr su ca mel leil guaxr; ²⁴ Yaldolaxr nael, ddoddo nr ddo ssu si lei a miar bei dae ca mel leil guaxr; Yalxilixl ddei ssor Yuesafaxr nael, goxrjia gga arsae-lerler nga vaexr zei lei dae mel leil guaxrsu bei.

²⁵ Sixlfaxr nael, suzixl bei; Sardu nei Yalbiryalta nael, Arbosobo leil zi su bei;

²⁶ Yar'aer su ca Yirla nael, Daxlweixl leil weix a, Arbosobo leil zi su bei.

Sarloxr Ddei Giedae Ca Mel Leil Bei Zil Gger

21 ¹Daxlweixl zzirmar bei dae car, loxlmoxr dae teixl lei nr ddo, zzor labox nr zza so koxl nga a. Daxlweixl dder Yihexrhuaxr leil qiuxr a yar leil biex. Yihexrhuaxr bbeix: “Eil ddei mel, Sarloxr hhexr ca seixl a, Zibixl su ca mel leil seixl zil gger a nga arddeir a.” ²(Zibixl su ca eimel mel Yirsaexllixl su ca nr nga; yaa mel Yalmoxrlixl su ca mel gga gol dae seir ca mel nga a. Halleix Yirsaexllixl su ca mel, yaa dax yaa leil nr seixl bbeixharzaxr goxr a; Sarloxr zzael, Yirsaexllixl su nei Yoxrdaxl su ca mel leil daxlgaxl-daxlixl weix a, yaa leil seixl niazzir.) Yel Daxlweixl yaa leil ae si lei a, ³yaa leil biex a bbeix: “Ngo nia leil weix a arsae bei nia neil? Azo sser a, zuixl eimel ssoxrsuxl lol a saelnei, nia Yihexrhuaxr ddei cassor-worssor mel leil seir lol yuex neil?” ⁴Giedae Zibixl su ca mel ddarkoxl a bbeix: “Ngua nei Sarloxr hhexr ddei eimel mel piu sae dax guaxr-nr-zoxr. Ngua leil weix a, Yirsaexllixl su ca cir ddei lei seixl nr ssa.” Daxlweixl bbeix: “Nia arsae bbeix, ngo dder nia leil arsae bei gger.” ⁵Yaa zzirmar ddei leil bbeix: “Halleix ngua leil ke, ngua leil seixl zil gger a, ngua leil Yirsaexllixl su ca mel dax nr hher lol su ca Sarloxr leil bbeix ci a, ⁶eilcar, yar ddei lilbol sirler leil ngua leil jia gger la, yel ngua Yihexrhuaxr meixsaer qir leil, yaa leil, Yihexrhuaxr tiur teixl lei a zzirmar bei lol Sarloxr hher vaer ggie Zibiryal mermi gaxl gex du lei nia.” Zzirmar ddei bbeix: “Ngo nia leil jia gger nia,” eine bbeix a.

⁷Nael zzirmar ddei mel, Yihexrhuaxr meixsaer qir leil, Sarloxr ddei ssor Yuenaxrda dax bbeixharzaxr goxr a; yel yar Sarloxr ddei lilbol, Yuenaxrda ddei ssor Mirfeibosaexl leil zoxlnixr a yar leil jia nr teixl lei. ⁸Nael Aexlyar ddei ssormaer Lixlsiba Sarloxr leil ssor xiu gger Yalmoxrnixr nei Mirfeibosaexl yaa nnel leil, halae Sarloxr ddei ssormaer Mirla, Mixrhexrla su ca Baxilaexr ddei ssor Yaldaexrlixl leil xiu gger ssor ngorler leil jia teixl lei a, ⁹yaa leil Zibixl su ca mel leixrga gga jia ji gger a. Zibixl su ca mel dder Yihexrhuaxr meixsaer qir leil yaa leil worga leil gaxl gex gger a; ca eil sirler jjia cirgo a si a. Yaa leil seixl zil gger car, loxlmoxr se beil car malmal nga a; hherdder jiajia ssu se beil car nga a.

¹⁰Aexlyar ddei ssormaer Lixlsiba zzirmae sser a, legelbbe vaervaer ar taex leil xigex daxr a, ggecir mel leil su dae. Loxlmoxr se du lei beil cirdae a, merlabbor

almer lei ze i lei a, ggecir leil lei deix zzeze ci a lei^j, yar eilnirggu nael, ngax mel leil ggecir leil nr nor lei lol; eilmerxixl nael, yirvu-nilhax mel leil ggecir leil bei xiaxr nr gger lei lol.

¹¹ Ca mel Sarloxr ddei maeryemo, hherdder Aexlyar ddei ssormaer Lixlsiba bei dae mel Daxlweixl leil bbeix gger a. ¹² Daxlweixl dder Zilixl-Yarbir su ca mel dax halmaex ssi a, Sarloxr nei yar ssor Yuenaxrda ddei hherggar mel ba xixl lei a. (Eil ddei mel, Feilixlsixl su ca mel, halleix Zilixlbo worga leil Sarloxr leil seixl zil gger a, ggecir mel Boxrsa zzi gga gaxl dae a, giedae Zilixl-Yarbir su ca mel ggecir mel ker si a nga arddeir a.) ¹³ Daxlweixl Sarloxr nei yarssor Yuenaxrda ddei hherggar mel halmaex ba xixl lei, yoxl gaxl dae ca hal sirlar ddei hherggar mel se du lei a. ¹⁴ Ca mel Sarloxr nei yar ddei ssor Yuenaxrda ddei hherggar mel, Bixlyarmir mermi Xirla halmaex Sarloxr yarbbor Zisixl ddei lixrbbax gga giexlhex gger a. Yaa zzirmar miardal dae maelmaerjgia dax zox dae a bei ho a, Arbosobo dder cassor-worssor mel goxrjia leil weix a qiuxr dae mel leil noni a.

Feilixlsixl Su Camo Vaer Zzir Ddei Leil Ddaexr

¹⁵ Feilixlsixl su ca mel yoxl Yirsaexllixl su ca mel leil ddaexr ssi a, Daxlweixl dder yar leil miar bei gger su mel dax cirgo a ze i a, Feilixlsixl su ca mel dax zaxlddaexr a, Daxlweixl dder ddaexr le a. ¹⁶ Camo vaervaer^a mel ddei ssor Yirsirbirnoxl mel Daxlweixl leil seixl niazzir; yar ddei zzi deil a sser ddu, zzir bei teixl lei baex mel so zi zza; yoxl altor sixl ar baex ddexr dae. ¹⁷ Nael Xirluryar ddei ssor Yalbirsae Daxlweixl leil beijjiu a, Feilixlsixl su ca hal ddei leil deil a, seixl zil gger a. Giedae Daxlweixl dax mae dae su ca mel yar dax bbeixharzaxr a bbeix: “Ni ngua dax cirgo a zaxlddaexr ssi nr ddo a! Nrnga a, Yirsaexllixl goxrjia ddei de zar si zil leilei,” eine bbeix a.

¹⁸ Giedae Yirsaexllixl su ca mel yoxl Geboxr mermi Feilixlsixl su ca mel dax zaxlddaexr, Fuxlsa su ca Xibirgie mel, camo vaervaer^k mel ddei ssor Sarfuxr leil seixl zil gger a. ¹⁹ Yoxl Geboxr mermi Feilixlsixl su ca mel dax zaxlddaexr, Boxrlxlhexr su ca Yarleixr-exr'aerji ddei ssor Yilexlhanaxr Jiatexl su ca Gelixlyal

^j21:10 Loxlmoxr se du lei beil cirdae a, merlabbor almer lei ze i lei a, ggecir leil lei deix zzeze ci a lei Qiuxl xiubbo sael zza.

^k21:18 camo vaervaer Lixlfaxryi ca

^a21:16 Camo vaervaer Lixlfaxryi ca

leil seixl zil gger a. Ca eil ddei ddei zzi deil a sser ddu baex ddei yarhher ddei mel, maeddaexrddu yarhher ddei leilei zza. ²⁰Yoxl Jiatexl mermi zaxlddaexr, halmaex ca yarzi mu yarzi vaer ar ddei zza. Ca eil ddei mel cini leixrni lei qiuxl ci niar dae, maelmaerjjia a nrzeili (24) ci niar dae. Yar lei camo vaervaer^l mel ddei ssor a. ²¹Yar Yirsaexllixl su ca mel leil zaxlddaexr lei qia a, Daxlweixl yargo Sixlmiryal ddei ssor Yuenaxrda dder yar leil seixl zil gger a. ²²Ca eil liller mel, Jiatexl mermi camo vaervaer^m mel ddei ssor a. Yaa maelmaerjjia lei Daxlweixl nei yar leil miar bei gger su mel leixrga gga si a.

^l21:20 camo vaervaer Lixlfaxryi ca

^m21:22 camo vaervaer Lixlfaxryi ca

Daxlweixl Bei Leixl A, Arbosobo Leil Caxl Zae Gger

22 ¹ Yihexrhuaxr Daxlweixl leil, yar leil dirsu hazza leixrga gga nei Sarloxr leixrga gga jiuxl teixl lei nixixl ddei gga, yar Yihexrhuaxr leil caxlgo eil ser caxl gger a bbeix:

² “Yihexrhuaxr mel ngo ddei legelbbe,

ngo ddei weixrqiaxr, ngo leil jiuxlsu,

³ ngo ddei Arbosobo, ngo pahher ggie legelbbe,

ngo ddei duixlpaexr, ngo leil jiuxlsu cuxgexdaex,

ngo leil barfuxl su nei ngo pa mal ggie nga a.

Ngo leil jiuxlsu, ni ngo leil yarzi gexrddo bei su ca mel dax jiuxl teixl lei.

⁴ Ngo, bbeixzae gger mibbe Yihexrhuaxr leil qiuxr nia,

ngo leil dder ngo leil dirsu mel dax jiuxl teixl lei nia.

⁵ Ca leil si lol var ddei bolaxl sael a ngo zaza-lili hher dae,

ca leil bei zil gger var mel ajjix sael a ggerggelgger ngo leil pe gex dae.

⁶ Yiji ddei baezo sael a ngo leil ssox gex dae,

ca leil si lol var ddei bel sael a ngo leil bel gex dae.

⁷ Ngo yarzi goxrsol car Yihexrhuaxr leil qiuxr, ngo ddei Arbosobo leil ae dae a qiuxr.

Yar, yar ddei xi gga ngo qiurte ddei leil bbejjiur a;

ngo yar dax qiuxr dae mel, yar noni wo a.

⁸ Yar seifu faex a,

middur ddei dder lelelle le du lei a;

merlabbor yarzibbor ddei lei lelelle le du lei a.

⁹ Yar noxlbbexsu gga alker sil teixl lei a;

yar meir gga adoxl herhelher ddux lei a,

yar dax zza dae saernir mel bbiu du lei a.

¹⁰ Yar merlabbor ddei ggapu a, zeil lei a;

zico neixlneix mel, yar qihher woxrke hher dae.

¹¹ Yar jiluxlboxr ddei leil cux dae a bbiu dae;

yar mersi ddei ddoleixr mel leil cux dae a bbiu dae.

¹² Yar neixmarmar ddei leil yar leil bbe gex dae lol;
neixmarmarmo zico mel yar zaza-lili gel mix jjia a.

¹³ Yar xilmeir bbobbolbbo ddei gga saernir mel lei adoxl bbiu du lei a.

¹⁴ Yihexrhuaxr merlabbor almer'er sael a ddar te;
Muzzirggie hher dae Arbosobo ddei qiurte ddei ddux lei.

¹⁵ Yar jir ddaexr teixl lei a, yar leil dirsu mel leil ggaxr bbeir gger a;
almerbbiexr a, yaa leil luaxl lol a.

¹⁶ Yihexrhuaxr, ni hexr du lei a,
noxlbbexsu gga seixl ddux lei a qie,
neixvi yarzibbor ddei ddux lei a;
middur yarzibbor ddei leil lei mia ddo a.

¹⁷ Yihexrhuaxr leixrhher ddei merlabbor cei zei lei a ngo leil gga gex dae,
ngo leil ajjix yarzi neixl ggie gga deix xixl lei.

¹⁸ Yar ngo leil, ngo leil dirsu yarzi sexr halmel dax jiuxl teixl lei;
ngo leil vuxryixrsu yarzi worni halmel dax jiuxl teixl lei.

¹⁹ Ngo goxrsol-goxrnaxr pex dae nixixl ddei gga yaa ngo leil dir lei,
nael Yihexrhuaxr mel ngo ddei koxl ggie a.

²⁰ Yihexrhuaxr ngo leil middei kuax ggien hier mal;
Yar ngo leil ggease a, yel ngo leil jiuxl.

²¹ Yihexrhuaxr ngo ddei bbaehhexhhex mel dax zox dae a, ngo leil seirseir gger
xixl;

ngo ddei seibeixbeix leixrhher zze dax zox dae a, ngo leil seirseir gger a mel,

²² ngo Yihexrhuaxr ddei jjiumo zex leil ssi,
zeixleixr lei yarzi gexrddo bei a, ngo ddei Arbosobo dax bbe kae nr goxr;

²³ ngo arddolcar lei yar miardal dae mel leil holcir dae;
yar ddei lixfaxr mel leil i nr du bei nr goxr a nga arddeir a.

²⁴ Ngo yar meixsaer qir leil botaddu lei nr zza,
ngo armael leil guaxr dae a, zuixl nr bei ssi.

ⁿ22:20 middei kuax ggien middei kuax ggien ddei yiksi mel dder yar leil dirsu nr zza, yar leil ke su nr zza ggien halmaex nga a.

- 25 Yel Yihexrhuaxr dder ngo ddei bbaehhexhhex mel dax zox dae,
halae ngo ddei seibeixbeix mel dax zox dae a, ngo leil seirseir gger xixl.
- 26 Yihexrhuaxr, ni leil perniar su ddei, ni yar leil perniar;
botaddu nr zza su ca ddei, ni yar leil botaddu nr zza;
- 27 seirseir bei su ca ddei, ni yar leil seirseir gger xixl;
nr seir bei meixr su ddei, ni yar leil nr seir bei koxl xixl.
- 28 Goxr sol dae cassor-worssor mel, ni yaa leil jiuxl;
meixddur mu su mel, ni ca mel leil yaa leil i zei lol.
- 29 Yihexrhuaxr, ni ngo ddei de zar sael a nga;
Yihexrhuaxr, ni ngo leil neixmar ggie bbele lol.
- 30 Ngo ni leil koxl dae a, ngo leil dirsu meixr mel dax beix gel;
ngo ddei Arbosobo leil koxl dae a, lu mel leil tiuxl gel.
- 31 Arbosobo bei dae mel seir gaxzi;
Yihexrhuaxr ddei ddar mel yarzi a.
Yar yar leil koxl su ca maelmaerjia ddei duixlpaexr ddei bei.
- 32 Yihexrhuaxr nr nga a mel, arseir Arbosobo a bbeixleir?
Niul ddei Arbosobo nr nga a mel, arseir niul ddei legelbbe taex a bbeixleir?
- 33 Arbosobo mel ngo ddei yarzi ssei pahher ggie ddei nga a;
yar ngo ssi dae jjiumo zze leil seirceix-seirmaer lol.
- 34 Yar ngo ddei qihher zze leil cimodo sael a beix jiax lol,
ngo leil darmumu ggie barververmo hher dae lol.
- 35 Yar ngo leil mul gger a, ngo leixrhher zze leil zaxlddaexr var lol;
yel ngo leixrhherba mel, zzir bei teixl lei jir ddaexr labox hal ddei leil lei gga
du xie.
- 36 Arbosobo, ni ngo leil ni ddei duixlpaexr ddei gger, ni ddei duixlpaexr ddei ngo
leil jiuxl;
ni ngo leil beijjiu a, ngo leil sexr du lei lol.
- 37 Ni ngo qihher toxl gex dae jjiumo zex kuax du lei lol a,
ngo qihher zze yoxl nr goxr.
- 38 Ngo, ngo leil dirsu mel leil ggaxrmae ssi a, yaa leil seixl zil gger a;

yaa leil bei zil jjia nr gger hozze, ngo nr jjixr lei.

³⁹ Ngo yaa leil bei zil jjia gger, yaa leil deil guirle gger a, yaa leil ha du lei nr xie lol,

yaa ngo qihher woxrke de zei dae a.

⁴⁰ Ni ngo leil worni lol a, ngo leil zaxlddaexr cexr lol;

ni ngo leil dirsu mel leil ngo qihher woxrke hher dae lol.

⁴¹ Ni ngo ddei qihher bbor leil yaa ddei leibbei leil toxl gex dae lol.

Ngo, ngo leil vuxryixrsu ca mel leil bei zil gger.

⁴² Yaa si leil qiuxr, nael yaa leil jiuxl su nr zza;

yaa Yihexrhuaxr leil qiuxr a lei, yar ddar-nr-koxl.

⁴³ Ngo yaa leil middurbbor ddei nilme mel sael a deil me gger;

yaa leil jjiux a, jjiumo gga nixlnaexl mel leil sael a jjiux.

⁴⁴ Ni ngo leil zzi dax zex dae ngo ddei cassor-worssor mel gga jiuxl teixl lei;

ngo leil guaxr dae a, goxrjia hormo ler ddei vaervaerpor bei lol,

ngo zeixleixr lei saexl nr seix cassor-worssor mel lei ngo leil visser.

⁴⁵ Yoxrtaexl su nr nga ca mel ngo dax ddaexr nr bel a;

yaa ngo ddei ddar mel leil bbejjiur a qie dder noni.

⁴⁶ Yaa nixmox ye a,

gexrgexr-zizi yaa zaxlddaexr a pahher ggie ddux lei.

⁴⁷ Yihexrhuaxr mel gol dae! Ngo ddei Legelbbe taex leil mel bbeixzae gger nia!

Ngo leil Jiuxlsu Legelbbe taex leil hherdder Arbosobo leil mel i du nia!

⁴⁸ Arbosobo eil ddei mel dder ngo leil dirsu mel leil bei koxl xixl su,

hormo cuxr leil lei ngo ddei ddar no lol su ddei nga a.

⁴⁹ Yar ngo leil dirsu mel dax ngo leil jiuxl teixl lei;

yoxl ngo leil bir yaa leil vaer leixl lol;

ngo leil yarzi gexrddo bei su ca mel dax jiuxl teixl lei.

⁵⁰ Yel Yihexrhuaxr, ngo cirgoxr-hanga dax ni leil nawo nia,

ni mi ddei leil caxlzae gger nia.

⁵¹ Yihexrhuaxr mel yar zzirmar bei lol ddei leil hormo boxl nei ddaexr leixl lol;

yar arddolcar ci a lei, yar tiur teixl lei saercor ssuvi dox deix gger ddei leil,

Daxlweixl leil nei yar giedae ca mel leil perniar a seirseir meixl gger.”

Daxlweixl Marle Du A Ddar Bbeix Dae Mel

23¹ Yargel ddei Arbosobo mel Yixi ddei ssor Daxlweixl leil tiur teixl lei a, saercor ssuvi dox deix gger a, yar leil zzirmar bei lol. Daxlweixl mel Yirsaexllixl goxrjia leil caxlgo noni zaezae cirke vaexr gger a. Jiasibbor eilmel mel, Daxlweixl maelele ddar bbeix dae mel nga a:

² “Yihexrhuaxr ddei Xiu ddei ngo leil sser dae a ddar biar; yar ddei ddar mel, ngo meir gga hher ji dae.

³ Yirsaexllixl ddei Arbosobo,
Yirsaexllixl ddei koxl ggje legelbbe vaervaer taex ngo leil bbeix:
‘Bbaehhexhhexmo cassor-worssor mel leil guaxrsu hal ddei,
Arbosobo leil i du nei gexr a guaxrsu hal ddei mel,

⁴ eilneixr-nehe merni ddux car bbelele ddei sael a nga,
zico nr zza eilneixr-nehe sael a nga,
yoxl almer lei bae a, bbele du lei sael a nga,
middur leil silnibaex ner teixl lei lol.’

⁵ Ngua hhexr Arbosobo meixsaer qir leil holbbaexl eine nr nga a ngo?
Arbosobo ngo dax bbeixharzaxr ho a; bbeixharzaxr dae eil ddei mel arddolcar
ci a lei zza doxr dae.

Bbeixharzaxr dae eil ddei mel cirza-hanga vaexr deix dae, koxlsseiddo.
Ngo leil jiuxl zoxr hazza nei ngo li wo loxia dae hazza,
yar ngo leil bei nr gger arddollei bbeixleir?

⁶ Nael nixmox neix su ca mel mel piar pixl gger dae alcur sael a nga;
ca mel leixrhher ddei yaa leil vei nr bel,

⁷ yaa leil ta su ca mel mel,
he zzargger nei zzi deil labox caex sser nia,
adoxl sser a, yaa leil halmaex cu pixl jjia gger nia.”

Daxlweixl Dax Mae Dae Su Zzi Deil Sexrsexr Ca Mel

⁸ Daxlweixl dax mae dae su zzi deil sexrsexr ca mel ddei mi mel jiasibbor vaexr dae: Xilmeir ddei nael, Tagexrmae su ca Yuesaexl-Basaexl a; yar leil yoxl Yisinixr su ca Yaldirnoxr lei ae, yar mel meixr guaxrsu leil guaxrsu vaervaerpor ar ddei a; cir boxl a, yar zzi deil a sser ddu baex sser a, ca heixlxu (800) seixl zil gger a.

⁹ Nrnal ddei nael, Yalhexryal su ca Dordo ddei ssor Yirlixlyalsar a; yar mel zzi deil sexrsexr ca soler gga ar ddei a. Cir boxl a, Yirsaexllixl su ca mel nei Feilixlsixl su ca mel zaxlddaexr a, yar Daxlweixl dax mae dae a Feilixlsixl su ca mel leil zaxlddaexr lei qia. Yirsaexllixl su meixr mel doxdoxsi jjixr a; ¹⁰ Nael yar zzael ha du lei a, Feilixlsixl su ca mel leil seixl a, leixrhherba ddei lei wor-nr-ni, leixrhher lei altor leil niaxl gex dae zzezze seixl ci a. Hal cir ni, Yihexrhuaxr Yirsaexllixl su ca mel leil bei leixl gaxzi lol a. Cassor-worssor mel Yirlixlyalsar dax jjixr lei a, zaxlddaexr a ddaexr wo zzaegu mel ggux mae dae lalssa.

¹¹ Soler ddei nael, Hala su ca Yalzi ddei ssor Samar a. Cir ni a, Feilixlsixl su ca seirseil ar cir a, nox nilni ner dae mi ar bbae dax lei ci a, cassor-worssor mel dder Feilixlsixl su ca mel meixsaer qir leil pa. ¹² Samar zzael, mi bbae aga gga ngier dae a, Feilixlsixl su ca mel leil seixl a nox bbae leil bei xiaxr nr gger lol a. Yihexrhuaxr Yirsaexllixl su ca mel leil bei leixl gaxzi lol a.

¹³ Loxlmoxr se zi ci car, zzi deil sexrsexr ca soceimo gga ca soler a, Yalduxllaxr doxzi dax zei a, Daxlweixl leil i ssi. Feilixlsixl su meixr mel Lixlfaxryi lagiex gga zaxlpoxr daxr a hher dae. ¹⁴ Halcar, Daxlweixl mel zaxlddaexr a pahher ggie gga hher dae; Feilixlsixl su ca mel ddei meixr mel hher ggie ddei nael, Boxrlxlhexr kax gga daxr dae. ¹⁵ Daxlweixl ajjix sixl a bbeix: “Arseir ngo leil Boxrlxlhexr kax gielmi dax lurddur gga ajjix mel ti gger si lei a ngo leil dda lol arddeirnga bbaexl seir a,” eine bbeix a. ¹⁶ Yel zzi deil sexrsexr ca eil soler dder Feilixlsixl su meixr mel hher ggie co gel a, Boxrlxlhexr kax gielmi dax lurddur gga ajjix mel tir si lei a, Daxlweixl leil gger. Nael Daxlweixl zzael nr dda, ajjix mel Yihexrhuaxr meixsaer qir leil dox dol gger a bbeix: ¹⁷ “Yihexrhuaxr, ca eil soler olga lei nr li ajjix tir ssi, ajjix eimel yaa ddei sirnilni sael a nga, ngo dda nr ddo,” eine bbeix a. Yel Daxlweixl nr dda. Eimel mel hherdder zzi deil sexrsexr ca eil soler bei dae mel nga a.

¹⁸ Xirluryar ddei ssor, Yueya nimar Yalbirsae mel zzi deil sexrsexr ca soceimo ddei vaervaerpor a; yar zzi deil labox baex sser a ca soxiu seixl zil gger a dder yaa soceimo gga middux a. ¹⁹ Yar mel, zzi deil sexrsexr eil soceimo gga, ca mel i du zzir ddei nga a; yel yaa ddei vaervaerpor bei a. Nael halae xilmeir hal soler zzi nr zza.

²⁰ Jiaxrxue su ca Yihexryidaxl ddei ssor Birnaxryar lei ddoddomo bei goxr a; yar halleix Moxrya su ca yarzi sexr nnel leil seixl zil gger, yoxl wor lei dae car, bbeddur gga zei a, hhemar ar ddei seixl zil gger. ²¹ Yar halae Aezixr su ca mu zzae mu, vaer zzae vaer ar ddei seixl zil gger. Aezixr su ca ddei leixrhher gga mel zzi

deil labox baex vei dae, Birnaxryar leixrhher gga nael zzargger lar cir caex vei dae. Yar Aezixr su ca ddei leixrhher gga zzi deil labox baex su gel lei a, hal baex sser a, Aezixr su ca ddei leil seixl zil gger a. ²² Eilmel mel, Yihexryidaxl ddei ssor Birnaxryar bei dae mel nga a; yar mel zzi deil sexrsexr ca soceimo gga middux a. ²³ Yar mel, eil soceimo gga middux zzir ddei nga a; nael xilmeir hal soler zzi nr zza. Daxlweixl yar leil yar dax ngier dae meixr mel ddei vaervaerpor bei lol.

²⁴ Zzi deil sexrsexr ca soceimo mel dder: Yueya nimar Yalsarhie, Boxrlxlhexr su ca Dordo ddei ssor Yilexlhanaxr, ²⁵ Halixl su ca Samar, Halixl su ca Yirlxljia, ²⁶ Paxllexltixr su ca Xilixlsi, Tixrgeyal su ca Yixljixr ddei ssor Yirla, ²⁷ Yalnaxrtu su ca Yalbiryixixl, Fuxlsa su ca Mirbernaer, ²⁸ Yalhexr su ca Sarmae, Nixrtoxfaxr su ca Marhalaexr, ²⁹ Nixrtoxfaxr su ca Banaxr ddei ssor Xilixl, Bixlyarmir ddei cuxr gga Zibiryal su ca Lixlbaexl ddei ssor Yirtaexl, ³⁰ Birladuixl su ca Birnaxryar, Jiasixr lagiex su ca Xitaexl, ³¹ Boxryallaba su ca Yalbiryalber, Balurmir su ca Yasimarfuxr, ³² Saber su ca Yirlixlyarhaba, Yarsaxl ddei ssor mel gga Yuenaxrda, ³³ Hala su ca Samar, Hala su ca Sala ddei ssor Yalxi'axl, ³⁴ Marjia su ca Yalhabaexl ddei ssor Yirlixlfaxrlxl, Ziloxr su ca Yalxidofuxr ddei ssor Yirlixr, ³⁵ Jiamixl su ca Xisilaexr, Yalba su ca Paxllaexr, ³⁶ Sorba su ca Naxrda ddei ssor Yirjiaxr, Jiadaexr su ca Banixr, ³⁷ Yalmae su ca Xirlexl, Birluxl su ca Naxrhalaexr, (Naxrhalaexr mel Xirluryar ddei ssor Yueya leil zzideilddu vei gger su a.) ³⁸ Yirti su ca Yirla, Yirti su ca Jialixl, ³⁹ Hexl su ca Vulixlyal nga a. Maelmaer a mel socei sirler zza.

Daxlweixl Cassor-worssor Mel Leil Hhe

24¹ Yihexrhuaxr yoxl Yirsaexllixl su ca mel leil seifu faex a, yar Daxlweixl leil yaa leil dir lol a bbeix: “Ssi a, Yirsaexllixl su nei Yoxrdaxl su ca mel leil hhe ssi,” eine bbeix a. ² Yel zzirmar ddei dder yar ddei meixr guaxrsu vaervaerpor Yueya leil bbeix: “Ni Daxl mermi cirdae a Bixrsixlba mermi zzezze, Yirsaexllixl su ca circuxr-hanga dax ssi jiax a, cassor-worssor mel leil hhe; yel ngo yaa ca hormo zza saexl cexr.” ³ Nael Yueya zzirmar ddei leil ddarkoxl a bbeix: “Ngo ddei seirpor, ngo ddei zzirmar, ni ddei Arbosobo Yihexrhuaxr leil, cassor-worssor mel leil cirxiu peix miur dax lol a, ni leil malma mia lol nia. Nael ngo ddei seirpor, ngo ddei zzirmar, ni arsaenga a eil ddei bei ggeese leir?” eine bbeix a. ⁴ Nael zzirmar ddei mel, Yueya nei meixr guaxrsu vaervaerpor mel leil yar miardal dae mel sael a bei lol. Yueya nei meixr guaxrsu vaervaerpor mel dder zzirmar meixsaer qir leil ddux a, Yirsaexllixl su cassor-worssor mel leil hhe. ⁵ Yaa Yuedaxl lazzarmo leil gger a, Jiadaexr lagiex gga Yalloxr'aer zzi ddei naxrfa piar a gga zaxlpoxr daxr a halmaex hher dae a, Yarxixl zzi ddei leil mal dae. ⁶ Yoxl Zilixl mermi nei Tatixr-Hexrsixl mermi ssi ci, yoxl Daxl-Yar'a zzi gga ssi ci a, Xiduixl zzi ddei dax za mal ci. ⁷ Taexl'aer mermi zaxlddaexr a pahher ggie gga ssi ci, halae Xiweixl su ca nei Jianaxr su ca mel ddei zzi cirddei-hanga gga ssi ci, yoxl Yoxrdaxl mermi naxrfa piar a gga Bixrsixlba mermi ssi ci a. ⁸ Yaa goxr ddei cirmaex-hanga ssi jiax a; ge xiubbo nei nrzei ni goxr a dder Yiluxlsaler zzi gga jjixr ci a. ⁹ Yueya cassor-worssor hormo hhe wo a zzirmar ddei leil bbeix gger; Yirsaexllixl su ca mel gga altor vei dae zzi deil sexrsexr ca heixlceimeir (800,000) zza; Yoxrdaxl su ca mel gga ngorceimeir (500,000) zza.

¹⁰ Nael Daxlweixl cassor-worssor mel leil hhe ho a, yoxl nixmox zzar armael leil curcix a, Yihexrhuaxr dax ddar biar a bbeix: “Ngo eine bei a, zuixl larhorhor bei a. Yihexrhuaxr, eilcar ngo ni leil qiuxr, ngo ddei zuixl ddei bei pixl gger la! Ngo bei dae mel yarzi medeil,” eine bbeix a. ¹¹ Daxlweixl eilneixr-nehe ha du lei a, Yihexrhuaxr ddei ddar mel xiezi Jiadaexr leil, hherdder Daxlweixl ddei xiejixl leil saexl lol a bbeix: ¹² “Ni Daxlweixl leil bbeix gger ssi, Yihexrhuaxr bbeix: ‘Ngo ni leil tiur ddu so yoxr gger, ni ddei ni ar yoxr tiur a, ngo dder ni leil ddeix lol cexr,’” eine bbeix a. ¹³ Yel Jiadaexr Daxlweixl dax lei a yar leil bbeix: “Ni, ni ddei goxrjia gga zzor labox nr zza sir koxl nga lol? Bbeixsael ni, ni leil dirsu ca mel meixsaer qir leil

pa a, ni leil so xiubbo ggaxrmae lol? Bbeixsael ni ddei goxrjia gga nogiel so ni no lol? Ni seilseir a xiar a, ngo dder ngo leil miardal si lei su ddei leil ddarkoxl jjixr cexr.”¹⁴ Yel Daxlweixl Jiadaexr leil bbeix: “Ngo yarzi bei sol! Yihexrhuaxr mel ca leil yarzisael zoxlnixr, yel niul yar leixrga gga hher ji dae yuex, ca ddei leixrga gga hher ji dae nr yuex.”

¹⁵ Yel Yihexrhuaxr Yirsaexllixl su ca mel leil nogielno lol, eilneixr-nehe cirdae a, dixl har dae nixixl ddei zzeze ci. Daxl mermi cirdae a Bixrsixlba mermi zzeze, cassor-worssor mel gga ca sirmeir (70,000) si a.¹⁶ Nael tisir ddei leixrhher cei teixl lei a Yiluxlsaler zzi ddei leil bei xiaxr gger niazzir dae car, Yihexrhuaxr mel bei niazzir dae mel gierbox a dder, cassor-worssor leil bei zil gger su tisir ddei leil bbeix: “Loxr a! Nor dae ddo a!” Halcar Yihexrhuaxr ddei tisir ddei mel Yibuxlsi su ca Yalloxrnaxr ddei ggieddei gga hher dae.¹⁷ Daxlweixl cassor-worssor leil bei zil gger su tisir ddei leil mia a dder Yihexrhuaxr dax ddar biar a bbeix: “I lar! Ngo zuixl bei a; ngo bei cox a; nael ya eil cir azo bei a leir? Ni ddei leixrhher bbor ngo leil nei ngabbor hhexr leil faxr ddo,” eine bbeix a.

¹⁸ Hal cir ni, Jiadaexr Daxlweixl dax lei a, yar leil bbeix: “Ni Yibuxlsi su ca Yalloxrnaxr ddei ggieddei gga ddeix a, Yihexrhuaxr leil ziggie ar ddei bei gger nia,” eine bbeix a.¹⁹ Daxlweixl dder Yihexrhuaxr Jiadaexr leil miardal dae ddar mel dax zox dae a ddeix a.²⁰ Yalloxrnaxr i zei a, zzirmar nei yar woxrke vaervaerpor mel yar dax lei ggie mia a dder ddux a, qiaxrmeix ddei middur leil puxr gex dae a, zzirmar leil cizixl gger a bbeix:²¹ “Ngo ddei seirpor, ngo ddei zzirmar, ni arsaenga a ngo dax eilmaex lei leir?” Daxlweixl bbeix: “Ngo ni ddei ggieddei ddei vae a, Yihexrhuaxr leil ziggie ar ddei bei gger a, cassor-worssor leil nogielno dae mel no nor lol nia.”²² Yalloxrnaxr Daxlweixl leil bbeix: “Ngo ddei seirpor, ngo ddei zzirmar, ni azo sser ggese mel vei si a zi ssi ddo. Ni i lar! Eilmaex gga niur zza, adoxl gga cu a Yihexrhuaxr leil ziddu ddei bei cexr, loxlmoxr ddaexr a sser ddu zzaegu mel nei lorleix mel adoxl ziddu six bei cexr.”²³ Zzirmar, maelmaerjia ngo^o ni leil gger.” Yalloxrnaxr yoxl zzirmar ddei leil bbeix: “Ni ddei Arbosobo Yihexrhuaxr leil ni leil ggese lol nia.”²⁴ Nael Zzirmar ddei Yalloxrnaxr leil bbeix: “Nr ssa, ngo arsae bei lei hormo per ddei dax zox dae a, ni dax vae nia. Ngo meixl si lei mel adoxl gga cu a ziddu bei a ngo ddei Arbosobo Yihexrhuaxr leil zi nr ddo,”

^o24:23 ngo Xiboxrlaexr ddar gga eilmaex gga mel “ngo” bbeix nr nga, “ni leil vissersu” eine bbeix. Yisaexllixl su ca mel yaa armael leil “ngo” eine nr bbeix, “ni leil vissersu” eine bbeix a mel, yaa dax ddar biar su ca ddei leil i du a nga arddeir a.

eine bbeix a. Yel Daxlweixl dder piu ngorcei taex sser a, ggieddei nei niur vae a.
²⁵ Daxlweixl halmaex gga Yihexrhuaxr leil ziggie ar ddei bei a, adoxl gga cu a
ziddu mel nei zzaso lol qiuxr a ziddu mel Yihexrhuaxr leil zi. Yel Yihexrhuaxr dder
cassor-worssor qiuxr dae mel leil noni a. Nogiel ddei dder Yirsaexllixl su ca mel
gga no nor a.